

# Luk

## *Od Uyu Irouya*

<sup>1</sup> Musei idi, amã atun erëb erëb wowã yen anĩ, ditotauf nigin age difen,

<sup>2</sup> are biya od nẽ kabĩ tamo uyulil dibod ken, meledim dilen anidi bun tamal, anĩ wogõ difaman.

<sup>3</sup> Age fiya nigin, aya yug bagai, gariya bunem erëb wowã yen anĩ ganan amir ailen, are aya kisi afen, tamo odug Teofilus õ bun el fe, itotoya nigin biya bagai aun,

<sup>4</sup> anĩ bunem, õ erëb erëb difelnon are momoi yeya anĩ keleĩ youf.

## *Jon Naan Igunẽdiya Tamo Gõ Fiya Sã Mog, Anĩ Ket Wogõ Yen*

<sup>5</sup> Herod Judia nẽ king ibodon sain bun, pris taka ibodon, in yana Sekaraia, ã Abiya nẽ pris bun tamal taka, in aiwa Elisabet ãg Aron nẽ ibor bun tamal.

<sup>6</sup> Idi urom Negur mala bun madur dibodon, idi Odug nẽ ãtäfiya ganan ado nun el de, tutuk dõ difedig.

<sup>7</sup> Anĩ ere, idi urom kesu sã, ere nigin, Elisabet ã dali, kesu gõ fiya kisi feleya sã, agef fen, idi urom tubau bagai.

<sup>8</sup> Sain taka bun, Sekaraia, ne kabĩ tura tar geid kabĩ dale mog, ã Negur nẽ pris kabĩ yale fen,

<sup>9</sup> pris idi neid tobonunã bunem, Odug nẽ tem-pel namen ile fen, aa gaula sumeĩ biya tō fiya nigin aisaĩ kodẽ bunem ĩ digirnen.

<sup>10</sup> Aa gaula sumeĩ biya tō fiya saine di, idi Odug yana dalesedig ganan mayarẽ kosẽ den.

<sup>11</sup> Agef mog, Odug nẽ engel, ĩ bun wõ ye, alta aa gaula sumeĩ biya tō fiyadig anĩ ima biyalẽ ifaren.

<sup>12</sup> Age fe di, Sekaraia ĩ ile fen, ĩ terẽ ye mã, kumĩ ye fen, dẽ yelen.

<sup>13</sup> Anĩ ere, engel ĩ irokenen, “Õ to kumĩ wo, Sekaraia, ogon kosẽya are Negur ĩ karĩ yen. Ogon aiwã Elisabet ĩ, ogon kesu monog gõ fouf, age fe di, in yana ù, Jon wouf.

<sup>14</sup> ĩ bunem waũ kulĩya ado waũ al fiya õ bun ibodõf, age fe di, musei ĩ gõ fouf bun waud al fouf,

<sup>15</sup> ere nigin, Odug mala bun ĩ yana odug adouf, ĩ wain be, aai naan total falei difef anĩg to yãf, agef fen, ĩ sina namenem Awa Ur Fateulem aura fiyẽf.

<sup>16</sup> Israel tamo kayau musei fau inim, Odug, nedi Negur wagen kel gurif irou ilauf.

<sup>17</sup> Agef fen, ĩ Eliya nẽ uur ado megeir bunem, Odug fau ileyã sã mog, ĩ ket uyu irou ile fen, temeid tar, naaluid tar nigin waud yenẽf nigin ado, fe temeleid idi madur ibodõya nẽ kisi biya bun ileyã nigin falei fe fen, tamo kayau Odug nẽ anidi saika fediyouf.”

<sup>18</sup> Sekaraia engel to fiyen, “Naig afe fen, aya enei keleĩ youf? Aya neu kayau ado urom ma-bodok masi, tubau bagaif.”

<sup>19</sup> Engel aiten yale iron, “Aya Gabriel. Aya Negur mala bun afaredig, anĩ nigin, aya õ wogõ

yōya nigin ado, biya od enei irokonōya nigin sur fiyal.

<sup>20</sup> Anī gama ò ait ufokol fen, od to wogō wof ule, anī wō youf naa bun, ere nigin, ò neu od to momoi wol, od enei are fau yogon sain bun bagai, kaũ wō youf.”

<sup>21</sup> Age fe di, tamo kayau Sekaraia tari de fen, idi ï sain meluk tempel namen ibodon nigin kisi musei dalen.

<sup>22</sup> ï ulō yesin sain bun, ï wogō fiyēdiya kisi feleya san. Age fe di, idi kelein, ï tempel namen mala seleulā kurāf fen, ereb taka ilel, ere nigin, ï imam dogol ifelneīd fen, ï wogōya sã ibodok ilen.

<sup>23</sup> In kabī nē sain bure fele di, ï fō bun kel ilen.

<sup>24</sup> Anī bure fele di, in aiwa Elisabet bou adon, agef fen, ogō faif ï iminkel ibodon.

<sup>25</sup> ï iron, “Odugem enei age fanan. Naa eneidi bun, ï yogon oroya ado wau ifenēya ifelnan, agef fen, neu mama tamo kayau atun yalelkanan.”

### *Jesus Gō Fiya Sã Mog, Anī Ket Wogō Yen*

<sup>26</sup> Ogō sigis bun, Negur, engel Gabriel Nasaret taun, oun Galili teneub, sur fiyē di, ile,

<sup>27</sup> kayau taulei, tamo yana Josef, Dawid nē ibor bun tamalem yalouf nigin digirin gein ilen. Kayau taulei yana Maria.

<sup>28</sup> Engel ï gein ile fen, iron, “Fel, ò nigin Negur fatuk el yok. Odug ò ado ibodok.”

<sup>29</sup> Maria in od nigin wau fatuk togu fen, aanya enei naig fiya nigin ye fen, kisi musei yalen.

<sup>30</sup> Anī ere, engel ï irokenen, “Maria, ò to kumī wo, ò Negur nē wau el fiya gurug wol.

31 Õ fau kesu ado fen, kesu monog gō wouf, ago fen, yana ù, Jesus wouf.

32 Ì fau odug wō ye di, Negur Ilun Bagai Naal douf. Negur Odug yogo, king nē modoũ tama Dawid nē anī, ì ifenēf.

33 Age fe di, ì Jakop nē ibor bun king gai ibodkalauf, in tano to sa kalauf.”

34 Maria engel to fiyen, “Aya fau mois, eī naig fe wō youf?”

35 Engel ì aiten yale iron, “Awa Uur Fateul ò bun isiyouf, age fe di, Negur Ilun Bagai nē megeir kerub yōf. Anī bunem fateul bagai gō wouf are, yana Negur Naal douf.

36 Ogon sirag Elisabeteg tubau mog, kesu yalouf, ì dali den, anī mogo ogō sigis ì bou ado ibodok.

37 Ere nigin, ereb taka anī Negur bun malai sā.”

38 Maria ì aiten yale iron, “Aya Odug nē kabī kayau, aya bun od sā, ò urok kilei od sā agef wō youf.” Age ye di, engel ì itornē ilen.

### *Maria Elisabet Ki Fiyen*

39 Sain anī bun, Maria dodok fel, kaisā bagai taun taka arei bun, Judia distrik nediwon ilen.

40 An ì Sekaraia nē fō bun wō ye fen, Elisabet fel fiyen.

41 Sain Elisabet Maria nē fel ya anī karī ye fen, kesu sina namen ibodon anī okī yen, age fe di, Elisabet Awa Uur Fateulem aura fiyen.

42 Ì ait odugem iweig iron, “Kayau ganan atun, Negur ò el yok. Agef fen, kesu gō wouf anīg, Negur ì el fiyek!

<sup>43</sup> Anĩ ere, aya naig fiya bagai nigin, neu Odug nẽ sina anĩ aya bun isif?

<sup>44</sup> Ogon fel ya nẽ ait wederoun ile mog bagai, momou nameun al fe fen, okĩ yel.

<sup>45</sup> Kayau taka, ĩ erēb Odug ĩ irokenek are agef kisi fel wõ youf, ye fen, momoi yef, are Negur ĩ el fiyek!”

### *Maria Nẽ Seg*

<sup>46</sup> Age fe di, Maria iron:

“Neu malaukanon Odug yana yalesef,

<sup>47</sup> agef fen, neu uur Negur Isennaya nigin kulĩ yef,

<sup>48</sup> ere nigin, ĩ, aya yogon kabĩ kayau maleg nigin kisi fatuk yalen.

Sain enei bunem ilauf ganan, ibor ganan Negur ĩ el fiyen douf,

<sup>49</sup> ere nigin, Negur Megeir Barikā ĩ aya bun erēb odug age fel, ĩ yana fateul ibodok.

<sup>50</sup> In wau yũya, ĩ nigin anini def bun tobol fouf, ibor gama ibodok enei ado, dumen isiyouf idi buneg gai gai ibodkalauf.

<sup>51</sup> ĩ yogo imam kabĩ total odug biya age fedin, ĩ idi neid kisi bun yeneid dalesef anĩ irudi di, fragagaũ difen.

<sup>52</sup> ĩ yeneid adodo, nedi modoũ bun yalelneĩd fen, maleg anĩ yalesnẽdin.

<sup>53</sup> ĩ idi naũ fedif anĩ, erēb erēb biya ifeneĩd fen, idi safineid adodo daku irudin.

<sup>54</sup> ĩ amã tubumã tar irokenẽdin kilei, ĩ yogon kabĩ tamo Israel isennen,

55 agef fen, Abraham ado in ibor nē tubu tar bun faimud,  
wau yūya ifenēdiya nigin karī yeledig.”

56 Maria, Elisabet ado ogō towo age fiya dibod ken, fō bun kel ilen.

*Jon Naan Igunēdiya Tamo Gō Fen*

57 Elisabet nē kesu gō fiya sain wō ye di, ī kesu monog gō fen.

58 Ī ne tā tar, in sirag tar geid, Negur nē wau yūya odug ifelnen anī karī de fen, idi weim waud al fen.

59 Naa eit bun, idi mulū nigin kesu bou gudū fiya nigin disin, age de fen, ĩ yana dū, tama nē dait Sekaraia douf nigin age difen.

60 Anī ere, ne sina aitedin yale iron, “Age fiya sã! Ī yana Jon ye yauf.”

61 Idi ĩ dirokenen, “Ogon sirag tar atun, yana age fiya taka sã.”

62 Age de fen, in tama bun kesu yana aib youf anī karī douf nigin, uris difenen.

63 Age dife di, ĩ itotoya nē safina nigin to fiyēdin, agef fen, “Ī yana Jon,” ye itoto di, idi ganan terē den.

64 Sain anī bun bagai, ĩ awa kakā ye di, bale faraf yale ulō yalaisi di, ĩ wogō ye fen, Negur yana yalesen.

65 Ne tā tar terē de fen, anini den, age de fen, Judia neid arein, fonō fonō wogagā de fen, erēb wō yen anī ganan wogō den.

66 Adok anī karī de fen, kisi musei dale fen, to difen, “Kesu enei naig fiya wō youf?” Ere nigin, Odug nē ima ĩ bun ibodon.

*Sekaraia Nē Seg*

67 In tama Sekaraia Awa Uur Fateulem aura fiyē di, ĩ profet od eig ye wogō yen:

68 “Odug seli tabiyouf, Israel neid Negur,  
ere nigin, ĩ isi fen, in tamo kayau kafī fiya bun  
tamal kel gei fel.

69 ĩ yogon kabī tamo Dawid nē fō bun,  
isennadaya megeir ado yalesel ifaref,

70 (are ĩ yogon profet fateul kulu temeleid sigoreid  
bun wogō den kilei).

71 Nemā kiwai tar ado,  
amā nigin to orodif anī imeid bun tamal, kel  
yalemāf.

72 Nemā tamamā tar nigin wau yūya anī ifelneīd  
fen,  
ĩ yogon bar itenēya fateul anī karī yelen.

73 ĩ wau kuturol fen, nemā tamamā Abraham  
irokenen.

74 Nemā kiwai tar imeid bun tamal kel gei famāf,  
agef fen, amā kumī sã ĩ aruna yaleya kisi  
falauf nigin.

75 Amā nemā mabodok malauf bun, ĩ mala bun  
gai fateul bagai fen, madur bagai mabodōf  
nigin.

76 “Age fe di, õ neu kesu, Negur Ilun Bagai nē  
profet douf,  
ere nigin, õ uyu urou fen, Odug nē naab  
dodok wouf.

77 In tamo kayau neid mosor nigin wedereid tu  
kalauf bunem,  
kel yalediyouf nē keleĩ wenēdiyouf.

78 Are nemā Negur molol nem wau yūya bunem,

anĩ bun gaa kurã fiya, saa ilunem amã bun isiyouf.

<sup>79</sup> Are idi gugum bun difaref ado,  
laa nẽ buri bun difaref anidi bun, fula fouf,  
age fe di, nemã yemã delẽ anidi bun madur marã  
di, wau inosiya bun malauf.”

<sup>80</sup> Age fe di, kesu biya fen, uur orib yen, ã gerere  
tuan ibodok ile, dum ã Israel tamo kayau meleid  
bun wõ yen.

## 2

### *Jesus Gõ Fen* (*Matyu 1:18-25*)

<sup>1</sup> Sain anĩ bun, Sisa\* Ogastus, Rom teneub  
ganan bun, tamo kayau an temeleid anĩ yeneid  
yaleya nigin od inon.

<sup>2</sup> (Eĩ urug bagai, sain Kwirinius ã Siria nẽ gawa-  
man mudur ibod mog, tamo kayau yeneid dalen.)

<sup>3</sup> Anĩ nigin, ganan dogo dogo neid taun bun  
yeneid inoya nigin dilen.

<sup>4</sup> Anĩ nigin, Josef ãg, oun Galili teneub Nasaret  
taun bun tamal Judia iselen, Betlehem Dawid nẽ  
taun bun iselen, ere nigin, ã Dawid nẽ fonõ ado in  
ibor bun tamal.

<sup>5</sup> ã Maria ado yeneid dinouf nigin diselen, ã  
Maria aiwauf nigin digirin, anĩ ã bou ado.

<sup>6</sup> Idi an dibod mog, kesu gõ fiya sain wõ yen.

<sup>7</sup> Age fe di, kesu monog matu gõ fen. Maria ã  
gabar nem silef fen, yaro neid beĩ bun inenen, ere  
nigin, tamo irouya fõ bun modoũ isokosen.

---

\* **2:1:** Rom neid king odug.



*Gaar Lo Fediya Tamo, Engel Geid*

<sup>8</sup> An gaar lo fediya tamo, melsã fonõ yerin dibod ken, bõ nedi gaar lo difedin.

<sup>9</sup> Age de mog, Odug nẽ engel idi bun wõ yen, age fe di, Odug nẽ fula fiya medeïya kerub fedi di, idi kumĩ tererẽ den.

<sup>10</sup> Anĩ ere, engel idi irokenẽdin, “Ã to kumĩ wog, aya od biya, tamo kayau ganan waud al foug nigin arou asif.

<sup>11</sup> Ere nigin, gama Dawid nẽ taun bun, ãgenei isenneïya wõ yel, ã anĩ Kristus Odug.

<sup>12</sup> Enei ã bun uris. Ã momou taka gabar nem sile de fen, yaro neid beĩ bun dinenem yenek anĩ ulogouf.”

<sup>13</sup> Kaisã bagai, engel musei saa ilun temeleid ulolõ deis, engel anĩ geid Negur yana dales diron,

<sup>14</sup> “Negur ilun bagai bun fula fiya medeïya, age fe di, tenebur ein tamo kayau ã el fedif bun, wau inosiya ibodõf.”

<sup>15</sup> Sain engel idi ditorneïd, saa ilun disele di, gaar lo fiya tamo abob dirokenen, “Odug ada irokanadal anĩ nigin, ada Betlehem teleg, ereb wõ yel anĩ taileg.”

<sup>16</sup> Anĩ nigin, idi kaisã bagai dile, Maria, Josef ado diledin, momou yaro neid beĩ bun yen mog, dilen.

<sup>17</sup> Idi ã dile fen, idi kesu anĩ nigin wogõ fiyẽdin anĩ od wogõ de diyon.

<sup>18</sup> Age dife di, ganan karĩ den idi, gaar lo fiya tamo wogõ difiyẽdin anĩ nigin terẽ den.

<sup>19</sup> Anĩ ere, Maria od anĩ ganan yale fen, waun ino fen, kisim dogol fen.

<sup>20</sup> Gaar lo fiya tamo keku de fen, idi wogõ fiyēdin kilei, ereb idi karī den ado dilen anī ganan nigin, Negur seli dabi fen, yana dalesen.

*Jesus Tempel Bun Dirou Dilen*

<sup>21</sup> Naa eit bun, ī mulū ileyā saine di, ī yana dū, Jesus den, yana are sina fau bou ado ya sā mog, engelem yun.

<sup>22</sup> Idi neid nonorou lilik fiya naa, Moses nē Lo ifaref kilei anī bure fele di, Josef Maria ado, Jesus Jerusalem, Odug ifenēya nigin dirou diselen,

<sup>23</sup> (are Odug nē Lo itotoya bun ibodok kilei, “Kesu matu monog wõ douf ganan, Odug wenēdigouf”\*),

<sup>24</sup> idi Negur sesewi fiya difenēf nigin diselen, Odug nē Lo eig ye irok kilei, “kuburir uru be, kukutir balas uru be.”\*

<sup>25</sup> Gama Jerusalem an tamo yana Simeon ibodon, ī madur bagai fen, Odug nigin karī yeledig. Ī Israel waud inosiya dalouf anī tari fedig, Awa Uur Fateul ī bun ibodon.

<sup>26</sup> Awa Uur Fateulem, ī fau to laaf mog, Odug nē Kristus wõ ye di, ilouf nigin irokenen.

<sup>27</sup> Awa Uurem toli fiyē di, ī tempel nē modoū bun ilen. Sain tama sina ado, Lo irok kilei age difouf nigin, kesu Jesus dirou dile di,

<sup>28</sup> Simeon imam ī yales fen, Negur yana yales iron:

<sup>29</sup> “Odug, õ uron kilei, õ gama ogon ferfer wau inosiya ado sur wo di, ilauf.

<sup>30</sup> Aya malaum bagai ogon isennēya anī ailel.

---

\* **2:23:** Eksodas 13:2, 12      \* **2:24:** Levitikas 12:8

<sup>31</sup> Are ganan meleid bun saika won.

<sup>32</sup> Are haiden Israel sã anidi bun, Negur nē oroya kurō falaisiya nē lalan, ago di, are ogon tamo kayau Israel bun fula fiya medeīya.”

<sup>33</sup> Kesu tama sina ado, od anī karī de fen, kisi bun terefeit den.

<sup>34</sup> Age dife di, Simeon el fiya ifeneīd fen, sina Maria irokenen, “Kesu enī, Israel tamo kayau musei kuku douf, musei fafā douf nigin ado, ī daū gen ifare di, ī dumen od sane dirōf nē uris wō youf nigin igirnen.

<sup>35</sup> Anī bunem, musei waud bun dinokok are yaorouf. Age fe di, ogon malākanon anīg dig otem borū fouf.”

<sup>36</sup> Profet kayau takag ibodon, Ana, Fanuel ne barai, Aser nē ibor bun tamal. Ī gai tubau bagai, ī tamo yale fen, aiwa ado yar sewen dibodon.

<sup>37</sup> Agef fen, ī waab ibodok ile, in yar eiti-fo. Ī tempel to itoron, bō ado gaa ado kuri ye fen, kosē ye, Negur yana yalesedig.

<sup>38</sup> Sain anī bun bagai, ī idi gein isel, Negur de fiye ken, Jerusalem tamo kayau kafī fiya bun tamal kel yalediyouf nigin ganan tari de difaren anidi, kesu anī nigin wogō fiyēdin.

<sup>39</sup> Josef, Maria ado, Odug nē Lo irok anī ganan dō de kisi fele di, idi baban ke de, Galili teneub oun, nedi taun Nasaret dilen.

<sup>40</sup> An, kesu ī biya fen, total adon, ī kisi biya barikan, agef fen, Negur nē wau ifenēya ī bun ibodon.

*Jesus Kesun Tempel Bun Ilen*

41 Yar ganan bun, in tama sina Pasa Sifa naa bun Jerusalem taun diledig.

42 Sain ĩ tuwelf yar mog, idi neid tobonunã dõ de fen, Sifa bun diselen.

43 Sifa bure fele di, in tama sina fonõ ke de dile mog, kesu Jesus ĩ fau Jerusalem ibodon, anĩ ere, idi to kelein.

44 Idi weim melef den, age de fen, naa tekelei diyon. Age dife fen, idi mogo nedi sirag tar bun ado, nedi tã tar atun dimirnen.

45 Idi ĩ to dile mã, idi ĩ dimirnẽ fenẽ nigin, Jerusalem taun baban ke de dilen.

46 Naa towo bure fele di, idi ĩ tempel modoũ bun ifelnẽdiya tamo atun ibod, karĩ fiyeĩd fen, to fiyeĩd mog, fotou difiyen.

47 Ganan ĩ karĩ difiyen are, in karĩya nigin ado aiteid solo fen anĩ nigin, terefeit den.

48 Tama sina ado ĩ dile fen, fatuk bagai terẽ den. Sina ĩ irokenen, “Neu kesu, ere nigin eig wamam? Aya tamã ado waumã morõ ken, mamirnom.”

49 ĩ to fen, “Ere nigin ã aya umir nagel? Aya neu Dei nẽ fõ bun abodõf ya, ã keleĩ sã de?”

50 Anĩ ere, ĩ ereb irokenẽdin are, idi to kelein.

51 Age dife di, ĩ weim Nasaret disil fen, sigoreid dõf el fen. Anĩ ere, in sina anĩ ganan yale, waun inon.

52 Jesus kisi biya ado bouwa orib yen, Negur ado tamo nẽ lo fiya bun biya len.

### 3

*Jon Naan Igunẽdiya Tamo Naab Dodok Fenen  
(Matyu 3:1-12; Mak 1:1-8; Jon 1:19-28)*

<sup>1</sup> Taiberius, Sisa mudur ibodon yar fiftin bun, Pontius Pailat ï Judia distrik nẽ gawaman mudur ibodon, Herod ï Galili distrik lo fen, ï tura Filip Ituria distrik ado Trakonitis distrik lo fen, age fe di, Lisanias ï Abilene distrik lo fen.

<sup>2</sup> Anas Kaiafas ado pris mudur dibodon sain bun, Negur nẽ od gerere tuan oun Jon, Sekaraia naal bun isin.

<sup>3</sup> ï Jordan naan kalilĩ fiya ganan bun iyo ken, waud falei de fen, naan digũ di, mosor yalel kenẽdiyof nigin biya od wogõ yen.

<sup>4</sup> Are profet Asaia nẽ itotoya bun ibodok kilei: “Ait taka gerere tuan iweig irok, ‘Odug nẽ naab dodok ge fen, madur wenẽg.

<sup>5</sup> Uus ganan bun kurokirĩa yoso foug, arei ganan mudu ganan ado gudũ falaisi tenebur ouf. Naab goigul yedin, madur foug, naab koũkĩ yediya yoso fediyof.

<sup>6</sup> Age fe di, tamo kayau ganan, Negur nẽ tamo kayau kel gei fiya anĩ dilouf.’ ”\*

<sup>7</sup> Tamo kayau Jonem naan igunẽdiyof nigin guru difen anidi Jon irokenẽdin, “Ã, gogour sane gere tar! Negur nẽ didi isiyof anĩ wal ge fen, uyagauf nigin, aim irokenein?

<sup>8</sup> Wauĩ falei gef are, faat biya ù gouf. ã aug nigin to eig ge urõg, ‘Abraham nemã tamamã.’ Aya arokeneik, meein enidi Negur sã irõ di, Abraham gere tar wowã douf.

<sup>9</sup> Safor aayũ gariyan mogo ibodok, aayũ ganan faat biya to yuk, are itu ira ken, yã malan irãf.”

---

\* **3:6:** Asaia 40:3-5

<sup>10</sup> Tamo kayau guru difen anidim to difen, “Age fiyauf are, amã naig mafouf?”

<sup>11</sup> Jon aitedin yale iron, “Tamo ã gabar uru adouf are, aib ã sã anĩ taka ifenēf, takag, taka ã saaf adouf, areg de age fouf.”

<sup>12</sup> Takis yaleya tamog, naan igũya nigin disin, idi to difen, “Tise, amã ere naig mafouf?”

<sup>13</sup> Ì irokenēdin, “Ã yaleya kilei anĩ to wal woseg waleg.”

<sup>14</sup> Age fe di, kusĩ tamo tunĩ to difiyen, “Ba amã ere naig mafouf?” Age de di, ã iron, “Ã nedi moni nigin ge fen, to fefu wiyēdig fen, idegēya bunem tamo kayau bouweid bun od to ũg. Āgenei kabĩ mala walegedig anĩ bun dogol al gouf.”

<sup>15</sup> Tamo kayau Kristus nigin tari difen, anĩ nigin, idi ganan waud bun Jon anĩ Kristus be de fen, kisi musei dalen.

<sup>16</sup> Jon idi ganan aitedin yale irokenēdin, “Aya naan nem naan aguneik. Anĩ ere, taka ã in megeir neu wal fiya fau isif, aya to biya nigin, ayam in su nē malũ biru felediya kisi feleya sã. Ì Awa Uur Fateul yã ado nem naan iguneif.

<sup>17</sup> Ì es fiya nē fok iman ado, ã yogon mayã waĩ fouf, yogon wit biya are yogon ki bun kuruf fen, wit ido yã mala faimud bun an irãf.”

<sup>18</sup> Agef fen, Jon od musei bunem, tamo kayau waud yale fen, biya od wogõ fiyēdin.

<sup>19</sup> Anĩ ere, Jonem, Herod tano anĩ nē mudur, tura nē aiwa Herodias nigin ado ereb ereb sane ganan age fen nigin ou fiyē di,

<sup>20</sup> Herod mosor ganan mosor enei ado baguf fen, ã Jon kalabus bun inenen.

*Jesus Naan Igun Ado In Ibor Nigin (Matyu 1:1-17; 3:13-17; Mak 1:9-11)*

<sup>21</sup> Sain Jonem tamo kayau ganan naan iguneĩd fen, Jesus ĩg naan igunen. Age fe di, Jesus kosẽ ye mog, saa kã fele di,

<sup>22</sup> Awa Uur Fateul kuburir bouwa bun genem ĩ bun isin. Age fe di, ait taka saa ilunem isin, “Õ neu Kesu, õ nigin aya wau laa fedig, õ nigin aya wau kulĩ yedig.”

<sup>23</sup> Gama Jesus yogo ĩ yar teti age fiya bun kabĩ gariya inon. Tamo kayau kisi difen, ĩ Josef naal den,

Heli naal,

<sup>24</sup> Matat naal,

Lewi naal, Melki naal,

Janai naal, Josef naal,

<sup>25</sup> Matatias naal, Amos naal,

Nahum naal, Esli naal,

Nagai naal,

<sup>26</sup> Mat naal,

Matatias naal, Semen naal,

Josek naal, Joda naal,

<sup>27</sup> Joanan naal, Resa naal,

Serubabel naal, Sieltiel naal,

Neri naal,

<sup>28</sup> Melki naal,

Adi naal, Kosam naal,

Elmadam naal, Er naal,

<sup>29</sup> Josua naal, Elieser naal,

Jorim naal, Matat naal,

Lewi naal,

<sup>30</sup> Simeon naal,

Juda naal, Josef naal,

Jonam naal, Eliakim naal,

31 Melea naal, Mena naal,  
 Matata naal, Natan naal,  
 Dawid naal,  
 32 Jesi naal,  
 Obed naal, Boas naal,  
 Salmon naal, Nason naal,  
 33 Aminadab naal, Ram naal,  
 Hesron naal, Peres naal,  
 Juda naal,  
 34 Jakop naal,  
 Isak naal, Abraham naal,  
 Tera naal, Nahor naal,  
 35 Serug naal, Reu naal,  
 Peleg naal, Eber naal,  
 Sela naal,  
 36 Kainan naal,  
 Arpaksad naal, Sem naal,  
 Noa naal, Lamek naal,  
 37 Metusela naal, Enok naal,  
 Jared naal, Mahalalel naal,  
 Kenan naal,  
 38 Enos naal,  
 Set naal, Adam naal,  
 Negur naal.

## 4

### *Satan Jesus Kisi Fiyen* *(Matyu 4:1-11; Mak 1:12, 13)*

<sup>1</sup> Jesus Awa Uur Fateulem aura fiyen, Jordan naanum kel fen, Awa Uurem itonē, gerere tuan irou ilen.

<sup>2</sup> An ã naa foti ibod mog, Satanem kisi fiyen. Ñ sain añi bun ereb taka to yon, naa foti bure fele di, ã naũ fen.



<sup>3</sup> Agef mog, Satanem Jesus irokenen, “Õ Negur Naal ouf are, meein enei urokenē di, bret falei fouf.”

<sup>4</sup> Jesus Satan aiten yale iron, “Negur nē Itotoya bun eig ye irok, “Tamo bretem dogol to mata ifenēf.”\*

<sup>5</sup> Satan Jesus yale irou, modoū ilun isel fen, kaisā bagai teneub enei nē tano ganan ifelnen.

<sup>6</sup> Agef fen, Satan Jesus irokenen, “Aya õ teneub enei nē biya fiya megeir ado ganan afonōf, ere nigin, are aya ifanan, anī nigin, aya aib taka ifenēya orouf are afenēf.

<sup>7</sup> Anī nigin, õ aya selu wabiyouf are, onou ganan are ogon ouf.”

<sup>8</sup> Jesus Satan aiten yale iron, “Negur nē Itotoya bun eig ye irok, ‘Odug ogon Negur seli wabi fen, ī dogol aruna walouf.’\*

<sup>9</sup> Satan Jesus yale irou, Jerusalem taun ilen, an tempel fõ soko ilun bagai inenē, ifaren. Satan iron, “Õ Negur Naal ouf are, ogo einenem ufū urā.

<sup>10</sup> Ere nigin, Negur nē Itotoya bun eig ye irok: “ ‘Negur õ nigin yogon engel ari fedi di, kulatun diyōf,

<sup>11</sup> idi õ imedim ololon daleyōf,

age dife di, õ yē meein takam to itutu ouf.’\*\*”

<sup>12</sup> Jesus Satan aiten yale iron, “Eig ye irok, ‘Odug ogon Negur kisi fiya bun to unenē.’\*\*”

<sup>13</sup> Satan kisi fiya enei ganan bure fel fen, ī Jesus itorne ken, ī fau sain taka anī tari fen.

---

\* **4:4:** Diuteronomi 8:3      \* **4:8:** Diuteronomi 6:13      \* **4:11:** Sam 91:11, 12      \* **4:12:** Diuteronomi 6:16

*Nasaret Tamo Kayau Idi Jesus Dudum Difiyen  
(Matyu 4:12-17; Mak 1:14, 15)*

<sup>14</sup> Jesus Awa Uur nē megeir bunem Galili kel ilen, age fe di, ĩ nigin od Galili teneub fonō fonō ganan iyokelen.

<sup>15</sup> ĩ idi neid uub fō fō bun biya od ifelnēdi di, ganan ĩ yana dalesen.

<sup>16</sup> ĩ Nasaret ilen, ĩ an biyan nē, agef fen, Sabat naa\* bun, idi neid uub fō namen ilen, gai age fedig gen. Agef fen, ĩ iwesauf nigin fā ye ifaren.

<sup>17</sup> Age fe di, profet Asaia nē itotoya buk kori fiya anī difenen, age dife di, ĩ fara fel fen, eig ye itoton anī imiren:

<sup>18</sup> “Odug nē Awa Uur aya bun ibodok,  
ere nigin, ĩ aya maleg anidi biya od wogō  
afediyouf nigin, igirna fen,  
mudurou bun moul fi felen.

ĩ, aya kalabus bun difaref anidi karika dalouf  
nigin ado,  
meleid ifofakeleya anidi meleid fara falauf  
nigin, kurō afalaisiyouf nigin sur fiyan.

Tamo kayau tunim kiwai difeneīd fen, morō  
difenēdif anidi yalel kenēdiya nigin sur  
fiyan.

<sup>19</sup> Takag, Odug nē biya fiya nē yar anī kurō  
afalaisiyouf nigin sur fiyan.”\*

<sup>20</sup> Age yel fen, ĩ gaar gabar itotoya ado are korif  
fen, itotoya anī lo fedig tamo, kel ifen ken, ibodon.  
Juda neid uub fō anī bun difaren ganan bagai,  
Jesus lo difelen.

---

\* **4:16:** Juda neid uub naa, are Sarere.      \* **4:19:** Asaia 61:1, 2

21 Age dife di, ï gariya ino fen, irokenēdin, “Gama naa enĩ bun, Negur nē Itotoya enei, āgenei karĩya bun kisi felel.”

22 Ganan ï yana dales fen, ï sigoron, wau ifenēya od wogō yen anĩ nigin terē den. Age de fen, idi to difen, “Eĩ Josef naal anĩ sã de?”

23 Jesus idi irokenēdin, “Momoi bagai, aya nigin od enei tamo kayau musei wogō dedig wogō gouf, ‘Dokta, ò ogo ogon dagi el wo! Ereb Kapenaum taun oun agon karĩ maun anĩ, ogon fõ gariyan ein ago wo.’ ”

24 Ì od tobol fe fen, iron, “Aya ã momoi aro-keneik, profet taka ï yogon fõ gariyan to karĩ difiyēf.

25 Aya ã momoi bagai arokeneik, Eliya nē sain bun, Israel oun kayau waab musei difar mog, yar towo ogō sigis saa katĩ fele di, teneub ganan bun uyē sã naũ odug difaren.

26 Age de mog, Negur idi anidi taka bun Eliya to sur fen, anĩ ere, waab taka Sarefat oun Saidon teneub bun sur fen.

27 Takag, Israel oun profet Elisa nē sain bun, musei lepra dagi ado dibodon, anĩ ere, idi atun taka lepra dagi to loko felen, Naman, Siria tamalem dogol.”

28 Juda neid uub fõ bun, ganan anĩ karĩ de fen, waud sanen.

29 Age de fen, idi fafã de fen, ï taun anĩ itor ilauf nigin dirun. Nedi taun are, arei bun nigin, siya sane bun dirãf nigin dirou dilen.

30 Anĩ ere, ï tamo kayau atu iyok ile fen, yogon naab ilauf nē anĩ dõf ilen.

*Jesus Kaa Sane Irun*  
(Mak 1:21-28)

<sup>31</sup> Agef fen, ï Kapenaum taun isilen, taun are Galili distrik bun ibodok, an Sabat naa bun, ï tamo kayau ifelnēdiya gariya inon.

<sup>32</sup> Idi ï ifelnēdin anī nigin terē den, ere nigin, in od wogōya are megeir ado.

<sup>33</sup> Juda neid uub fō bun, tamo taka kaa sanem ironen anī an ibodon. ï ait ilun feis iweig iron,

<sup>34</sup> “O, Jesus Nasaret tamal, ò amã ere naig wamã fenē? Ò amã daũ wamã fenē nigin usil de? Aya ò nigin keleĩ, Negur nē Fateul anī!”

<sup>35</sup> Jesus total ado iron, “Foro wol! ï namen tamal ulō weis!” Age ye di, kaa sane anī, tamo kayau ganan atun, tamo anī tou fiyē ira ken, ulō yeis ilen, tamo are bouwa to daũ fen.

<sup>36</sup> Tamo kayau ganan terē de fen, abob diroke-nen, “Eĩ ere keleĩ eig fiya? ï yana megeir adom irō di, kaa sesen ulō deis dilef.”

<sup>37</sup> Anī bunem, ï nigin od teneub anī kalilī fiya ganan bun iyokelen.

*Jesus Musei El Fedin*  
(Matyu 8:14-17; Mak 1:29-39)

<sup>38</sup> Jesus Juda neid uub fō itor ken, Simon nē fō bun ilen. Simon nē mam, ï bouwa uruwa odug ado nigin yenen anī, isennēf nigin Jesus to difiyen.

<sup>39</sup> Anī nigin, Jesus ï itirne ken, bouwa uruwa dagi ou fiyē di, itornen. Age fe di, kayau anī kaisã bagai fã yale, aruneid yalen.

<sup>40</sup> Gaa kuru kel mog, tamo kayau, dagi tamo dagi gariya fire fire adodo ganan, Jesus wagen

guri difeid disin, age dife di, idi mugu mugu bun ima tetedin ino fen, ï idi el fedin.

<sup>41</sup> Kaa sesen, tamo kayau musei bun, ulolō deis fen, diweig diron, “Ō anī Negur Naal!” Anī ere, ï sakā fiyeïd fen, to wogō douf nigin sigoreid ifofan, ere nigin, idi keleï, ï Kristus.

<sup>42</sup> Bonimeï gugum ado, Jesus moilin ilen. Tamo kayau ï dimirnek dile, ï ibodon nē disi fen, ï idi to itornēdiyof nigin katū difiyen.

<sup>43</sup> Anī ere, ï iron, “Aya Negur nē tano nigin biya od, taun taka takag wogō auf, ere nigin, aya anī nigin sur fiyan.”

<sup>44</sup> Age ye fen, ï Judia distrik oun Juda neid uub fō fō bun, biya od wogō yef iyon.

## 5

### *In Dō Fiya Tar Enidi Ket Jesus Iweignēdin (Matyu 4:18-22; Mak 1:16-20)*

<sup>1</sup> Naa taka bun, Jesus Genesaret daliyou\* yerin ifaren. Agef mog, tamo kayau ï salili difiye ken, Negur nē od wogō ye di, karī de difar mog anī,

<sup>2</sup> ï mala ira kel, waag uru naan yerin difar mog, ilen, are gau yaleya tamom an ditor yen ken, nedi kakāg kulo difen.

<sup>3</sup> ï waag anidi taka bun sō yen, are Simon nē waag, agef fen, waag naanū naal godof irou ilauf nigin to fiyen. Agef fen, ï waag bun ibod ken, tamo kayau biya od ifelnēdin.

<sup>4</sup> Sain ï wogōya bure fel fen, ï Simon irokenen, “Waag naan mala bun urou ule fen, gau yaleya nigin kakāg urofosil.”

---

\* **5:1:** Are, Galili Maaï.

<sup>5</sup> Simon aiten yale iron, “Odug, amã bõ odug kabĩ total malel, anĩ ere, ereb taka to malel. Anĩ ere, õ urok nigin aya kakãg baban arofosilauf.”

<sup>6</sup> Sain idi age difen, idi gau musei bagai gei difen, age dife di, nedi kakãg serek fou fenẽ melsan.

<sup>7</sup> Anĩ nigin, idi, nedi tã tar waag taka bun temeleid disi disennẽdiyof nigin, gale difiyẽdin, age dife di, disi, waag uru bun gau dife isokos fen, waag uru are dimutũ fenẽ melsan.

<sup>8</sup> Sain Simon Pita enĩ ile fen, Jesus iboron bobou fe fen, iron, “Odug, aya utorna ule, aya mosor nẽ tamo!”

<sup>9</sup> Ere nigin, ã ne tã tar geid gau gei difen anĩ nigin, terefeit den.

<sup>10</sup> Sebedi gere tar Jems Jon ado, are Simon ne kabĩ tura tar idig age difen. Age dife di, Jesus Simon irokenen, “Õ to kumĩ wo, gama naa enĩ bunem ilauf ganan, õ tamo gei wouf.”

<sup>11</sup> Age fe di, idi neid waag fiteiwõ didĩ dife di, isel fen, ereb ereb ganan ditorara ken, Jesus dõ difen.

*Tamo Lepra Dagi Ado*  
(Matyu 8:1-4; Mak 1:40-45)

<sup>12</sup> Jesus taun taka bun ibod mog, tamo taka lepra guruma barikã anĩ isin. Sain ã Jesus ile fen, ã tenebur kubũ ye kumokur fe, Jesus igone ken, iron, “Odug, õ oroyõf are, el wiyauf.”

<sup>13</sup> Jesus ima irã, tamo anĩ kobũ fiye ken, iron, “Aya wau irok, õ bouwã biyauuf.” Age ye di, kaisã bagai, lepra dagi ã itornen.

14 Agef fen, Jesus tamo anī irokenen, “Ō aib taka to urokenēf, anī ere, ō pris wagen ule, ō bouwã ufelnēf, ō bouwã biyal anī nigin Moses nē od irok anī dō fen, sesewi fiya wenēf, anī bunem yaore di, tamo kayau dilouf.”

15 Anī ere, ī nigin od fau fau iyok ilen, anī nigin, tamo kayau musei ī karī difiye ken, idi neid dagi yalē kenēdiyof nigin disin.

16 Anī ere, Jesus sain taka taka moilin ile fen, kosē yedig.

*Jesus Tamo Bouwa Ilolaisin Anī El Fiyen  
(Matyu 9:1-8; Mak 2:1-12)*

17 Naa taka bun, ī biya od ifelneīd mog, Farisia tamo, lo ifelnēdiya tamo geid, Galili distrik fonō ganan, Judia distrik ado Jerusalem temeleid idi an dibodon. Age de mog, dagi el fediyof nigin Odug nē megeir, ī bun ibodon.

18 Tamo tunī, tamo ilolaisin anī, gabgab bun faali de dirou disi, Jesus wagen dinenēf nigin fō namen dirou dilau fenē age difen.

19 Idi anī age fiya nigin naab taka to dilen, ere nigin, tamo kayau ino yalen, idi fō sokoron disel, soko korō difel fen, ī gabgab ado folo folō dife di, tamo kayau atun, Jesus wagen bagai isilen.

20 Jesus idi neid momoiya ile fen, ī iron, “Mou, ogon mosor alelkonok.”

21 Farisia tamo, lo ifelnēdiya tamo geid, idi dogo namedin kisi difen, “Eī aim bagai, kono fiya od wogō yef? Taka nem mosor yaleleya to yenek, Negur yogo dogol.”

22 Jesus idi kisi difen anī kelei ken, to fen, “Ā ere nigin nameī bun agog kisi gef?

<sup>23</sup> Od nanĩ anĩ aya wogõya nigin karika, ‘Ogon mosor alelkonok’ de, ‘Fã wale fen, uyok ule?’

<sup>24</sup> Anĩ ere, Tamo Naal ĩ tenebur ein mosor yaleleya nigin yana ado anĩ, ã keleĩ youf nigin...” Ĩ tamo ilolaisin anĩ irokenen, “Aya õ arokonok, fã wo, ogon gabgab wale fen, fonõ ule.”

<sup>25</sup> Age ye mog bagai, ĩ fã ye, idi wagedin ifaren, yogon yenen gabgab yale, Negur yana yalesef, fonõ ilen.

<sup>26</sup> Ganan terē de fen, Negur yana dalesen. Idi waud bun terefeit ye fen, diron, “Ada gama tobonunã fire bagai tailer.”

### *Jesus Lewi Iweignen*

*(Matyu 9:9-13; Mak 2:13-17)*

<sup>27</sup> Enei bure fel fen, Jesus ile, takis yaleya tamo yana Lewi, an yogon takis yaleya fõ bun ibod mog, ilen. Jesus ĩ irokenen, “Aya dõ wiya.”

<sup>28</sup> Age ye di, Lewi fã ye, ereb ereb adok itor yen, Jesus dõ fiyen.

<sup>29</sup> Agef fen, Lewi yogon fõ bun, Jesus nē saaf odug yabi di, takis yaleya tamo musei, tunĩ geid weim saaf don.

<sup>30</sup> Anĩ ere, Farisia tamo, idi neid lo ifelnēdiya tamo geid, Jesus nē dõ fiya tar bun nauseir den, “Ã ere nigin takis yaleya tamo, mosor adodo geid, saaf ado naan wõgef?”

<sup>31</sup> Jesus idi aitedin yale iron, “Dagi sã anidim dokta nigin waud to yenēdig, dagi adodom dogol.

<sup>32</sup> Aya madur tamo anidi iweignēdiya nigin to asin, mosor adodo tamo anidi waud falei douf nigin asin.”



*Kuriya Nigin Jesus To Difyen*  
(*Matyu 9:14-17; Mak 2:18-22*)

<sup>33</sup> Farisia tamo idi ï dirokenen, “Jon nē dō fiya tar, idi kuri de fen, kosē dedig, Farisia tamo neid dō fiya tar idig age fiya, anī ere, ogon idi dobu dirak.”

<sup>34</sup> Jesus aitedin yale iron, “Mois ï fau ne tā tar weim dibod mog, ã ne tā tar idi kuriya nigin urokenēdigouf anī kisi feleya de?”

<sup>35</sup> Anī ere, naa fau isi di, anī bun mois tamo idi bun tamal yalelnē di, naa anidi bun idi kuri douf.”

<sup>36</sup> Jesus yaab od enei idi irokenēdin, “Taka nem gabar masak mata serek fe fen, gabar tubu bun to iwadig. Ì age fouf are, ï gabar mata anī serek fouf, takag, gabar mata bun tamal masak are tubu anī ado to susu falauf.

<sup>37</sup> Takag, taka nem wain mata meme gabar\* tubu bun to itinēf. Ì age fouf are, wain mata anī, meme gabar gē ye fen, serek fouf. Age fe di, wain anī oho yeis fen, meme gabar sane lauf.

<sup>38</sup> Age fiya sã, wain mata, meme gabar mata bun itinēf.

<sup>39</sup> Agef fen, taka nem wain tubu yakas fen, mata to orodig, ere nigin, ï irok, “Tubu are de biya.’ ”

## 6

*Jesus Ì Sabat Naa Nē Odug*  
(*Matyu 12:1-14; Mak 2:23-3:6*)

<sup>1</sup> Sabat naa taka bun, Jesus in dō fiya tar geid, wit kabī atu diyok dile fen, in dō fiya tar wit biya

---

\* **5:37:** Juda neid tobonunã, idi meme gabar nem darum diwadig.

tunĩ fito difen, imeid bun orok de fen, nedi ilo don.

<sup>2</sup> Farisia tamo tunim to difen, “Ă ere nigin Sabat naa bun ităfiya ufoduleg fen, tobonunã enei ago gef?”

<sup>3</sup> Jesus aitedin yale irokenēdin, “Sain Dawid, ne tã tar geid naũ fedi di, age fen anĩ, ã to uwesegen de?”

<sup>4</sup> Ī Negur nē fō namen ile fen, bret fateul prisem dogol dōdig\* an ibodon anĩ yokon, ĩ bret tunĩ ne tã tareg ifenēdin.”

<sup>5</sup> Age ye fen, Jesus idi irokenēdin, “Tamo Naal ĩ Sabat naa nē Odug.”

<sup>6</sup> Sabat naa taka bun, ĩ Juda neid uub fō bun ile, biya od ifelnēdin, sain anĩ bun, tamo taka ima biya melem gege fefu fiya anĩ an ibodon.

<sup>7</sup> Farisia tamo, lo ifelnēdiya tamo geid, idi Jesus bouwa bun od dinouf nigin naab dimiren, anĩ nigin, idi ĩ Sabat naa bun dagi el fe mog, mailauf de fen, ololo difen.

<sup>8</sup> Anĩ ere, Jesus idi neid kisi kelei ken, tamo ima gege fefu fiya anĩ irokenen, “Fã wo fen, ganan meleid bun ufar.” Age ye di, ĩ fã yale, an ifaren.

<sup>9</sup> Age fe di, Jesus idi irokenēdin, “Aya ã to ayeik, nanĩ anĩ Sabat naa bun lo dō fiya? Biya age fiya anĩ de, sane age fiya anĩ, oo, isennē di, mata ibodōya anĩ de, daũ fiya anĩ?”

<sup>10</sup> Jesus idi ganan fele feid le fen, tamo anĩ irokenen, “Imã yaĩ wo.” Ī yaĩ fe di, in ima oditekei biya len.

---

\* **6:4:** Lo bun, bret fateul anĩ, prisem dogol dōdig.

11 Anĩ ere, idi waud fatuk sane fen, mogo Jesus naig tafiyēf de fen, dogo tutur katō difen.

*Jesus Aposel Tuwelf Igirnēdin*  
(*Matyu 10:1-4; Mak 3:13-19*)

12 Anĩ sain bun naa taka, Jesus arein kosē youf nigin iselen, bō anĩ bun Negur kosē fiyen.

13 We fele di, bonime, Jesus in dō fiya tar wagen iweig laisi fen, idi atun tuwelf geif fen, idi anidi aposel wowā douf nigin igirnēdin.

14 Simon (Jesus ĩ yana yun Pita), in tura Endru, Jems, Jon, Filip, Batolomyu,

15 Matyu, Tomas, Jems Alfeus naal, Simon ĩ anĩ Selot\* taka,

16 Judas ĩ Jems naal, Judas Iskariot, inim dum Jesus kiwai imeid bun inenen.

*El Fiya Ado Malalon*  
(*Matyu 4:23-5:12*)

17 Jesus idi geid weim disil, teneub uus bun difaren. In dō fiya tar musei ado, tamo kayau musei biya, Judia distrik kalilĩ fiya ganan temeleid, Jerusalem temeleid, Taia Saidon taun ado neid ubun temeleid, an difaren,

18 tamo kayau anidi Jesus karĩ difiyē fenē nigin ado, idi neid dagi el fediyouf nigin, disin. Idi kaa sesenem morō difenēdin are el fedin.

19 Tamo kayau ganan ĩ kobũ difiyē fenē age difen, ere nigin, megeir ĩ bunem isi fen, idi ganan el fedin.

20 Jesus in dō fiya tar lo fiyeid fen, iron:  
“Ā aib maleg are el yeik,

---

\* **6:15:** Juda neid kusĩ mala taka, idi Rom gawaman ado kusĩ dedig.

ere nigin, Negur nē tano are āgenei.

21 Ā gama naū ufaregef are el yeik,  
ere nigin, ā nameĩ isokosauf.

Ā gama maruĩ isif are el yeik,  
ere nigin, ā kasā gouf.

22 Tamo Naal nigin, tamo kayau sane diyeik,  
diruyei ken, kono diyeik,  
ā yeneĩ sane dile fen, to orodif are,  
Negur ā el yeik.

23 “Naa anĩ bun, wauĩ kulĩ ye fen, wauĩ al fouf,  
ere nigin, āgenei mala solo odug oun saa ilun  
ibodok. Ere nigin, temeid tar profet nigin de age  
difedin.

24 “Anĩ ere, safineĩ ado ā meleĩlon ado,  
ere nigin, āgenei wauĩ isenneĩya mogo  
walegel.

25 Nameĩ gama isokosef ā meleĩlon ado,  
ere nigin, ā naū ulagauf.

Gama kasā gef ā meleĩlon ado,  
ere nigin, ā fau wauĩ gudũf fen, maruĩ isiy-  
ouf.

26 Ā nigin tamo ganan biya de fen, wogō def ā  
meleĩlon ado,  
ere nigin, temeid tar idegēya profet nigin de  
age difedin.

*Kiwai Tar Nigin Wau Laa Fiya*  
(Matyu 5:38-48; 7:12a)

27 “Anĩ ere, ā aib aya karĩ wiyagef anĩ aro-  
keneik: Āgenei kiwai tar nigin wauĩ laa fouf, ā  
kiwai difeneik anidi nigin biya ago gouf.

28 Idi ā disisneik el fiya wenēdig, idi ā to biya  
diyeik anidi nigin kosē gouf.

<sup>29</sup> Tamo taka ogon walã sitakã fakã foug, falei wel, walã sitakãg wenē. Tamo taka ogon saket yalouf are, ogon kolos yalouf nigineg to katū wiyē.

<sup>30</sup> Wenēdiyof nigin to diyok are, wenēdiyof, aib taka ogon safinã yalef are, anī baban kel yaleya nigin to urokenēf.

<sup>31</sup> Ereb taka idim age difekeneif anī oroyeik age fiya gen, āg idi bun ago gouf.

<sup>32</sup> “Idi ā nigin waud laa fef anidi nigin dogol wauī laa fef are, ā nigin ere mala ado? Mosor adodo idig, idi nigin waud laa fef anidi nigin, waud laa fedig.

<sup>33</sup> Idi ā nigin biya diyeik anidi nigin biya ago gouf are, ā nigin ere mala ado? Mosor adodo idig age difedig.

<sup>34</sup> Idi anidi bun moni kel walogouf nigin kisig fen, moni wenēdigouf are, ā nigin ere mala ado? Mosor adodo idig, moni ganan kel yaleya nigin kisi de fen, mosor adodo tutur moni difenēdidig.

<sup>35</sup> Anī ere, āgenei kiwai tar nigin wauī laa foug, idi nigin biya ago wedigouf, ereb taka kel yaleya nigin to kisig fen, wenēdigouf. Ago gouf are, āgenei mala solo odug biyauf, agef fen, ā Negur Ilun Bagai nē gere tar wowã gouf, ere nigin, Negur ī idi to de difiyēdig sesen anidi ado, biya fiyēdidig.

<sup>36</sup> Āgenei Temeī wau yūdig gen, āg idi nigin wauī ineif.

*Ne Tã Es Fiyēya*  
(Matyu 7:1-5)

<sup>37</sup> “Taka to es wiyëg, to ago gouf are, ãg Negur to es yeïf. Taka bouwa bun od to ùg, to ago gouf are, ãg Negur bouweï bun od to yūf. Mosor nigin wedereï tu kalauf, ago gouf are, Negur ãgenei mosor nigin weder tu kalauf.

<sup>38</sup> Wenëdig, ago gouf are, Negur ifeneïf. Ima su karikauf, lai fesil fen, baban teten ino isokose di, yokū fe di, awa gere fasauf, ã nigin gogū fouf. Tunī es wedigef gen, Negur ãg agef es yeïf.”

<sup>39</sup> Jesus yaab od eneig irokenëdin, “Mala ifofakeleya tamo taka, mala ifofakeleya tura itonëya kisi feleya de? Idi urom bebeigir to kuku douf de?

<sup>40</sup> Skul kesu in tise to wal fef, anī ere, taka ī keleï ganan yalef, yogon tise gen wō youf.

<sup>41</sup> “Õ ere nigin turã mala teteur lo fen, õ ogon aa masak malã bun ibodok anī to ulef?

<sup>42</sup> Õ ogo aa masak ogon malã bun to ule fen, naig fe di, turã nigin dogol urokenek, “Turau, utor len, aya ogon malã teteur alelkonõf”? Õ mala yaleya tamo, õ ogon malã bun ketem aa masak walel fen, anī malã kare kele di, turã bun mala teteur walelauf.

*Aa Taka Yogon Faat Ado  
(Matyu 7:16-20; 12:33-35)*

<sup>43</sup> “Aa biya ī faat sane to imadig, aa sane are faat biya to imadig.

<sup>44</sup> Aa mugu mugu yogon faat bun, tamo ī keleï youf. Tamo kayau idi, wei biya barik bun to daledig, gira udum bun to daledig.

<sup>45</sup> Tamo biya ī, yogon wau bun ereb biya kuru fedig anī bunem, tobonunã biya yaor fedig, age fiya gen, tamo sane, yogon wau bun ereb sane

kuru fedig anī bunem, tobonunã sane yaor fedig. Yogon wau bun isokosef, yogon sigor bun wogõ yedig.

*Fõ Inoya Nē Keleĩ Tamo, Neneya Tamo Ado  
(Matyu 7:24-27)*

<sup>46</sup> “Ere nigin ã aya nigin ‘Odug, Odug,’ ge fen, aya orok anī to ago gedig?

<sup>47</sup> Taka ĩ wageun isi, neu od karĩ ye fen, dõf age fef, ĩ naig fiya anī aya ã afelneif.

<sup>48</sup> ĩ fõ inoya tamo taka, ku fatuk yale fen, meein teten fõ gariya inon gen. Sain kuwei isin, wĩ ye fen, fõ yun, anī ere, fõ anī yokũ fiya kisi feleya sã, ere nigin, fõ are total ado inon.

<sup>49</sup> Anī ere, taka ĩ neu od karĩ ye fen, to dõf age fef, ĩ tamo taka teneub bun fõ gariya sã inon gen. Sain kuwei wĩ ye fen, fõ yun, fõ anī kala fel, oditekei daũf irailen.”

## 7

*Kusĩ Tamo Neid Orowa Nē Momoiya  
(Matyu 8:5-13)*

<sup>1</sup> Jesus tamo kayau karĩ douf nigin enei ganan wogõ bure fel fen, ĩ Kapenaum taun ilen.

<sup>2</sup> An kusĩ tamo neid orowa nē ferfer taka, in odug ĩ nigin wau laa fedig anī, dagi fen, laa fou fenē age fen.

<sup>3</sup> Kusĩ orowa Jesus nigin karĩ ye fen, Juda neid mudur adodo Jesus garan susur fedĩ di, ĩ isi fen, yogon ferfer el fiyēf nigin to difiyen.

<sup>4</sup> Idi Jesus garan disĩ fen, total bagai digonen, “Tamo enei, õ enĩ agouf nigin kisi feleya bagai,

<sup>5</sup> ere nigin, ï nemã tamo kayau nigin wau laa fedig, nemã uub fõg inon.”

<sup>6</sup> Anĩ nigin, Jesus idi geid dilen.

Ï mogo fõ sirin mog, kusĩ orowa ne tã tar Jesus dirokenēf nigin sur fedin, “Odug, õ kabĩ total to walouf, ere nigin, aya to biya nigin aya kisi afef, õ neu fõ bun to usiyouf.

<sup>7</sup> Aya to biya nigin, aya õ garan isiya nigineg to kisi afen. Anĩ ere, õ od urõ di, neu kabĩ tamo dagi fara falauf.

<sup>8</sup> Ere nigin, aya yug nigin age fiya, ayag neu odug anĩ farumen abodok, kusĩ tamo idig aya farumeun dibodok. Aya taka enĩ arokenek, ‘Ule,’ afiyek, ï ilauf. Aya taka arokenek, ‘Õ usi,’ au di, ï isidig. Neu kabĩ tamo enĩ ago afiyek, ï anĩ age fedig.”

<sup>9</sup> Kusĩ orowa od enĩ irõ di, Jesus karĩ ye fen, ï nigin terē yen, agef fen, tamo kayau dõ difiyen anidi bun falei yel iron, “Aya ã arokeneik, aya Israel bun, momoiya odug eig fiya taka to ailen.”

<sup>10</sup> Age ye di, kusĩ tamo sur fedin anidi, fõ bun ke de dile fen, ferfer anĩ dagi sã ibod mog, fotou difen.

### *Jesus Kayau Waab Taka Nē Kesu Turĩ Fen*

<sup>11</sup> Anĩ dumen, Jesus taun taka Nain ilen, in dõ fiya tar, tamo kayau musei, ï geid weim dilen.

<sup>12</sup> Ï mogo taun bobog kelē fiyē mog, laa tamo taka faali de disin, laa tamo anĩ kayau waab nē kesu tekelei bagai, tamo kayau musei taun temeleid kayau waab geid.

<sup>13</sup> Sain Jesus kayau waab anĩ fele fiyen, in wau ï nigin gudũf fen, iron, “To inã wale.”



<sup>14</sup> Age ye fen, ĩ isel, dege kobũ fe di, faali difen idi, dē delen. Ĩ iron, “Tamo gaũ, aya õ arokonok, fã wale!”

<sup>15</sup> Laa tamo anĩ fã ye ibod ken, od yen, age fe di, Jesus tamo anĩ ĩ sina kel ifenen.

<sup>16</sup> Age fe di, idi ganan kumĩ ado terefeit de fen, Negur yana dalesen. Idi diron, “Profet odug taka, ada atun wõ yel. Negur yogon tamo kayau isennēdiyof nigin isil.”

<sup>17</sup> Jesus nigin, od enei Judia distrik kalilĩ fiya ganan iyokelen. Jesus,

*Jon Naan Igunēdiya Tamo Ado  
(Matyu 11:2-19)*

<sup>18</sup> Jon nē dõ fiya tar, enei ganan nigin Jon dirokenen. Jon idi uru iweigneĩd fen,

<sup>19</sup> Odug eig de to difiyēf nigin sur fedin, “Tamo isiyof den, õ ogo yeir de, amã fau taka nigin malamã manouf?”

<sup>20</sup> Tamo Jesus garan disu diron, “Jon Naan Igunēdiya Tamo, õ to mayõf nigin amã sur famam, “Tamo isiyof den, õ ogo yeir de, amã fau taka nigin malamã manouf?’ ”

<sup>21</sup> Sain anĩ bun bagai, Jesus, tamo kayau musei dagi adodo, darau adodo, kaa sesenem dirounēdin el feid fen, meleid ifofakeleya el fedu di, kelē den.

<sup>22</sup> Jesus solof irokenēdin, “Kekug uleg fen, ã wedereim karĩ gel, meleim ulegel anĩ Jon wogõ wiyēg, meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karĩ def, gare den turĩ fedif, maleg bun biya od wogõ fedif.

23 Tamo aya nigin wau to firagagaũ fef, Negur ã el fiyek.”

24 Jon nẽ arũ tamo ditornẽ dilele di, Jesus, tamo kayau guru difen anidi, Jon nigin irokenẽdin, “Ã ere bagai anĩ ulogouf nigin, gerere tuan ulegen? Ã unin yaum walala fe di, ulogouf nigin ulegen de?”

25 Anĩ sãf are, ere bagai ã ulogou fenẽ, ulegen? Tamo taka kolos biya bagai ifonun de? Sã, idi kolos medeĩya biya difoun ken, safneid inid adodo are, king nẽ fõ bun dibodok.

26 Ere bagai anĩ ã ulogou fenẽ, ulegen? Profet taka de? Ariya, aya ã arokeneik, ã profet wal fediya.

27 Tamo anĩ, ã nigin eig ye itoton:

“ ‘Aya neu arũ tamo sur afe di, ã uyu ilauf, im ket ogon naab dodok fouf.’\* ”

28 Aya ã arokeneik, kayau onudi kesu dalen idi atun, taka nem Jon to wal difiyen, anĩ ere, aib taka Negur nẽ tanon yana naal bagai ado, ã Jon wal fiya.”

29 (Tamo kayau ganan, takis yaleya tamog, sain idi Jesus nẽ od karĩ de fen, Negur nẽ naab anĩ biya den, ere nigin, idi Jonem naan igunẽdin.)

30 Anĩ ere, Farisia tamo, lo keleĩ tamo geid, idi dogo nigin Negur nẽ oroya ditoron, ere nigin, idi Jonem naan to igunẽdin.)

31 “Tamo kayau sain enei bun, idi nigin ere bunem aya kisi afouf? Idi ere gen?”

---

\* 7:27: Malakai 3:1

<sup>32</sup> Idi simõ maket modoũ bun dibod ken, abob diweignẽdidig gen:

“ ‘Amã ã nigin kelel maun,  
anĩ ere, ã to kui gen;

amã kanon seg malen,  
anĩ ere, ã to inã walegen.’

<sup>33</sup> Aya enei wogõ auf, ere nigin, Jon naan igunẽdiya tamo isin, bret to yon, wain to yon, ã urõgef, ‘Ĩ kaa sane ado.’

<sup>34</sup> Tamo Naal isin, saaf yon, naan yon, ã urõgef, ‘Eĩ dobu irãya tamal, ĩ, takis yaleya tamo, mosor tamo adodo geid, uyu kũ difedig.’

<sup>35</sup> Anĩ ere, kisi biya ĩ, in dõ fiya ganan bunem, biya yaorouf.”

### *Mosor Kayaum Jesus Bun Moul Fi Felen*

<sup>36</sup> Farisia tamo takam, Jesus ĩ ado saaf dãf nigin iweignen, anĩ nigin, Jesus ĩ Farisia tamo anĩ nẽ fõ bun ile fen, tebol bun ibodon.

<sup>37</sup> Taun anĩ bun, kayau taka mosor ado ibodõdig, Jesus Farisia tamo anĩ nẽ fõ bun, saaf yoko yeya karĩ ye fen, kayau, moul sumeĩ biya bagai anĩ gulub\* ado irou isin.

<sup>38</sup> Kayau ĩ Jesus dumen ye garan ifar, maru isi fen, Jesus ye lũ fen. Agef fen, kayau yogon fatiyam Jesus ye waĩf, umã fe, moul sumeĩ biya bagai, ye bun fi felen.

<sup>39</sup> Sain Farisia tamo Jesus iweignen anim, enei ile fen, ĩ yogo kisi bun iron, “Tamo enei profet takauf, ĩ aibem kobũ fiyek, ĩ ere kayau, ĩ mosor kayau taka anĩ, keleĩ youf.”

---

\* **7:37:** Meein alabasta nem dinon.

<sup>40</sup> Jesus ï irokenen, “Simon, aya ereb taka arokonõf.”

Ï iron, “Tise, urokana.”

<sup>41</sup> Jesus iron, “Tamo uru, moni tamo taka bun wareg dalen, taka faif tausen kina, taka faif handred kina.

<sup>42</sup> Idi urom wareg ifenëya moni sã, anĩ nigin, moni tamo dogo neid wareg gudũ felen. Gama nanim anĩ, moni tamo nigin wau fatuk laa fouf?”

<sup>43</sup> Simon solof iron, “Aya kisi afef, taka ï wareg odug yalen anĩ gudũ fel kenen anim.”

Jesus iron, “Õ tutuk es wol.”

<sup>44</sup> Age ye fen, Jesus falei yel, kayau wage ifen ken, Simon irokenen, “Õ kayau enei ulef? Aya ogon fõ bun asil. Õ yeu kulo fiya nẽ naan taka to wanal, anĩ ere, kayau ï yogon marum yeu lûf fen, yogon fatiyam waĩ fel.

<sup>45</sup> Õ to umã wiyal, anĩ ere, kayau enei, aya asour alel sain bun, ï yeu umã fel anĩ, fau fau umã fiyek.

<sup>46</sup> Õ mudurou bun moul to unol, anĩ ere, kayau ï moul sumeĩ biya bagai, yeu bun fi felel.

<sup>47</sup> Anĩ nigin, aya õ arokonok, kayau enĩ nẽ mosor musei yalelel, anĩ nigin, ï fatuk wau laa fen. Anĩ ere, aib taka mosor naal yalelen, ï wau laa fiya naal.”

<sup>48</sup> Age ye fen, Jesus kayau irokenen, “Ogon mosor alelkonok.”

<sup>49</sup> Tamo Jesus geid dibodon, tutur dogo dogol diron, “Eĩ aim, ï mosoreg yalelef?”

<sup>50</sup> Jesus kayau anĩ irokenen, “Ogon momoiya anim isennom, waũ inosiya ado ule.”

## 8

*Faat Irarãya Tamo Nē Yaab Od*  
*(Matyu 13:1-23; Mak 4:1-20)*

<sup>1</sup> Anĩ dumen, Jesus taun ado fonō fonō iyo ken, Negur nē tano nigin, biya od wogō yen. In dō fiya tar tuwelf weim,

<sup>2</sup> kayau tunĩ idi kaa sesen iruid fen, dagi el fedin idig weim: Maria (Magdala tamal) ĩ bun kaa sesen sewen irudi di, diyan,

<sup>3</sup> Joana Kusa nē kayau, Kusa ĩ Herod nē fō lo fiya tamo, Susana, musei tunĩ geid. Kayau eneidi, idi neid safineid nem disenñedin.

<sup>4</sup> Tamo kayau taun ganan bun temeleid, Jesus garan disisi, moku de mog, ĩ yaab od enei iron,

<sup>5</sup> “Kabĩ marau taka, faat irarāf nigin ilen. Sain ĩ irarak ile mog, tunĩ naab luwen kuku ren, are teten diyon, ninã ilun temeledim dakasin.

<sup>6</sup> Tunĩ meein tuar kuku ren, are bali fokū yeid fen, laasi yedin, ere nigin, idi lumi sã.

<sup>7</sup> Faat tunĩ malū duri atun kuku ren, are malū duri, faat anĩ ado, odudug fen, malū durim sile feledin.

<sup>8</sup> Faat tunĩ teneub biya bun kuku ren, are fokū yedin, biya imadin, gariya tekelei yogon biya wan handred iman, biya anim gariya anĩ wal fiya.”

Sain ĩ enĩ wogō ye fen, ĩ iweig iron, “Taka ĩ kariya nigin weder ado, ĩ karĩ youf.”

<sup>9</sup> In dō fiya tar, yaab od enĩ nē gariya nigin, ĩ to difiyen.

<sup>10</sup> Jesus iron, “Negur tano nigin, iminēya od nē keleĩ are, Negur ã mogo ifenein, anĩ ere, tunĩ bun aya yaab od nem wogō auf, anĩ bunem,

“ idi meledim diledig, anĩ idi meleid fokõya sã,  
 idi wederedim karĩ dedig, anĩ idi gariya keleĩ  
 sã.’\* ”

<sup>11</sup> “Yaab od anĩ nẽ gariya eig fiya. Faat are  
 Negur nẽ od.

<sup>12</sup> Faat tunĩ naab luwen kuku ren are, tamo idi  
 od karĩ den, Satan isi, biya od idi namedin ibodok  
 anĩ yaleledig, anĩ bunem, idi to momoi de di, to  
 isennēdiyof.

<sup>13</sup> Faat tunĩ meein tuar iraran are, tamo idi  
 od karĩ de fen, waud bun kulĩya ado od daledig,  
 anĩ ere, idi warumutei sã. Idi sain naal bagai  
 momoi def, anĩ ere, kisi fiya isi di, fara furu de  
 diyaleledig.

<sup>14</sup> Faat malũ duri atun kubũ yen are, tamo idi  
 od karĩ den, anĩ ere, idi diyok dile mog, tenebur  
 mata ibodõya nẽ suwẽya, safina ado ibodõya nẽ  
 kisi, bouwa nẽ oroya anidim idi sile fedĩ di, idi  
 faat to yũf.

<sup>15</sup> Anĩ ere, faat teneub biya bun kubũ yen are,  
 tamo idi, kisi biya, karĩya biya ado, waud bun  
 ibodok, od karĩ de fen, kafĩ difelef, anĩ total  
 difaref, faat biya yũf.

*Lam Yoki Bun*  
*(Mak 4:21-25)*

<sup>16</sup> “Taka nem lam tõf fen, mis kur be, fatar  
 farumen to inodig. Age fiya ban, ã yoki bun  
 iseginẽ di, idi aaben disif, lalan dilouf.

<sup>17</sup> Ereb ererb ganã iminẽya yenek anĩ ganã  
 yaor fouf, ererb ererb ganã nar fen yenek anĩ

---

\* **8:10:** Asaia 6:9

ganan irou isi, biru fel fen, yaau du fe di, keleĩ youf.

<sup>18</sup> Anĩ nigin, ã kisi el ge waleg fen, ã karĩ gouf. Aib taka ã ado, aya toru afouf, age fe di, ã musei adouf. Taka ã sã bagai, ereb taka ã ado nigin ã kisi fef areg, ã bun tamal son fouf.”

*Jesus Nē Sina, Tura Tar Geid  
(Matyu 12:46-50; Mak 3:31-35)*

<sup>19</sup> Jesus nē sina, tura tar geid, ã dilouf nigin disin. Anĩ ere, idi ã wagen ileyã kisi feleyã sã, ere nigin, tamo kayau musei.

<sup>20</sup> Takam Jesus irokenen, “Ogon sinã, turã tar geid, õ dileyõf nigin serẽ difaref.”

<sup>21</sup> Jesus solof iron, “Neu naai ado turau tar, are idi Negur nē od karĩ de fen, dõ difef anidi.”

*Jesus Yau Uyẽ Ado Irokenēdi Di, Kee Delen  
(Matyu 8:23-27; Mak 4:35-41)*

<sup>22</sup> Naa taka bun, Jesus in dõ fiya tar irokenēdin, “Ada daliyou sitakã talauf.” Anĩ nigin, idi waag bun sõ de dilen.

<sup>23</sup> Idi solĩ de mog, Jesus mulaĩ yenen. Yau odug daliyou bun isi di, maaĩ waag namen isokosen. Idi morõ odug fotou difen.

<sup>24</sup> In dõ fiya tar dile, Jesus turĩ difiyẽ diron, “Odug, Odug, ada naanũ talalau fenē!”

Ĩ fã yale, yau naan moloun wĩ yen ado, sakã fiyēdi di, yau uyẽ ado irorou kel, ganan dẽ delen.

<sup>25</sup> Jesus in dõ fiya tar to fiyēdin, “Āgenei moiya nain?”

Idi kumĩ terẽ de fen, abob toti difen, “Eĩ aim bagai? Ì yau ado naaneg irokenēdi di, ì ait dō difef.”

*Jesus Tamo Taka Kaa Sesen Musei Ado El Fiyen  
(Matyu 8:28-34; Mak 5:1-20)*

<sup>26</sup> Idi Galili tamal daliyou dibal, Gerasa teneub bun dilen.

<sup>27</sup> Sain Jesus ubun kutũ yesin, taun anĩ bun tamal, tamo taka kaa sesen ado ì tarabã fiyen. Sain meluk, tamo enei kolos sã, fõ buneg to ibodōdig, anĩ ere, ì matmat bun ibodōdig.

<sup>28</sup> Ì Jesus ile fen, kaĩ ye, Jesus ye gariyan kubũ ye, ì ait odugem iweig iron, “Õ aya ere naig wiyau fenē, Jesus, Negur Ilun Biya nē Naal? Aya õ agonok, õ aya to daig wiyauf!”

<sup>29</sup> Ere nigin, Jesus mogo kaa sane tamo anĩ bun tamal ulõ yesiyouf nigin irokenen. Sain musei kaa sanem ironē di, ye ima ado, sen nem difofādig, age de fen, tari difiyēdig, anĩ ere, ì sen kokour fele di, kaa sanem wala ino di, moilin iledig.

<sup>30</sup> Age ye di, Jesus ì to fiyen, “Õ yana ai?”

Ì solof iron, “Aya yanau Ami,” ere nigin, kaa museim ì namen disilen.

<sup>31</sup> Idi ku isil idīya sã modoũ bun to sur fediyouf nigin, baba baban Jesus digonen.

<sup>32</sup> Arei wala sirin, bor musei biya an saaf doko difaren. Kaa sesen idi, bor namedin dilauf nigin, Jesus digonē di, Jesus idi yo fedin.

<sup>33</sup> Kaa sesen, tamo anĩ bun tamal ulolõ deis fen, bor namedin dilelen. Age dife di, bor gududu



de, bebeig sane baurin daliyoun disil, naanũ gare desin.

<sup>34</sup> Bor lo fiya tamo, ereb ereb wõ yen anĩ dile fen, diya dile, od anĩ, taun ado fonõ fonõ wogõ den.

<sup>35</sup> Age dife di, tamo kayau, ereb wõ yen anĩ dilou fenẽ dilen. Sain idi Jesus garan disin, kaa sesen tamo anĩ bun tamal diyalelen tamo anĩ, garab yel, kisi biya ado, Jesus ye gariyan ibod mog, dile fen, idi kumĩ den.

<sup>36</sup> Tamo idi meledim dilen anidim, kaa sesenem tamo diroun anĩ, naig be el fiyen anĩ, tamo kayau wogõ difiyẽdin.

<sup>37</sup> Age dife di, Gerasa teneub bun, tamo kayau ganan, Jesus itorneĩd ilauf nigin, ĩ dirokenen, ere nigin, idi kumim lai fedin. Anĩ nigin, Jesus waag bun sõ ye fen, itornẽdin.

<sup>38</sup> Tamo ĩ bun tamal kaa sesen diyalelen anĩ, Jesus ado dilauf nigin igonen, anĩ ere, Jesus ĩ sur fiye ken, iron,

<sup>39</sup> “Fonõ kel ule fen, Negur õ nigin age fen anĩ wogõ wouf.” Age ye di, tamo anĩ itor ilen, Jesus ĩ nigin age fen anĩ, taun ganan bun iyo ken, wogõ yen.

*Kayau Naal Laa Fen Ado Dagi Kayau Taka  
(Matyu 9:18-26; Mak 5:21-43)*

<sup>40</sup> Sain Jesus kele di, tamo kayau musei, ĩ aan difiyen, ere nigin, idi ganan ĩ nigin ololo difen.

<sup>41</sup> Age de mog, Juda neid uub fõ lo fiya nẽ mudur taka, yana Jairus isi, Jesus ye gariyan kubũ ye fen, yogon fõ bun ileya nigin igonen,

<sup>42</sup> ere nigin, ï ne barai tekelei bagai, ï kayau naal tuwelf yar age fiya, mogo laa fou feně.

Jesus naab ile mog, tamo kayau musei kiti de fen, kafĩ difiyě genen.

<sup>43</sup> Kayau taka an ifaren, ogõ dagi faimud ado, yar tuwelf iyon. Anĩ ere, taka nem ï to el fiyen.

<sup>44</sup> Kayau ï Jesus dume ise, in kolos iri kobũ fen, age fe di, kaisã bagai, kayau ně naud segě yelen.

<sup>45</sup> Jesus to fen, “Aim aya kobũ fiyal?”

Idi ganan wa dife di, Pita iron, “Odug, tamo kayau musei kiti de fen, kobũ diyok

<sup>46</sup> Anĩ ere, Jesus iron, “Aibem aya kobũ fiyal. Aya keleĩ, total aya bun tamal ul fe yalel.”

<sup>47</sup> Age ye di, kayau ï imin ken, ileyã kisi feleyã san, tererě ye fen, isi, Jesus ye gariyan kubũ yen. Tamo kayau ganan meleid bun, ï ereb nigin Jesus kobũ fiyem ado, naig be ï kaisã bagai biya lel anĩ, wogõ yen.

<sup>48</sup> Age ye di, Jesus kayau irokenen, “Nau barai, ogon momoiya anim el yom. Waũ inosiya ado ule.”

<sup>49</sup> Jesus fau od wogõ ye mog, tamo taka, Juda neid uub fõ lo fiya mudur Jairus ně fõ bunem isin. ï iron, “Ně barai mogo laa fel. Baban õ tise morõ to weněf.”

<sup>50</sup> Jesus od enei karĩ ye fen, Jairus irokenen, “To kumĩ wo, momoi dogol wo, ago di, kayau fau el fiyěf.”

<sup>51</sup> Jesus Jairus ně fõ bun wõ ye fen, takam ï geid, aaben ileyã nigin katũ fedin, Pita, Jon, Jems ado, kesu ně tama sina dogol.

<sup>52</sup> Tamo kayau ganan, ï nigin waud gudũf fen, inã legur mog, Jesus iron, “To inã waleg. Kayau naal ï laa fiya sã, ï mulã yenek.”

<sup>53</sup> Idi Jesus kasã difiyen, idi keleĩ, kayau naal laa fel.

<sup>54</sup> Anĩ ere, Jesus ï ima yales fen, iron, “Neu kesu, fã wo!”

<sup>55</sup> Kayau nẽ uur kelen, age fe di, kaisã bagai, fã yale ifaren. Age fe di, Jesus, ï ereb taka ifen yõya nigin, idi irokenẽdin.

<sup>56</sup> Kayau nẽ sina tama terefeit de di, ereb wõ yel anĩ, taka to dirokenẽf nigin, Jesus idi katũ fedin.

## 9

### *Jesus In Dõ Fiya Tar Tuwelf Sur Fedin (Matyu 10:5-15; 14:1-12; Mak 6:7-29)*

<sup>1</sup> Jesus in dõ fiya tar tuwelf iweigneĩd fen, kuru fedin. Agef fen, ï, idi kaa sesen ganan dirudiyouf nigin ado, dagi el difediyouf nigin total ifeneĩd fen, megeir fedin.

<sup>2</sup> ï, idi Negur nẽ tano nigin wogõ douf nigin ado, dagi adodo el difediyouf nigin sur fedin.

<sup>3</sup> Jesus idi irokenẽdin, “Delẽ uyõgouf nigin ereb taka to walogouf, manig sã, faa sã, bret sã, moni sã, kolos uru to walogouf, tekelei dogol.

<sup>4</sup> Fõ nanĩ be bun sõ gouf, an ubodõg ile, taun anĩ utorõgouf.

<sup>5</sup> Tamo kayau ã to daleyeyi ken, ã to karĩ diyeĩf, sain ã nedi taun anĩ utorõg fen, yeĩ aas tu welege di, idi ã kiwai difenein anĩ keleĩf.”

<sup>6</sup> Anĩ nigin, idi fafã de, fonõ fonõ diyo ken, modoũ ganan bun, biya od wogõ de fen, tamo kayau dagi el difedin.

<sup>7</sup> Galili lo fiya nẽ mudur Herod, anĩ ganan wõ yef ilef anĩ, karĩ ye fen, wau togun, ere nigin, tunim dirok, Jon ã laa bun tamal mata kel fã yen,

<sup>8</sup> tunim dirok, Eliya wõ yen, age fe di, tunĩg dirok, profet kulu temeleid anidi taka mata kel fã yen.

<sup>9</sup> Anĩ ere, Herod iron, “Aya Jon ula gudũ afen. Enei aim, ã nigin karĩ auf?” Age ye fen, ã Jesus ileya nigin kisi fen.

*Jesus Faif Tausen Tamo Saaf Ifenẽdin*  
(*Matyu 14:13-21; Mak 6:30-44; Jon 6:1-14*)

<sup>10</sup> Sain aposel idi keku den, idi age difen anĩ Jesus wogõ difiyen. Age de di, Jesus idi geif irou, idi mugu diya, taun taka Betsaida dilen.

<sup>11</sup> Anĩ ere, tamo kayau musei anĩ kelei ken, Jesus dõ difen. Jesus idi aan fiyeĩd, Negur nẽ tano nigin wogõ fiyeĩd fen, idi dagi el fiya nẽ anidi el fedin.

<sup>12</sup> Aragau di, in dõ fiya tar tuwelf, ã gein disi diron, “Tamo kayau susur wo di, idi fonõ kalilĩ fiya fonõ fonõ dile fen, saaf ado yenẽya modoũ dilouf, ere nigin, ada ein gerere tuan tabodok.”

<sup>13</sup> Jesus aitedin yale iron, “Idi dãf nigin ereb ägem wenẽdigouf.”

Idi solo de diron, “Ada bret faif, gau uru ado dogol. Ada tele, tamo kayau enei ganan nigin saaf to na talouf, are kisi feleya sã.”

<sup>14</sup> (Faif tausen tamo age fiya an dibodon.)

Anĩ ere, Jesus in dõ fiya tar irokenēdin, “Tamo kayau, mala fire fire fifti age fiya bun, ubodnēdig.”

<sup>15</sup> In dõ fiya tar age dife di, ganan dibodadan.

<sup>16</sup> Jesus, bret faif gau uru ado yale, saa ilun itad fen, ĩ Negur de fiye ken, anĩ mumã fedin. Agef fen, ĩ in dõ fiya tar ifenēdin, tamo kayau wagedin gõ difouf nigin.

<sup>17</sup> Idi ganan don kisi felen. In dõ fiya tar, tamo kayau bret gau ado dokon, tunĩ ifaren anĩ fito difen, karam tuwelf isokosen.

*Pita Kristus Nigin Kurõ Fesin  
(Matyu 16:13-28; Mak 8:27-9:1)*

<sup>18</sup> Sain Jesus mugun kosē yen, in dõ fiya tar idi ĩ weim. ĩ idi to fedin, “Tamo kayau idi, aya nigin ai dedig?”

<sup>19</sup> Idi solo de diron, “Tunĩ dirok, Jon naan igunēdiya tamo, tunĩ dirok, Eliya, are tunĩg dirok, profet kulu temeleid anidi taka mata kel fã yen.”

<sup>20</sup> Jesus to fedin, “Ba ã uleg? Aya nigin ã ai gef?”

Pita aiten yale iron, “Õ anĩ Negur nē Kristus.”

<sup>21</sup> Age ye di, Jesus enei taka to dirokenēf nigin, idi wedereid total iron.

<sup>22</sup> Age ye fen, ĩ iron, “Tamo Naal ĩ darau musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ĩ dukesi di, naa towo bure fele di, mata kel fã youf.”

<sup>23</sup> Age ye fen, Jesus idi ganan irokenēdin, “Aib taka aya dõ fiyau fenē, ĩ yogon oroya dudum fe fen, yogon aa tetek, naa ganan faali fe, aya dõ fiyau.

<sup>24</sup> Aib taka, yogon bouwa buru, mata ibodōf nigin oro fef, are fō yalauf, anī aib taka yogon mata bouwa buru, aya nigin ye fen, irailauf, are kel yalouf.

<sup>25</sup> Tamo taka ī teneub enī ganān kakarai fe, akorou ye fen, ī yogo bou fō yalauf be irailauf, ere biya ī yalouf?

<sup>26</sup> Aib taka, aya nigin ado neu od nigin, mama fouf are, sain Tamo Naal, in fula fiya medeīya, Tama nē ado, engel fateul neid fula fiya medeīya ado disiyouf bun, īg ī nigin mama fouf.

<sup>27</sup> Aya ā momoi arokeneik, tunī ein difaref, fau to gare de mog, idi Negur nē tano dilouf.”

*Jesus Bouwa Falei Felen*  
(*Matyu 17:1-8; Mak 9:2-8*)

<sup>28</sup> Jesus enei irokēl fen, naa eit age fiya ilele di, ī, Pita, Jon, Jems yale, kosē youf nigin arei ilun diselen.

<sup>29</sup> Ī kosē ye mog, yogon nawa falei felen, agef fen, yogon kolos, kolimei filiya nē lalan gen, wō yen.

<sup>30</sup> Tamo uru, Moses Eliya ado,

<sup>31</sup> fula fiya medeīya ado wowā de fen, Jesus geid wogō den. Idi Jesus teneub itorōf anī nigin wogō den, anī ī Jerusalem oun kisi falauf.

<sup>32</sup> Pita ī, ne tā tar geid, mulā nigin meleid morō kelen, anī ere, idi oditekei meleid bi fel fen, idi Jesus nē fula fiya medeīya ado, tamo uru ī geid difaren anī dilen.

<sup>33</sup> Tamo idi Jesus ditornē mog, Pita Jesus iro-kenen, “Odug, ada ein ibodōya nigin biya bagai. Ada salafat towo tanouf, taka ogon, taka Moses

nē, taka Eliya nē.” (Ī wogō yen anī, ĩ yogo keleĩ sã.)

<sup>34</sup> Age ye mog, lalo isi, idi kerub fedi di, idi lalo bun dilel mog, kumĩ den.

<sup>35</sup> Ait taka lalo bunem wō ye fen, iron, “Eĩ neu Kesu, ayam ĩ agirnen. Ī karĩ wiyēg.”

<sup>36</sup> Ait anī wogō yele di, idi Jesus mugu dilen. In dō fiya tar anidi, enei dogo bun dogol ibodon, idi ereb dilen anī, sain anī bun, taka to dirokenen.

*Jesus Kesu Kaa Sane Ado El Fiyen*

*(Matyu 17:14-18, 22, 23; Mak 9:14-27, 30-32)*

<sup>37</sup> Naa taka bun, idi arein tamal disi mog, tamo kayau musei Jesus tarabã difiyen.

<sup>38</sup> Guru fiya atun, tamo takam iweig iron, “Tise, aya õ agonok, õ neu kesu ulekanauf, ere nigin, ĩ neu kesu tekelei bagai.

<sup>39</sup> Kaa sanem irounē di, ĩ terē adod ye, ui yedig. Kaa sanem kesu yũ irã di, tererē ye fen, awa bun sali moku fedig. Agef fen, kaisã to folō fiye kele fen, ĩ bouwa daũ fedig.

<sup>40</sup> Aya, on dō fiya tar kaa sane diruwauf nigin agonēdin, anī ere, idi kisi feleya sã.”

<sup>41</sup> Jesus solof iron, “Sain enei bun, tamo kayau momoiya sã, sane bagai. Sain ganī aya ã geid tabod ken, ã nigin wau aukesilau? Ogon kesu ein urousi.”

<sup>42</sup> Kesu anī isi mog, kaa sanem kesu tenebur yũ irã di, tererē yen. Anī ere, Jesus kaa sane ou fiyen, agef fen, kesu anī el fiye ken, ĩ tama kel ifenen.

<sup>43</sup> Age fe di, idi ganan, Negur nē megeir odug nigin terefeit den.

Idi ganan, Jesus age fen anĩ ganan nigin, terẽ de mog, Jesus in dõ fiya tar irokenẽdin,

<sup>44</sup> “Ereb aya arokeneĩf anĩ wedereĩ unog. Tamo Naal ĩ fau kiwai tamo imeid bun dinou fenẽ.”

<sup>45</sup> Anĩ ere, idi od enĩ nẽ gariya nigin nene den. Idi nigin gariya anĩ inokon, anĩ nigin, idi od anĩ to kelei ken, ĩ to fiyẽya nigin kumĩ den.

### *Ai Anĩ Odug Bagai?*

*(Matyu 18:1-5; Mak 9:33-40)*

<sup>46</sup> Jesus nẽ dõ fiya tar idi, aim anĩ idi atun odug ibodõf nigin, luwa diroun.

<sup>47</sup> Jesus idi neid kisi kelei ken, kesu naal taka yale iroule, ĩ sirin ifarnen.

<sup>48</sup> Agef fen, ĩ idi irokenẽdin, “Aib taka, aya yanau bunem, kesu naal eig fiya taka yalef are, ĩ aya yaleyaf. Aib taka ĩ aya yaleyaf are, ĩ aya sur fiyan anĩ yalef. Ā ganan atun, taka ĩ naal bagai are, ĩ anĩ odug bagai.”

<sup>49</sup> Jon iron, “Odug, tamo taka, õ yanã nem kaa sesen iruid mog, amã mailen. Anĩ nigin, amã ĩ katũ mafiyẽf nigin age mafen, ere nigin, ĩ neda takam sã.”

<sup>50</sup> Anĩ ere, Jesus iron, “To katũ wiyẽg, taka ĩ kiwai to ifeneik, are āgenei.”

### *Samaria Tamo Kayau Jesus Kiwai Difenen*

<sup>51</sup> Jesus saa ilun yale irou iseleya nẽ naa dodole di, ĩ Jerusalem ileya nigin wau kuturolen.

<sup>52</sup> Age fe di, ĩ arũ tamo uyu sur fedi di, idi Jesus nẽ ereb ereb dodok fiya nigin, Samaria fonõ dilen.

<sup>53</sup> Anĩ ere, tamo kayau an to aan difiyen, ere nigin, ĩ Jerusalem ilauf nigin age fen.



54 Sain in dō fiya tar Jems Jon ado, anī dile fen, idi to difen, “Odug, õ amã yã saa ilun tamal maweig di, isi, idi daũ fediyouf nigin oroyok de?”

55 Anī ere, Jesus falei yel, ou fiyēdin,

56 age de fen, idi fonõ taka bun dilen.

*Jesus Dō Fiyēya Bun Kafī Fiya Fire Fire  
(Matyu 8:19-22)*

57 Idi naab luwe dile fen, tamo taka Jesus irokenen, “Õ narib ulauf are, aya õ dō ayõf.”

58 Jesus aiten yale iron, “Gaũ kuĩ idi, yenēya nē modoũ ku ado, ninã lalo bun diyok idi, uru ado, anī ere, Tamo Naal ĩ mudur inoya nē modoũ sã.”

59 Jesus tamo takag irokenen, “Dō wiya.”

Anī ere, tamo iron, “Odug, fau de, folõ wiya len, aya ele, neu dei mũ afel fen.”

60 Jesus ĩ irokenen, “Laa tamo idi, laa tutur abob mumã difouf. Anī ere, õ ule, Negur nē tano nigin wogõ wo.”

61 Baban takag iron, “Odug, aya õ dō ayõf, anī ere, folõ wiya len, kelau ele, neu ibor tar dabuo afiyeĩd fen.”

62 Jesus solof iron, “Taka ĩ dur bun ima ino fen, koriri yedig anī, Negur nē tano nigin kabī yaleya to kisi falauf.”

## 10

*Jesus In Dō Fiya Tar Sewenti-tu Sur Fedin  
(Matyu 11:20-27; 13:16, 17)*

1 Anī dumen, Odug sewenti-tu tamo igrineĩd fen, idi, ĩ taun ganan ado modoũ ilauf nē bun, uyulil uru uru susur fedin.

<sup>2</sup> Jesus idi irokenēdin, “Kabier saaf musei biya bure felen, anī ere, kabī tamo musei sã. Age fiya nigin, kabī marau, Odug to wiyēg, kabī tamo sur fedi di, yogon kabier dilauf.

<sup>3</sup> Uleg! Aya ã sipsip naal gen, gaũ kuĩ atun sur ayeik.

<sup>4</sup> ã moni nē kodol be, faa be, su be to walogouf, agog fen, naab luwen taka to aan wiyēgouf.

<sup>5</sup> “Fõ taka aaben ulagauf, uruwa urõgouf, ‘Fõ enei wau inosiya ado.’

<sup>6</sup> Tamo taka wau inosiya nē anī an ibodõf are, ãgenei wauĩ inosiya ã bun ibodõf, sãf are, ã bun kel isiyouf.

<sup>7</sup> Fõ anī bun ubodõgouf, saaf ado naan yõya nigin idi difeneĩf, are wãgauf, ere nigin, kabī tamo ã mala solo yaleya kisi feleya. Fõ fõ to walegef uyõg.

<sup>8</sup> “Ã taun taka bun ulege di, idi ã aan diyeĩf, ã ereb wagein dinouf anī wãgauf.

<sup>9</sup> Dagi adodo an difaref, el wiyēdig fen, idi urokenēdigouf, ‘Negur nē tano mogo ã nigin melsã.’

<sup>10</sup> Anī ere, ã taun taka bun ulege di, idi ã to aan diyeĩf, naab toko tokõ ge fen, urõgouf,

<sup>11</sup> ‘Ãgenei taun nē aas yemã bun degē fen anīg, amã kema ã bun tu mafef. Anī ere, ã enei keleĩ youf bagai, Negur nē tano mogo melsã.’

<sup>12</sup> Aya ã arokeneik, es fiya naa anī bun, taun anī, in darau Sodom taun darau dalen anī wal fiya, yalouf.

<sup>13</sup> “Korasin taun, õ malalon ado! Betsaida taun, õ malalon ado! ã bun memelik musei anodin, age fiya gen anī, Taia ado Saidon taun bun wõ yem

are, mogo kulu waud falei de fen, wau gudū fiya nē gabar difoun ken, aasur dibodom.

<sup>14</sup> Anī nigin, es fiya sain bun, ā, morō Taia ado Saidon taun dalouf anī wal fiya, walougouf.

<sup>15</sup> Ō Kapenaum taun, ō yanā anī saa ilun iselauf de? Sā bagai, ō laa neid modoū bun usilauf.

<sup>16</sup> “Taka ī karī yeik, aya karī fiyaf, taka ī ā iruyeik, are aya iruyaf, anī ere, taka ī aya iruyaf, are ī aya sur fiyan anī iruf.”

<sup>17</sup> Sewenti-tu tamo idi, kulīya ado keku de, disi diron, “Odug, ō yanā bunem kaa seseneg morō di, dō difen.”

<sup>18</sup> Jesus solof iron, “Aya, Satan saa ilunem kolimei lalan gen kakur fen, kubū ye mog, ailen.

<sup>19</sup> Aya, ā, gogour, ambei lalai wedig fen, kiwai nē total ganan wal gouf nigin, megeir afenein. Ereb takam to tadū yeīf.

<sup>20</sup> Anī ere, kaa sigoramā dō difel ge fen, to wauī kulī youf, anī ere, āgenei yeneī saa ilun itoton nigin, wauī kulī youf.”

<sup>21</sup> Sain anī bun, Jesus, Awa Uur Fateul bunem, kulīya isokos fen, iron, “Dei, saa ado teneub nē Odug, aya ō yanā alesef, ere nigin, safina eneidi, kisi biya ado keleī adodo to dilouf nigin, ō unokon, ago fen, simō gen dibodon anidi bun yaor won. Dei, enī are ogon waū filolō fiya biya bunem agon.

<sup>22</sup> “Ereb ereb ganan, Dei ī aya bun inon. Taka nem Naal ī ai ya nigin keleī sā, Dei yogo dogol keleī. Taka nem Dei ī ai ya nigin keleī sā, Naal yogo dogol ado, tunī idi Naalum Dei ifelnēdiyof nigin igirnēdif anidim dogol keleī.”

<sup>23</sup> Age ye fen, Jesus falei yel, in dō fiya tar lo feid fen, idi dogol irokenēdin, “Meleim ã ulegedif anĩ dilef are el fedif.

<sup>24</sup> Ere nigin, aya ã arokeneik, profet musei, king geid, ã ulegef anĩ dilou fenē nigin waud yenen, anĩ ere, idi meledim to dilen, idi ã karĩ gef anĩ karĩ dou fenē nigin waud yenen, anĩ ere, idi wederedim to karĩ den.”

*Samaria Tamo Tobonunã Biya Ado Nē Yaab Od*

<sup>25</sup> Sain taka bun, lo keleĩ tamo taka fã ye fen, Jesus kisi fiyen. Ī Jesus to fiyen, “Tise, aya naig afe di, mata faimud ibodkeleya anĩ alouf?”

<sup>26</sup> Jesus ĩ irokenen, “Negur nē Itotoya bun Lo ere yef? Ō uwesedig anĩ, ere yōdig?”

<sup>27</sup> Lo keleĩ tamom Jesus solof irokenen, “ Ō, Odug ogon Negur ĩ nigin waũ adok, malākanon adok, ogon megeir adok, ogon kisi adok bunem, waũ laaf yenēf.\* Takag, ‘Ō ogo nigin waũ laa fef gen, nē tã nigineg ago waũ laa fouf.’\*\*”

<sup>28</sup> Jesus tamo anĩ irokenen, “Ō de tutuk solo wol. Enei ago di, ō mata ibodkeleya walouf.”

<sup>29</sup> Anĩ ere, lo keleĩ tamo ĩ, Jesus ĩ nigin keleĩ biya sã fiyēf anĩ itor ken, Jesus to fiyen, “Age fiyauf are, ai anĩ neu tã?”

<sup>30</sup> Jesus solof iron, “Tamo taka Jerusalem taun tamal Jeriko taun isil mog, bē tamo imeid bun ilen. Idi yogon kolos dinukeis dū di, laa gen yen mog, ditornē diyalelen.

<sup>31</sup> Sain anĩ bun, pris taka naab tekelei anĩ dōf isilen, tamo are de ile fen, ĩ fasis fe tokō felen.

---

\* **10:27:** Diuteronomi 6:5      \* **10:27:** Levitikas 19:18

<sup>32</sup> Age fiya gen, Lewi tamo takag modoũ anĩ bun isi, tamo are de ile fen, ĩ fasis fe tokõ felen.

<sup>33</sup> Anĩ ere, Samaria tamo taka iyok isin, tamo yenen nẽ isi, wõ ye, tamo anĩ ile fen, ĩ nigin wau yun.

<sup>34</sup> ĩ wagen ilen, moul wain ado gudũ fiya bun fi fel fen, ifokenen. Agef fen, tamo are yales, yogon donki teten ino irou ilen, tamo irouya fõ bun ino fen, kulatun fiyen.

<sup>35</sup> Naa taka di, ĩ tu silwa koin moni yalis, tamo irouya fõ marau ifen ken, iron, ‘Kulatun wiyẽf, sain aya kelauf bun, õ baban mala teten be uran, are aya kela afonõf.’

<sup>36</sup> “Õ kisi wof, towo eneidi atun, ai anĩ, bẽ tamo imeid bun ilen anĩ ĩ ne tã?”

<sup>37</sup> Lo keleĩ tamo solof iron, “Tamo ĩ nigin wau yun anĩ.”

Jesus ĩ irokeken, “Ule, ĩ age fen gen, ago.”

### *Marta Maria Ado Neid Fõ Bun*

<sup>38</sup> Jesus, in dõ fiya tar geid, naab luwe dile fen, Jesus fonõ taka bun wõ yen, an kayau yana Marta yogon fõ bun Jesus ilauf nigin, Jesus irokenen.

<sup>39</sup> ĩ tura yana Maria, ĩ anĩ, Odug ye gariyan ibod ken, ĩ wogõ yen anĩ karĩ yen.

<sup>40</sup> Anĩ ere, Marta ererb ererb dodok fiya anĩ bun kisi yen ken, Jesus wagen isi to fiyen, “Odug, neu turau itorna di, aya mugu kabĩ alef anĩ nigin, õ to kisi wof de? ĩ uroken, aya isenna!”

<sup>41</sup> Age ye di, Odug aiten yalen, “Marta, Marta, õ ererb ererb musei nigin suwẽ wo fen, waũ morok,

<sup>42</sup> anĩ ere, tekelei dogol õ nigin biya. Maria ĩ biya ani igirim, anĩ taka nem to yalelkenẽf.”

# 11

## *Jesus Kosēya Nigin Ifelnēdin* (Matyu 6:9-13; 7:7-11)

<sup>1</sup> Naa taka bun, Jesus modoũ taka bun kosē yen. Sain ĩ bure fele di, yogon dō fiya tamo takam Jesus irokenen, “Odug, amā kosēya nigin ufelnamā, Jon, ne dō fiya tar ifelnēdin gen.”

<sup>2</sup> Jesus idi irokenēdin, “Sain ā kosē gouf, eig ge urōgouf:

“ ‘Dei,  
ō yanā fateul ibodōf,  
ogon tano isiyouf.

<sup>3</sup> Naa mugu mugu bun, naa anĩ nē saaf wanamāf.

<sup>4</sup> Ganan amā bun mosor dinof, amā idi neid mosor nigin wederamā tu kelef, age fiya bagai, ōg amā nemā mosor nigin wederē tu kel.

Ago fen, kisi famāya bun to uroulemāf.’ ”

<sup>5</sup> Age ye fen, ĩ idi irokenēdin, “Āgenei taka ĩ, ne mou ado, anĩ bō atun ĩ gein ile fen, irokenēf, ‘Mou, bret towo nem usenna,

<sup>6</sup> ere nigin, aya neu tã taka, aya bun delē isil, anĩ ere, aya ĩ yōya nē ereb taka sã.’

<sup>7</sup> “Age ye di, ĩ aaben tamal anim irōf, ‘Aya kabĩ total to wana. Sukar mogo kotũ felel, aya neu kesu tar geid mogo fataren mainek. Aya fã au fen, ereb taka ifonōya kisi feleya sã.’

<sup>8</sup> Aya ā arokeneik, ĩ, ne mou nigin to fã ye fen, bret ifenēf, anĩ ere, tamo are kukīya sã kinĩ yei fiyē di, fã ye fen, ereb ĩ orof anĩ kilei ifenēf.

<sup>9</sup> “Anĩ nigin, aya ã arokeneik, to gouf, agef ã ifeneĩf; umirẽgouf, ã gurug gouf; godu godu gouf, ã sukar kã feneĩf.

<sup>10</sup> Aibem taka to fouf, yalouf; aibem taka imirek, gurug fouf; aibem taka godu godu fouf, sukar kã fel kenẽf.

<sup>11</sup> “Ã tama tar, aim ãgenei kesu gau nigin to fef, anĩ ban gogour wenẽgouf de?

<sup>12</sup> Takag, ĩ tataro faat nigin to fef, ĩ ambei wenẽgouf de?

<sup>13</sup> ã seseneĩ bagai, anĩ ere, ãgenei kesu sa-fina biya biya anĩ ifenẽdiya, ã keleĩ bagai youf are, ãgenei anĩ wal fiya, Temeĩ saa ilun ibodok, Awa Uur Fateul aib idi to difiyek, idi ifenẽdiyof bagai!”

*Jesus Belsebub Ado Difiyen*

*(Matyu 12:22-30, 43-45; Mak 3:20-27)*

<sup>14</sup> Jesus ait ifokeleya nẽ kaa sane irun. Sain kaa sane iyawo di, tamo ait ifokelen od wogõ yen, age fe di, tamo kayau musei terẽ den.

<sup>15</sup> Anĩ ere, tamo tunĩ diron, “Are kaa sane neid mudur Belsebub yana bunem, ĩ kaa sesen irudif.”

<sup>16</sup> Tunĩ Jesus kisi difiye ken, saa ilun tamal uris nigin to difen.

<sup>17</sup> Jesus idi neid kisi kelei ken, idi irokenẽdin, “Tano taka yogo kiwai ifen ken, fara fouf, are sane lauf, fõ taka yogo kiwai ifen ken, fara fouf, are kubũ youf.

<sup>18</sup> Satan ĩ yogo kiwai ifen ken, fara fouf are, yogon tano naig fe ifarauf? Aya enĩ orok, ere nigin, ã urõgef, aya Belsebub yana bunem kaa sesen arudif.

19 Are aya Belsebub yana bunem kaa sesen arudif are, ere bunem āgenei dō fiya tar kaa sesen dirudidig? Anī nigin, idim ā es diyeif.

20 Anī ere, aya Negur nē ima gege bunem kaa sesen arudif are, Negur nē tano mogo ā bun isil.

21 “Tamo megeir ado taka, ī willa kisi feleya ado yogon fō lo fef are, in safina are totoū.

22 Anī ere, taka ī yogon megeir wal fiya anim ironē lai fiye ken, yogon willa ī anī bun total yaledig anī son fe fen, in safina gadō foug.

23 “Taka ī aya to fedē fiyaf, ī neu kiwai, takag, ī aya ado to kuru mafef are, ī firagagaū fef.

24 “Sain kaa sane tamo bun tamal ulō yeis fen, gerere tuan ile, si inoya modoū imirek ile to fotou fef. Agef fen, ī irok, ‘Aya fō atoron anī bun baban kelauf.’

25 Sain ī kel isif, fō ani waī difel fen, madur difen anī ilef.

26 Anī nigin, ī ile fen, baban kaa sesen ī wal fiya sewen anī geif irou isif, age de fen, idi namen dile difaref. Age dife di, tamo anī gai sane bagai lef, uruwa bun nē tobonunā anī wal fiya.”

27 Jesus eneidi nigin wogō ye mog, tamo kayau atun kayau taka iweig iron, “Sinā ō gō yo ken, su ifonon, are ī el fiyek.”

28 Ī solof iron, “Age fiya ban, Negur nē od karī de fen, dō difef anidi, el fedif.”

### *Jona Bun Uris* (Matyu 12:38-42)

29 Tamo kayau guru fiya mala oduge di, Jesus iron, “Tamo kayau, gama sain enei bun dibodok, are sane bagai. Idi memelik nigin to difef, anī



ere, taka to afenēdiyof, de profet Jona nē uris anī dogol afenēdiyof.

<sup>30</sup> Jona are Niniwe taun tamo kayau bun uris, age fiya bagai, Tamo Naal ĭg sain enei nē tamo kayau bun uris.

<sup>31</sup> Es fiya sain bun, Kuin Saut tamal fã ye fen, tamo kayau sain enei bun geid, idi neid mosor nigin kurō falaisiyof, ere nigin, kayau anī Solomon nē keleī karī youf nigin, teneub idiyan tamal isin, gama taka Solomon wal fiya are yeir.

<sup>32</sup> Es fiya sain bun, Niniwe tamo kayau fã de fen, tamo kayau sain enei bun geid, idi neid mosor nigin kurō difalaisiyof, ere nigin, idi mogo Jona wogō ye di, waud falei den, gama taka Jona wal fiya are yeir.

*Bouwa Nē Lam*  
(Matyu 5:15; 6:22, 23)

<sup>33</sup> “Taka nem lam tōf fen, to iminēyan be, beī kur inodig, age fiya ban, in yoki bun iseginēdig, age fe di, idi aabē disif anidi lalan dilouf.

<sup>34</sup> Malã are bouwã nē lam. Õ malã biyauf are, ogon bouwã gananeġ lalan barikãf. Anī ere, Õ malã sesen lauf are, ogon bouwãġ gugum kalauf.

<sup>35</sup> Anī nigin, lalan ò ado anī gugum keleya nigin lo walauf.

<sup>36</sup> Age fiya nigin, ogon boũ gananeġ lalan barikãf fen, siri sitakã to gugum ouf are, lam nē lalan ò bun so fe di, yaor ledig gen, bouwa gananeġ oditekei lalan ouf.”

*Jesus Farisia Tamo Ado Lo Ifelnēdiya Tamo Isisnēdin*  
(Matyu 23:1-36; Mak 12:38-40)

37 Sain Jesus wogõ ye bure fele di, Farisia tamo takam ã, Jesus ado saaf dãf nigin iweignẽ di, aaben ile, tebol bun ibodon.

38 Anĩ ere, Farisia tamo ã, Jesus ima ketem kulo fiya sã, saaf nigin ibodon anĩ ile fen, terẽ yen.

39 Age fe di, Odug ã irokenen, “Farisia tamo ã, kap ado beĩ agara kulo gedig, anĩ ere, ã namein akorouya ado sanem barikã.

40 ã neneya tamo! Negur agara inon anĩ, nameg to inon de?

41 Anĩ ere, ereb beĩ namen ibodok anĩ maleg wenẽdigouf, ago ge di, ereb ereb ganan ã bun fliya ibodõf.

42 “Farisia tamo ã meleĩlon ado, ere nigin, ã ãgenei edẽ, bakso ado, kabier tamal ereb ereb ganan farag fen, ten tekelei Negur wenẽgedig, anĩ ere, ã lo es fiya ado Negur nigin wau laa fiya utorõgedig. ã dum nẽ anĩ dõg fen, uruwa nẽ anĩg to utorõgem, are dem.

43 “Farisia tamo ã meleĩlon ado, ere nigin, ã Juda neid uub fõ bun modoũ malabag ibodõya ado, maket modoũ bun tamo kayau idim sere diyeik anĩ oroyeik.

44 “ã meleĩlon ado, ere nigin, ã tamo mekura dede fiya gen, tamo idi keleĩ sa ken, teten diyõdig.”

45 Lo keleĩ tamo taka Jesus irokenen, “Tise, õ enei urõ di, õ amãg kono wamak.”

46 Jesus solof iron, “Lo keleĩ tamo, ãg meleĩlon ado, ere nigin, ã tamo kayau, morõ idi faali fiya nigin malai bagai anĩ wenẽdigedig, anĩ ere, ã

aug imeĩ gege tekelei idi isennēdiya nigin to fitei yedig.

<sup>47</sup> “Ā meleĩlon ado, ere nigin, ā profet neid matmat unogedig, anĩ ere, ā tubuĩ tarem idi didenkesin.

<sup>48</sup> Anĩ nigin, āgenei tubuĩ tar profet age difedin anĩ, ā megeir ge fen, yaor gef, ere nigin, idi profet didenkesin, ā idi neid matmat unogedig.

<sup>49</sup> Age fiya nigin, Negur yogon kisi biya bunem iron, ‘Aya fau idi bun profet, aposel ado sur afediyouf, age afe di, idi tunĩ didenkeis fen, tunĩ kafĩ fiya difenēdiyof.’

<sup>50</sup> Anĩ nigin, teneub inon gariya bunem isif, profet ganan neid naudeid fi felen anĩ nē mala solo, tamo kayau gama sain enei bun idim dalouf,

<sup>51</sup> Abel nē naud bunem ile, Sekaraia ĩ tempel alta ado atun dukesin in naud bun. Aya ā momoi arokeneik, naud enĩ ganan nē mala solo, tamo kayau gama sain enei bun idim dalouf.

<sup>52</sup> “Lo keleĩ tamo, ā meleĩlon ado, ere nigin, ā keleĩ nē ki walelegen, ā aug namen ileyā sa ken, ā idi namen dilef anidi neid sukar katĩ welegef.”

<sup>53</sup> Sain Jesus modoũ anĩ itoron, Farisia tamo, lo ifelnēdiya tamo geid, ĩ bun kiwai total dino, to fiya fire fire musei to difiyen,

<sup>54</sup> ereb od wogõ youf bun dirounēf nigin tari difiyen.

## 12

*Weder Irouya Ado Tai Fiya  
(Matyu 10:26-33)*

<sup>1</sup> Dirub kele di, tamo kayau tausen musei biya guru difen, anĩ bun idi abob tete tete lalai de difaren, age dife di, Jesus in dõ fiya tar ketem irokeneĩd fen, iron, “Ã, Farisia tamo neid yis nigin lo welegei, are mala yaleya tobonunã.

<sup>2</sup> Gama erob dede fiya yenek, are ganan fau lelek falauf, gama erob iminēyan yenek, are ganan fau yaorouf.

<sup>3</sup> Ã gugum bun wogõ gen anĩ, fau gaa lalan bun karĩ douf, ã aaben wedereim kosesē gen anĩ, fau fõ sokoronem kurõ difesiyouf.

<sup>4</sup> “Neu mou tar, aya ã arokeneik, idi bouwa dukeis fen, anĩ dumen erob taka baban age fiya kisi feleya sã anidi to kumĩ wodig.

<sup>5</sup> Anĩ ere, ã aib kumĩ wiyēgouf anĩ afelneif: Ì bouwa yukeis fen, dumen ã hel bun irāyeif nigin megeir ado anĩ kumĩ wiyēgouf. Ariya, aya ã arokeneik, ì kumĩ wiyēg.

<sup>6</sup> Fisisir faif, tuwenti toea nē nem na nigin to sur gedig de? Anĩ ere, Negur ì anidi taka nigin to weder tu keledig.

<sup>7</sup> Momoi, Negur āgenei mudureĩ bun fatiyeĩ ganan iwes yalen. To kumĩ wog, ã fisisir musei wal fediya.

<sup>8</sup> “Aya ã arokeneik, aibem taka, aya nigin tamo meleid bun kurõ falaisiyouf, Tamo Naal ìg, ì nigin Negur nē engel meleid bun kurõ falaisiyouf.

<sup>9</sup> Anĩ ere, taka ì, aya nigin tamo meleid bun wa fouf, ayag ì nigin Negur nē engel meleid bun wa afouf.

<sup>10</sup> Taka ì, Tamo Naal nigin kiwai ifen ken, kobu yef are, in mosor yalelauf. Ani are, taka ì, Awa

Uur Fateul kiwai ifen ken, kono fiyek, in mosor to yalelauf.

11 “Sain ã Juda neid uub fõ bun guri diyeĩ diroule, mudur adodo yeneid adodo meleid bun difarneĩf, an wauĩ moro ken, aug isenneĩf nigin naig mafouf, ere mauf, wog fen, to sii yeĩf,

12 ere nigin, sain anĩ bun, Awa Uur Fateul ereb wogõ gouf nigin, ifelneĩf.”

### *Neneya Tamo Safina Ado Nē Yaab Od*

13 Tamo kayau musei atun, tamo takam Jesus irokenen, “Tise, neu turau urokenē di, amã urom akor foi mafouf.”

14 Jesus solof iron, “Aim aya ã atun es fiya tamo be, foi fiya tamo igirnan?”

15 Age ye fen, Jesus idi irokenēdin, “Lo welegei, ereb ereb ganan bun akorouya anĩ lo welegei, tamo nē mata in safina musei bun to ibodok.”

16 Age ye fen, ã yaab od enei idi irokenēdin, “Tamo taka safina musei ado, ne teneub bun saaf musei yaledig.

17 Ĩ kisi yalen, ‘Aya naig afouf? Aya neu saaf inoya nē modoũ sã.’

18 “Agef fen, ã iron, ‘Aya eig afouf anĩ de. Neu ki narĩ afeleid fen, odug nuwa anodiyouf, an neu saaf ado ereb ereb ganan anouf.

19 Age afel fen, aya yug nigin orõf, “Õ ereb ereb biyai biyai musei biya, yar musei nē unof. Ibodõya karika, saaf, naan wokon, waũ el fouf.” ’

20 “Anĩ ere, Negur ã irokenen, ‘Õ neneya! Bõ enei bun bagai, aya ogon mata alelkonõf. Age afe di, aim ogo nigin dodok won anĩ yalouf?’

21 “Taka ï yogo nigin, agef safina kuru fef, anï ere, Negur mala bun maleg ibodok, ï bun eig bagai fe, wõ youf.”

*To Osig*  
(*Matyu 6:25-34*)

22 Age ye fen, Jesus in dõ fiya tar irokenëdin, “Age fiya nigin, aya ã arokeneik, ã ãgenei bouweï mata ibodõf nigin to osig fen, ere saaf tãf gouf, ã ãgenei bouweï nigin to osig fen, ere gabar tafilaïf gouf.

23 Mata anï saaf wal fiya, bouwa anï gabar wal fiya.

24 ã kalog uledigedig, idi saaf to ditënëdig, idi saaf to u difedig, idi ki be, udũ inoya modoũ sã, anï ere, Negur ifoutnëdidig. ã ninã anidi wal fediya bagai!

25 ã takam yogon mata nigin osi ye fen, aua tekelei tobol fiya kisi feleya de?

26 ã naal bagai enei age fiya kisi feleya sã nigin, ere nigin anï ã ereb ereb tunï nigin osi gef?

27 “Aa munï naig fe odugedig anï ulegedig. Idi kabï to daledig, to diwadig. Anï ere, aya ã arokeneik, kulu King Solomon yogon fula fiya medeïya bun naki gegë biya biya ifonun animeg, aa munï taka to wal fen.

28 Anï ere, Negur dubur aa munï gama dogol ifarauf, nile di, yã irãf anï, agef naki fediyouf are, ã idi wal fediya bagai, Negur naig fe ã ifounneïf, ã momoïya naal bagai ado!

29 Anï nigin, ã wauï ere saaf wãgauf be, ere naan wãgauf anï bun to unog, anï bun to osig.

30 Are haiden idi enĩ ganan nigin meleid dimirēdig. Āgenei Temeĩ ā lau gef anĩ ganan keleĩ.

31 Anĩ ere, Negur nē tano umirēg, ago ge di, safina eneidig ifeneĩf.

32 “Musei sã ā, to kumĩ wog, ere nigin, āgenei Temeĩ, tano anĩ ā ifeneiƷa nigin wau al fen.

33 Āgenei safineĩ na sur ge fen, maleg wenēdigouf. Ā mugu mugu moni nē kodol to serek fouf anĩ uwagouf, agog fen, saa ilun nē safina biya biya to sa kalauf anĩ kuru gouf, an bē tamo non to isidig, tutũ to dāf.

34 Āgenei safina biya biya ibodok nē an, wauĩg an yenēf.

*Jesus Kel Isiyouf Nigin Ololo Fiya  
(Matyu 24:43-51)*

35 “Kabĩ nē naki ufonũg fen, āgenei lam tōg saika wog,

36 tamo idi, nedi odug, tamo kayau ado bagu fiya nē tar bunem kelouf nigin tari difedig, anĩ bunem, sain ĩ isi, sukar godu godu fe di, idi sã kaisã bagai ĩ sukar kã difelkenēf anidi gen ago gouf.

37 Ferfer anidi ololo dife mog, nedi odug isi ilediyouf anĩ, idi nigin deuf, aya ā momoi aro-keneik, ĩ fau yogo kabĩ nē naki ifoun kel, ferfer tebol bun ibodneĩd fen, isi, aruneid yalouf.

38 Ferfer anidi saika difel mog, nedi odug, bō atun be, we ado be isi ilediyouf anĩ, idi nigin deuf.

39 Anĩ ere, ā enei keleĩ youf: Fō marau ĩ, sain nanĩ be bun, bē tamo isiyouf anĩ keleĩ youf are, ĩ yogon fō lo fe di, to narĩ fouf.

<sup>40</sup> ãg saika gouf, ere nigin, Tamo Naal ï fau sain to isiyouf gouf bun isiyouf.”

<sup>41</sup> Pita to fen, “Odug, õ yaab od enei amã nigin de, ganan nigin urok?”

<sup>42</sup> Odug solof iron, “Ferfer taka aim anï, dõ fiya biya, kisi biya ado de? Ì, yogon odugem ï yogon odug nẽ fõ bun, anidi neid saaf dogo neid sain kilei, dõf ifenëdiyouf nigin, ima bun inof.

<sup>43</sup> Sain tamo odug kelouf bun, ferfer biya bagai age fe di, ilouf, tamo odug ï el fiyẽf.

<sup>44</sup> Aya ã momoi arokeneik, tamo odug ï, yogon safina ganan, ferfer anï ima bun inouf.

<sup>45</sup> Anï ere, ferfer taka ï wau bun irõf, ‘Neu tamo odug isiya nigin sain meluk yalef,’ age ye fen, ï gariya ino, tamo ferfer ado kayau ferfer iden ken, ï yogo saaf biya naan biya yokon, aai sã fedig.

<sup>46</sup> Ferfer anï nẽ tamo odug, in isiya nẽ naa ferfer to isiyouf ye fen, kisif mog, in isiya sain ï keleï sã mog, isiyouf. Tamo odug, ferfer anï gudũf fisik fe fen, momoiya sã geid, nedi modoũ bun inenẽf.

<sup>47</sup> “Ferfer taka ï, yogon tamo odug nẽ oroya kelei ken, to dodok fef be, yogon odug orof anï to dõf age fef, ï fau wõf musei fouf.

<sup>48</sup> Anï ere, taka ï to kelei ken, darau yaleya nẽ anï age fef, ï musei to wõ fouf. Aib taka ï musei ifenen, ï bun musei yaleya nigin irokenẽf, agef fen, taka ï lo fouf nigin musei biya ifenen, ï bun musei biya yalouf nigin to fiyẽf.

*Jesus Maur Gudũ Fiya Nigin To Isin, Isoreya Nigin*

*(Matyu 10:34-36)*



49 “Aya tenebur yã arou asiyouf nigin asin, yã mala kaur mogom are, aya arou bagai fiyam.

50 Anĩ ere, aya naan igũya taka fau alouf, anĩ nigin, aya wau fatuk morok ile, anĩ kisi falauf.

51 ã kisi gef, aya tenebur ein maur gudũ fiya arou asiyouf nigin asin de? Sã bagai, aya ã arokeneik, isoreya nigin asin.

52 Gama ilauf bun, ibor tekelei bun, idi faif fara de fen, towom uru kiwai difenēdi di, urum towo kiwai difenēdiyof.

53 Idi fara de fen, tamam kesu kiwai ifenē di, kesum tama kiwai ifenēf, sina, ne barai kiwai ifenē di, ne barai sina kiwai ifenēf, sina yanawau kiwai ifenē di, yanawau kayau sina kiwai ifenēf.”

*Sain Nigin Es Fiya*  
(Matyu 16:2, 3)

54 Jesus tamo kayau musei irokenēdin, “Sain ã gaa ileyen budũ fã ye di, uleg fen, ã kaisã bagai urōgedig, ‘Uyē isiyouf,’ ago ge di, age fedig.

55 Takag, yau karag maaĩ ubunem fũ fef, ã urōgedig, ‘Uruwa dō fadauf,’ are agef wō yedig.

56 ã mala yaleya tamo! Teneub saa ado suma dinof anĩ uleg fen, es gouf nigin ã keleĩ. Naig fe di, sain enei nē suma es fiya nigin ã to keleik de?

57 “Ere nigin ã aug erēb biya anīg to es gedig?

58 Õ ogon kiwai ado medistret bun uleg fen, naab luwen ogon kiwai ado od madur wouf, to agouf are, ĩ õ yale, es fiya tamo bun inenōf, age fe di, es fiya tamo õ polis bun inenō di, polis õ kalabus bun inenōf.

59 Aya õ arokonok, õ wareg ganen to unolauf are, õ kalabus bun to kutũ wesiyouf.”

# 13

## *Wauĩ Falei Gouf, Sãf, Inanakalauf*

<sup>1</sup> Sain anĩ bun, tunĩ an difaren anidim, Pailat Galili temeleid tunĩ neid naudeid ado dogo neid sesewi fiya nẽ safina ekul fen anĩ, Jesus diroke-nen.

<sup>2</sup> Jesus solof iron, “Ã kisi gef, Galili temeleid eneidi age de darau dalen nigin, idi neid mosor Galili temeleid ganan neid mosor wal fiya de?”

<sup>3</sup> Aya ã arokeneik, sã bagai! Anĩ ere, ã wauĩ to falei gouf are, ãg ganan inanakalauf.

<sup>4</sup> Takag, Siloam fõ meluk tamo kayau bun kubũ ye fen, idi eitín idenkesin. ã kisi gef, idi neid mosor, tamo kayau ganan Jerusalem taun difaref neid mosor wal fiya de?”

<sup>5</sup> Aya ã arokeneik, sã bagai! Anĩ ere, ã wauĩ to falei youf are, ãg ganan inanakalauf.”

<sup>6</sup> Age ye fen, Jesus yaab od enei iron, “Tamo taka, aa fig tekelei yogon wain kabier itenen, anĩ ã ile, faat nigin mala itoton, anĩ ere, taka to ilen.

<sup>7</sup> Anĩ nigin, ã wain kabĩ lo fiya tamo irokenen, ‘Yar towo aya asi, aa fig enei bun faat nigin malau atoton, anĩ ere, taka to ailen. Utu urã! Ere nigin teneub girusif?’

<sup>8</sup> “Kabĩ lo fiya tamo solof iron, ‘Odug, baban yar tekelei utorkana len, aya gariyan ku kalĩ afel, yaro te anouf.

<sup>9</sup> Yar taka bun biyauf, are deuf! Sãf are, utu urã.’ ”

*Jesus, Kayau Taka Bagiya Fe Fesen, Sabat Naa Bun El Fiyen*

10 Sabat naa taka bun, Jesus Juda neid uub fō taka bun od ifelnēdin.

11 Kayau taka, yar eitn kaa sanem ironen nigin dagi ado, an ibodon. Kayau ī bagiya fe fesen, agef fen, ī madur ifareya kisi feleya sā bagai.

12 Sain Jesus kayau anī lof fen, ī wagen iweigne ken, ī irokenen, “Kayau, ō ogon dagi bun tamal ō karika afonok.”

13 Age ye fen, Jesus ī bun ima ino di, kaisā bagai kayau ī madur le ifar fen, Negur yana yalesen.

14 Juda neid uub fō nē mudur, Jesus Sabat naa bun dagi el fiyen nigin, name sane fen, tamo kayau irokenēdin, “Kabī yaleya nigin naa sigis ado. Anī nigin, naa anidi bun usig el yeif, Sabat naa bun sā.”

15 Odug ī irokenen, “Ā, mala yaleya tamo! Ā mugu mugu Sabat naa bun, āgenei bulmakau be, donki be difaredig modoū bun tamal birug fen, naan ifenēdiya nigin to gurig ulegedig de?

16 Kayau enei, ī Abraham nē barai, ī Satanem sain meluk yar eitn ifokelnen, ī ifōya anī bun tamal Sabat naa bun to karika afenēf de?”

17 Jesus od enei wogō ye di, yogon kiwai tar ganan mama fedin, anī ere, Jesus ereb ereb biya bagai age fen ganan nigin, tamo kayau musei ganan waud al fen.

*Masted Faat Yis Ado Nē Yaab Od  
(Matyu 13:31-33; Mak 4:30-32)*

18 Anī nigin, Jesus to fen, “Negur nē tano anī, ere taka gen? Ere bun aya kisi afe di, susu falauf?”

19 Are masted faat gen, anĩ tamo takam yale fen, yogon kabier itenen. Anĩ odug fen, aa wõ ye di, ninã ilun temeleid disi, were bun dibodadan.”

20 Baban ĩ to fen, “Negur nẽ tano anĩ, ere taka bun aya kisi afe di, susu falauf?”

21 Are yis gen, anĩ kayau takam yale fen, flawa odug ado falei fe di, ganan gẽ yen.”

### *Bobog Kidõ*

*(Matyu 7:13, 14, 21-23)*

22 Jesus Jerusalem taun ilauf nigin naab luwen iyok ile fen, taun ado fonõ fonõ ile, od ifelnẽdin.

23 Takam Jesus to fiyen, “Odug, are teke tekelei dogol kel yalediyouf de?”

Jesus idi irokenẽdin,

24 “Bobog kidõ anĩ ileyã nigin kabĩ total walogouf, ere nigin, aya ã arokeneik, musei idi namen dilauf nigin age difouf, anĩ ere, to kisi falauf.

25 Sain fõ marau fã ye fen, sukar inolalauf, ã serẽ ufareg fen, godu godu ge ugonẽgouf, ‘Odug, sukar kã wanamãf.’

“Anĩ ere, ĩ solof irõf, ‘Aya ã keleĩ sã, ã nainenem usigen.’

26 “Age ye di, ã urõgouf, ‘Amã õ geid saaf naan ado ton, ago fen, õ nemã naab bun od ufelnamak uyon.’

27 “Anĩ ere, ĩ solof irõf, ‘Aya ã keleĩ sã, ã nainenem usigen. ã sane ago gedig ganan, aya malau bun uyaleleg!’

28 “Sain Abraham, Isak, Jakop, profet ganan geid, Negur nẽ tano bun uledig fen, ã aug mayarẽ irarãyeif, an inã wifirig fen, goboreĩ kikokõ youf.

<sup>29</sup> Tamo kayau gaa iseyan temeleid, gaa ileyan temeleid, yat temeleid, fa temeleid disi, Negur nē tanon tar bun idi neid modoũ dalouf.

<sup>30</sup> Momoi, an idi dumen dibodok fau malabag dibodōf, idi malabag dibodok fau dumen dibodōf.”

*Jesus Jerusalem Nigin Wau Gudũ Fen  
(Matyu 23:37-39)*

<sup>31</sup> Sain anĩ bun, Farisia tamo tunĩ Jesus garan disi dirokenen, “Modoũ enei utor ken, taka bun ule. King Herod ĩ õ inokesiyou fenē.”

<sup>32</sup> Jesus solof iron, “Uleg, gaũ kuĩ anĩ urokenēg, ‘Gama ado nil, aya kaa sesen aruid fen, tamo kayau el afediyouf, age afe fen, naa towo bun, aya neu kabĩ anĩ uyu katõ afalauf.’

<sup>33</sup> Anĩ ere, aya gama, nil, arã toko tokõ afouf, momoi bagai profet taka Jerusalem taun to ito ken, firen laa fouf!

<sup>34</sup> “O Jerusalem, Jerusalem, õ profet udenkeis fen, õ bun sur fedig anidi, meein meein wedidig, sain ganĩ aya õ wau afon ken, ogon gerē tar kuru afediyouf nigin age afedig, tataro sina momou waye farumen kuru fedig gen, anĩ ere, õ utorõdig!

<sup>35</sup> Ulegouf, āgenei fõ ā bun fonou lef. Aya ā arokeneik, ā aya baban to uleyagauf ile, ā fau urõgouf, ‘Odug yana bunem isif ĩ el fiya ado.’\* Sain anĩ bun, ā aya uleyagauf.”

## 14

*Jesus Farisia Tamo Taka Nē Fõ Bun*

---

\* **13:35:** Sam 118:26

<sup>1</sup> Sabat naa taka bun, Jesus, Farisia tamo uyu irouya taka nē fō bun, saaf yōya nigin ilen, idi an Jesus ololo difen.

<sup>2</sup> Jesus wagen an, tamo taka bou didīya nigin darau yaledig anī ibodon.

<sup>3</sup> Jesus, Farisia tamo, lo keleī tamo geid to fedin, “Sabat naa bun, dagi el fediya anī lo dō fiya de, sã?”

<sup>4</sup> Anī ere, idi mutū difaren. Anī nigin, Jesus tamo anī yale, el fiye kel sur fiyē di, ilen.

<sup>5</sup> Agef fen, ī idi to difen, “Ã taka, Sabat naa bun, kesu be, bulmakau be taka kuren isilauf, ã kaisã bagai to dī wasagauf de?”

<sup>6</sup> Age ye di, idi od solof irōya kisi feleya sã.

<sup>7</sup> Jesus, tamo tebol bun modoū malabag anī gei dife di, ile fen, ī idi yaab od enei irokenēdin,

<sup>8</sup> “Tamo kayau ado bagu fiya nē tar bun, aib ō iweignōf are, modoū malabag anī to walouf, ere nigin, tamo taka ō wal yōya iweignen be.

<sup>9</sup> Age foug are, ã uru iweigneim marau isi, ō irokonōf, ‘Ogon modoū anī, tamo enei wenē.’ Age ye di, ō mama yo ken, modoū dumen bagai anī walouf.

<sup>10</sup> Anī ere, ō iweignōf are, modoū dumen anī walouf, ago di, iweignom marau isiyouf, ī ō irokonōf, ‘Mou, modoū biya bun godo urou usel.’ Age fe di, ō modoū malabag anī wale di, ã iweigneim turã tar ganan meleid bun ō yanã odug adouf.

<sup>11</sup> Ere nigin, aib taka yogo yana yalesef, fau lai fesilauf, aib taka ī yogo yana lai fesilef, Negur ī yana yalesauf.”

12 Age ye fen, Jesus fõ marau irokenen, “Sain õ gaa atun saaf be, bõ saaf wenēdiyof fenē, ogon mou tar, naud turã tar, sirag tar be, nē tã tar safina inid adodo to uweignēdiyof, agouf, idi aba diweignõf, anĩ bun õ mala solo difonõf.

13 Anĩ ere, sain õ tar unouf, maleg, bouweid sesen, yeid kirorõya, meleid ifofakeleya anĩ uweignēdiyof,

14 agouf, Negur õ el yõf. Idi aba õ ke de difonõya kisi feleya sã, anĩ ere, madur tamo neid mata kel fãya bun, Negur õ mala solo ifonõf.”

*Tar Odug Nē Yaab Od*  
(Matyu 22:1-10)

15 Tamo tebol bun weim dibodon anidi takam, od enei karĩ ye fen, ã Jesus irokenen, “Negur nē tanon tar bun tamo saaf yãf anĩ, ã el fiya ado.”

16 Jesus solof iron, “Tamo taka tar odug dodok fe fen, musei iweignēdin.

17 Tar sain bun, ã iweignēdin anidi irokenēdiyof nigin yogon ferfer sur fen, ‘Usig, gama ereb ereb ganan dodok felel.’

18 “Anĩ ere, idi ganan de tekelei gen galã od dinon. Uyulil ã iron, ‘Aya gama bagai kabĩ na alen, anĩ nigin, aya anĩ ailau fenē alauf. O malalon ado, aya to asiyof.’

19 “Taka iron, ‘Aya bulmakau ten na alen, anĩ idi naig fiya anĩ ailau fenē elef. O malalon ado, aya to asiyof.’

20 “Takag iron, ‘Aya gama bagai kayau mata alen nigin, aya isiya kisi feleya sã.’

21 “Ferfer kel ile, ne odug od enei irokenen. Age fe di, fõ marau name sane fen, yogon ferfer

irokenen, ‘Kaisã bagai ule, taun nẽ naab odug, naab nanaal ado dõ wo fen, maleg, bouweid sesen, meleid ifofakeleya, yeid kirorõya anidi guri urou usi.’

<sup>22</sup> “Ferfer iron, ‘Odug, õ urom are mogo age afel, anĩ ere, modoũ fau lolokã.’

<sup>23</sup> “Age ye di, odug yogon ferfer irokenen, ‘Naab uyok ule fen, fonõ fonõ naabur tamo kayau idi anĩ disiyouf nigin total bagai urokenẽdi di, disi, neu fõ isokosauf.

<sup>24</sup> Aya ã arokeneik, aya tamo idi aweignẽdin anidi taka, neu tar bun saaf bagai to kobũ de dilouf.’ ”

*Kisi Es Wo Fen, Jesus Dõ Wouf*  
(Matyu 10:37, 38)

<sup>25</sup> Tamo kayau musei, Jesus weim dile fen, ã falei yel, idi irokenẽdin,

<sup>26</sup> “Taka ã aya gein isif, ne tama, sina, ne kayau, kesu tar, ne tura tar, main tar, yogon matag to itorõf are, ã neu dõ fiya tamo wõ youf nigin kisi feleya sã.

<sup>27</sup> Takag, taka ã yogon aa tetek to faali fe fen, aya dõ fiyaf, ã neu dõ fiya tamo wõ youf nigin kisi feleya sã.

<sup>28</sup> “Ã taka, fõ meluk taka inoya nigin orouf are, ã tetun ibod ken, fõ inolauf nigin moni kisi feleya ado be anĩ es fouf, age fiya sã de?

<sup>29</sup> Ere nigin, ã fõ gariya ino mã, inoleya to kisi falauf are, tamo kayau ganan anĩ dile fen, kasã difiye ken,

<sup>30</sup> dirõf, “Tamo enei fõ kare fen, anĩ ere, inoleya kisi feleya sã.’



31 “Takag, king taka, king taka ado kusī douf nigin, ī ten tausen kusī tamo adom, king taka tuwenti tausen kusī tamo ado kusī disif anī, kusī bun wal fiyēya kisi feleya be sã be anī, tetun ibod ken, es foug, age fiya sã de?

32 Ī to kisi falauf are, ī king taka fau gerō ifar mog, wowor fiya tamo sur fedi di, idi komo fiya nigin to difiyēf.

33 Age fiya gen bagai, ā taka ī, ereb ereb ganan ī ado anī to itorōf are, ī neu dō fiya tamo wō youf nigin kisi feleya sã.

34 “Anī nigin, sol ī biya, anī ere, in kai sa kalauf are, naig fe di, ī baban kai youf?”

35 Sol age fiya are, teneub ado falei fiya nigin ado, gaar te ado falei fiya nigin to biya, anī nigin dirailedig.

“Aib ī karīya nigin weder ado, utornē karī youf.”

## 15

### *Sipsip Fō Yelen Nē Yaab Od (Matyu 18:12-14)*

1 Takis yaleya tamo, mosor adodo geid ganan, Jesus karī difiyēf nigin ī non disin.

2 Anī ere, Farisia tamo, lo ifelnēdiya tamo geid, naseir de fen, diron, “Tamo enei, mosor adodo aan fiyeīd fen, weim saaf doko.”

3 Age de di, Jesus yaab od enei irokenēdin,

4 “Ā taka wan hundred sipsip ado, anī tekelei iminkalauf are, ī nainti-nain sipsip yaorin itorneīd fen, iminkelen anī imirek ile fotou fedig, age fiya sã de?

<sup>5</sup> Sain ï fotou fouf, ï wau adod fen, yale, benerin orowa sef,

<sup>6</sup> fõ bun ilauf. Agef fen, ï ne mou tar ado, ne tã tar gou feid irõf, ‘Ã aya geid kulĩ tauf. Aya neu sipsip fõ yelen anĩ fotou afel.’

<sup>7</sup> Aya ã arokeneik, age fiya gen bagai, mosor ado tamo taka wau falei yef bun, saa ilun kulĩya odug adouf anim, nainti-nain madur tamo baban faleiya nẽ sã idi nigin kulĩya wal fiya.

### *Silwa Koin Moni Iminkelen Nẽ Yaab Od*

<sup>8</sup> “Takag, kayau taka silwa koin moni ten ado, anĩ tekelei iminkalauf are, ï lam tõf, fõ waif fen, el fe imirek ile fotou fouf, age fiya sã de?

<sup>9</sup> Sain ï fotou fouf, ï ne mou tar ado, ne tã tar gou feid irõf, ‘Ã aya geid kulĩ tauf. Aya neu silwa koin moni iminkelen anĩ fotou afel.’

<sup>10</sup> Age fiya gen bagai, aya ã arokeneik, mosor ado tamo taka wau falei yef ï nigin, Negur nẽ engel meleid bun kulĩya odug wõ yef.”

### *Kesu Fõ Yelen Nẽ Yaab Od*

<sup>11</sup> Jesus tobol fe iron, “Tamo taka kesu uru adon.

<sup>12</sup> Ibuyem tama irokenen, ‘Dei, akor neu anĩ fara wana.’ Anĩ nigin, temeid yogon safina idi atun foi fen.

<sup>13</sup> “Anĩ bure fel fen, sain meluk to ilele di, kesu ibuye, safina ï ado ganan kuruf yale irou, teneub taka bun gerõ biya ilen, an in safina tobonunã to biya bun daũ felen.

<sup>14</sup> ï ereb ereb ganan daũ fele di, teneub anĩ bun naũ odug wõ yen, age fe di, ï bun lau fiya wõ yen.

<sup>15</sup> Anĩ nigin, ĩ ile, fõ morou taka bun kabĩ yalouf nigin to fiyẽ di, fõ moroum ĩ bor saaf ifenẽdiyof nigin yogon kabier sur fen.

<sup>16</sup> ĩ naũ bagai nigin bor saaf dõ di, ĩg anĩ yõya nigin orodig, anĩ ere, takam ereb taka to ifenẽdig.

<sup>17</sup> “Ĩ kisi kelen sain, ĩ iron, ‘Neu dei ĩ kabĩ tamo musei ado, idi saaf barikã. Aya ein naum laa fiyau fenẽ!

<sup>18</sup> Aya fã au, neu dei garan kelau fen, ĩ arokenẽf: Dei, aya saa ilun ado õ bun mosor anon.

<sup>19</sup> Aya to biya nigin, neu kesu to wouf, ogon kabĩ tamo oroi waledin taka gen waleyau f.’

<sup>20</sup> Anĩ nigin, ĩ fã ye, tama gein ilen.

“Anĩ ere, ĩ fau gerõ iyok isi mog, tama ĩ kesu ile fen, ĩ nigin wau fatuk yũ di, kesu gein gudu ref ile, kakarai fiye ken, umã fiyen.

<sup>21</sup> “Kesum tama irokenen, ‘Dei, aya saa ilun ado õ bun mosor anon. Aya to biya nigin, neu kesu to wouf.’

<sup>22</sup> “Anĩ ere, tama ĩ yogon ferfer irokenẽdin, ‘Gamanem kolos biya bagai waleg urousig, ĩ ufounnẽg, ima gege bun sai unog fen, ye bun su unokenẽg.

<sup>23</sup> Bulmakau lubu bou dĩa waleg urousig uke-sig. Ada tar tano tokon, sigigi tafouf.

<sup>24</sup> Ere nigin, neu kesu enei laa fen anĩ baban matal, ĩ fõ yelen anĩ baban fotou tafiyem.’ Anĩ nigin, idi gariya dino sigigi difen.

<sup>25</sup> “Sain anĩ bun, kesu matu ĩ kabier ibodon. Dum ĩ iyok isi, fõ kelẽ fiye ken, fõ non kui de gurũ de mog, karĩ yen.

<sup>26</sup> Agef fen, ĩ kabĩ tamo taka iweigne ken, to fiyen, ‘Oun ere naig difef?’

27 Kabĩ tamo ĩ aiten yale iron, ‘Turã kel isil, anĩ tamã bulmakau lubu bou dĩa yum, ere nigin, tamam ĩ bouwa totoũ biya bagai ado kel yalel.’

28 “Age ye di, tura matu name sane fen, fõ bun ileyã nigin itoron. Age fe di, tama mayarẽ ile wowor fiyen.

29 Anĩ ere, kesu ĩ tama solof irokenen, ‘Ulefe, yar enei ganã aya õ sigor taka to wal afe fen, arunã alef asin. Anĩ ere, õ aya meme lubu taka wana di, neu mou tar geid to sigigi mafen.

30 Anĩ ere, õ naal enei are, ogon safina, kayau bouweid na nẽ sur difedig anidi bun daũ fel fen, fonõ isi di, õ bulmakau lubu bou dĩa ukenem!’

31 “Tama iron, ‘Neu kesu, õ aya ado faimud tabodõdig. Safina ganã aya ado, are ogon.

32 Anĩ ere, ada sigigi tafe fen, wauda al fem bagai, ere nigin, turã enei laa fen anĩ baban matal, ĩ fõ yelen anĩ baban fotou tafiyem.’ ”

## 16

### *Kabĩ Tamo Neid Orowa Tobonunã Sane Kisi Biya Ado Nẽ Yaab Od*

1 Takag, Jesus in dõ fiya tar irokenẽdin, “Safina musei ado tamo taka, ĩ yogon kabĩ tamo neid orowam in safina daũ fef yeya karĩ yen.

2 Anĩ nigin, ĩ iweignẽ ile di, to fiyen, ‘Eĩ ere od anĩ õ nigin karĩ auf? Ogon kabĩ walen anĩ faded wo di, karĩ auf, ere nigin, õ baban kabĩ tamo neid orowa to ubodõf.’

3 “Kabĩ tamo neid orowa yogo nigin iron, ‘Gama aya naig afouf? Neu odug neu kabĩ yalelkanaf.

Aya meku yaleya nigin totolou sã, agef mãg, aya nonĩya nigin mama ado.

<sup>4</sup> Aya naig be afouf are aya keleĩ, anĩ bunem sain aya neu kabĩ ein atorõf are, tamo kayau neid fõ bun ileyã nigin aan difiyauƿ.’

<sup>5</sup> “Age ye fen, ã, yogon odug bun wareg dalen anidi mugu mugu iweignēdi di, disin. ã tamo uyulil anĩ to fiyen, ‘Õ neu odug bun wareg ganĩ walen?’

<sup>6</sup> “ã aiten yale iron, ‘Eit handred galen aa oliv moul alen.’” Kabĩ tamo neid orowa ã irokenen, ‘Ogon wareg ditoton wale, kaisã ubod ken, fo handred utot.’

<sup>7</sup> “Age ye di, ã uyulil dõ fiyen anĩ to fiyen, ‘Ba õ wareg ganĩ walen?’

“ã solof iron, ‘Wan handred wit bek alen.’

“Kabĩ tamo neid orowam ã irokenen, ‘Ogon wareg ditoton wale, eiti utot.’

<sup>8</sup> “Yogon odug ã, kabĩ tamo neid orowa idegēya tamal, ã kisi el fe yale fen, age fen nigin, yana yalesen. Ere nigin, tamo kayau teneub enei bun temeleid kisi el de dale fen, ereb dogo neid nigin tamo kayau lalan bun temeleid wal fediya age difedig.

<sup>9</sup> Aya ã arokeneik, teneub enei nē safina bunem ã aug nigin neĩ mou tar waledigouf, anĩ bunem, sain safina sa kalauf, mata gai ibodkeleyã bun aan diyēĩf.

<sup>10</sup> “Taka ã ereb naal bagai el fe lo fef, odug buneg agef lo fouf, taka ã naal bagai bun idegek, odug buneg idegēf.

11 Anĩ nigin, ã tenebur enei nẽ safina to el ge lo gen ouf are, aim ã momoi nẽ safina lo fiya nigin ineneĩf?

12 ã takan nẽ safina to el ge kulatun gen ouf are, aim anĩ ã safineĩ ifeneĩf?

13 “Kabĩ tamo takam odug uru bun to kabĩ yalouf. Taka nigin to wau yen ken, taka nigin wau laa fouf be, taka anĩ aruna yale fen, taka anĩ to awa yãf. ã Negur nigin ado moni nigin aruna yaleya kisi feleya sã.”

14 Farisia tamo moni nigin waud laa fedig anĩ, od enei ganan karĩ de fen, Jesus kasã difiyen.

15 Age dife di, Jesus idi irokenẽdin, “Ã bagai anĩ, tamo meleid bun, ã aug nigin biya age mafef gedig, anĩ ere, Negur ã wauĩ keleĩ bagai. Tamo ereb nigin waud fatuk difenek, are Negur mala bun ninir bagai.”

### *Ifelnẽdiya Od Tobol Fiya*

16 “Lo nẽ od ado, profet neid od wogõ def disi, Jon bun daun. Sain anĩ bunem, Negur nẽ tano nigin biya od wogõ def disif, age fe di, ganan namen ileya nigin mugu mugu teĩbir def.

17 Saa teneub ado iminkeleya nigin are karika, anĩ ere, Lo bun itotoya togo fiya naal bagai taka to iminkalauf.

18 “Taka ã aiwa iru fen, kayau taka yalouf are, ã seseirã inof, taka ã kayau tamo takam irun anĩ yalouf are, ã seseirã inof.

### *Safina Musei Tamo Ado Lasarus*

19 “Safina musei ado tamo taka, naa ganan bun kolos naki biya, saaf biya, ibodõya biya ibodõdig.

20 Maleg taka yana Lasarus, gurumam barikā, safina musei ado tamo ne bobogē yenēdig.

21 Agef fen, ī, safina musei ado tamo nē tebol bunem kuku ref anī yāf nigin orodig. Gaũg disi, guruma seum difedig.

22 “Dum maleg tamo laa fe di, engelem Abraham wagen dirou diselen. Safina musei ado tamog laa fe di, mū difen.

23 Laa neid modoũ bun, safina musei ado tamo darau odug yale fen, ī gerō mala irakel, Lasarus Abraham wagen ibod mog, ilen.

24 Agef fen, ī Abraham iweigne ken, iron, ‘Dei Abraham, aya nigin waũ ino ken, Lasarus sur wiyē di, ima gege uyum naan kobũf fen, ırousi baleu felu kouf, ere nigin, aya yā enei bun darau odug alef.’

25 “Anī ere, Abraham aiten yale iron, ‘Kesu, õ mata ubodon sain, õ ereb ereb biya wale mog, Lasarus ī ereb ereb to biya yalen, anī karī wo, anī ere, gama ein ī wau wā fe di, õ darau odug bun ubodok.

26 Takag, enei ganan teten, amā ã geid atun meku odug inon, anī bunem, idi ein tamal ã gein isiya nigin kisi feleya sã, takam an tamal amã gein ibal isiya nigineg kisi feleya sã.’

27 “İ aiten yale iron, ‘Age fiyauf are, Dei, aya õ agonok, neu dei nē fõ bun Lasarus sur wiyē di, isilauf,

28 ere nigin, aya turau tar faif dibodok. Utorne len, wedereid ırouwauf, age fe di, idig darau odug nē modoũ enei bun to disiyouf.’

29 “Abraham solof iron, ‘Idi Moses nē itotoya ado profet neid itotoya ado, utorneïd len, idi anidi bun wedereid dinouf.’

30 “Ī iron, ‘Age fiya sã, Dei Abraham, laa bun tamal takam idi bun isilauf are, idi waud falei youf.’

31 “Anī ere, Abraham tamo anī irokenen, ‘Idi Moses nē od ado profet neid od nigin to wedereid dinouf are, laa bun tamal takam fã ye fen, idi irokenēdiyofeg to karī douf.’ ”

## 17

### *Jesus Mosor Ado Momoiya Nigin Ifelnēdin (Matyu 18:6, 7, 21, 22; Mak 9:42)*

1 Jesus in dō fiya tar irokenēdin, “Ereb ererb tamo mosor bun inenēdiyof anī isiyouf bagai, anī ere, tamo nanī be bunem isif, ĩ malalon ado.

2 Taka ĩ nanaal enidi taka mosor bun inenēya ban, ĩ meein odug guyutu bun ifo ken, maaïwō irāya nigin biya bagai.

3 Anī nigin, ã lo welegei. “Ō turã mosor inouf, ou wiyēf, anī ĩ falei youf are, ō in mosor nigin wederē tu kel.

4 Ī naa tekelei bun, ō bun mosor ino sewen fouf, ĩ ō gein isi, sewen fe irōf, ‘Aya awaul,’ ō in mosor nigin wederē tu kel.”

5 Aposel idi Odug dirokenen, “Nemã momoiya odug wouf!”

6 Jesus solof iron, “Ã momoiya naal, masted faat gen adouf are, aa enei urokenēgouf, ‘Kusu wale, usil maaïwō ufarauf,’ ago ge di, ã sigoreĩ dō fouf.



7 “Ā taka, yogon ferfer kabier teneub yūf be, sipsip lof fen, kabierem isi mog, ne maraum tau, ‘Kaisā bagai saaf yōya nigin usi ubod,’ fiyēf de?”

8 Age fiya ban, ī eig youf, ‘Neu saaf dodok wol fen, ō naki wol, arunau wale, akas bure afele di, gama ō saaf ado naan wāf.’

9 Ī irokenē di, dōf age fen nigin, maraum ferfer tau de wiyal fiyēf de?”

10 Anī nigin, ā ereb ereb irokeneik anī ganan dōg, ago weleg fen, āg eig ge urōgouf, ‘Amā ferfer to biya, amā nemā kabī anī dogol malel.’ ”

### *Jesus Tamo Ten Lepra Dagi Adodo El Fedin*

11 Jesus Jerusalem ileya nigin, Samaria ado Galili distrik daū atu iyok ilen.

12 Ī fonō taka bun ile mog, tamo ten lepra dagi adodo, ī fotou difiyen. Idi gerom difar fen,

13 aiteid odug nem diweig diron, “Jesus, Odug, amā nigin malalon yō!”

14 Sain ī idi ileid fen, iron, “Uleg, aug bouweī pris ufelnēdigouf.” Age ye di, idi dile mog, bouweid biya len.

15 Idi neid taka bouwa biya len anī ile fen, kel isi, ait odugem Negur yana yalesen.

16 Jesus ye gariyan kubū ye yen ken, de wiyal fiyen, ī Samaria tamal.

17 Age fe di, Jesus to fen, “Ten ganan to biya ledin de? Tamo nain idi nain difaref?”

18 Takam to kel isi, Negur yana yalesel, yaū enei dogol de?”

19 Jesus age ye fen, ī irokenen, “Fā wale fen, ule, ogon momoiyam ō el yom.”

*Jesus Negur Nē Tano Nigin Wogō Yen*

*(Matyu 24:23-28, 37-41)*

<sup>20</sup> Sain taka, Farisia tamom, Negur nē tano ere sain isiyouf nigin Jesus to difiyē di, Jesus solof iron, “Negur nē tano, malam ileyā kisi feleya sā bunem isidig,

<sup>21</sup> tamo to ‘Eī yeir,’ be, ‘Your oun,’ be douf, ere nigin, Negur nē tano are ā atun ibodok.”

<sup>22</sup> Age ye fen, Jesus yogon dō fiya tar irokenēdin, “Sain isi di, Tamo Naal nē naa taka ileyā nigin oroyeīf, anī ere, ā anī to ulogouf.

<sup>23</sup> Tamom dirokeneīf, ‘Ī your!’ be, ‘Ī yeir!’ douf. Ā, to uleg, idi to dō wedig.

<sup>24</sup> Ere nigin, Tamo Naal, yogon naa bun, kolimei filiya lalan saa gariyanem irou, idikeleyan isiledig gen.

<sup>25</sup> Anī ere, uruwa ī darau musei yale di, tamo kayau sain enei bun dibodok anidi ī dudum difiyēf.

<sup>26</sup> “Noa nē sain bun age fen gen, age fiya bagai Tamo Naal nē sain buneg age fouf.

<sup>27</sup> Tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. Agef mog, kuwei isi fen, idi ganan daū fedin.

<sup>28</sup> “Lot nē sain buneg de age difen, tamo kayau saafem, naanem difen, na dalef, na sur difef, saaf diten, fō dino mog, difen.

<sup>29</sup> Anī ere, naa Lot Sodom taun itor ilen bun, yā ado meein salfa, saa bunem uyē gen kukur fen, idi ganan daū fedin.

<sup>30</sup> “Age fiya gen bagai, Tamo Naal yaorouf nē naa bun, agef wō youf.

<sup>31</sup> Naa anī bun, taka ī yogon fō agaran ibod mog, in safina namen ibodok anī yalouf nigin to kel isilauf. Age fiya bagai, taka ī kabier ibodok, yogon safina yalouf nigin to kel ilauf.

<sup>32</sup> Lot nē kayau bun kisi gouf!

<sup>33</sup> Taka ī yogon mata yalouf nigin kisi fouf, ī mata anī fō yalauf. Taka ī yogon mata anī itorōf are, ī yogon mata irou kafī falauf.

<sup>34</sup> Aya ā arokeneik, bō anī bun, tamo uru idi fatar tekelei bun denēf, tekelei yalouf, taka itornēf.

<sup>35</sup> Kayau uru idi wit ditutu mog, tekelei yalouf, taka itornēf.”\*

<sup>37</sup> Idi to difen, “Odug, ō urok anī nain wō youf?” Jesus idi irokenēdin, “Nain be laa yenek nē an, tum guru difouf.”

## 18

### *Kayau Waab Tuwa To Yu Kelen Nē Yaab Od*

<sup>1</sup> Age ye fen, Jesus, in dō fiya tar idi faimud kosēya nigin tuweid to yūf anī ifelnēdiyof nigin, yaab od taka irokenēdin.

<sup>2</sup> Ī iron, “Taun taka bun, es fiya tamo taka ibodon, ī Negur to kumī fiyēdig, tamog to iwesnēdig.

<sup>3</sup> Taun anī bun an, kayau waab taka ibodon, ī es fiya tamo bun toku kel fen, yogon kiwai mala solo ifenēf nigin irokenēyai yedig.

---

\* **17:35:** Itotoya tunī eig de ditoton: *itornēf*. <sup>36</sup> *Tamo uru idi kabier difarauf, tekelei yalouf, taka itornēf.*

<sup>4</sup> “Es fiya tamo ï kaisã to karĩ fiyen, anĩ ere, dum ï yogo nigin iron, ‘Aya Negur to kumĩ afiyek, tamog to awesnēdif,

<sup>5</sup> anĩ ere, kayau waab enei toku morõ ifanaf nigin, in morõ anĩ ail fen, kayau ï irok anĩ age afouf, anĩ bunem ï to kel fen, morõ ifanauf.’ ”

<sup>6</sup> Jesus age ye fen, iron, “Es fiya tamo sane, erēb ï iron anĩ karĩg.

<sup>7</sup> Negur yogon igirnēdin anidi, bõ ado gaa ado diweig dirokenēdig nigin, ï lo nē madur fiya to ifenēdiyof de? ï sain meluk to karĩ fiyēdiyof de?

<sup>8</sup> Aya ã arokeneik, ï kaisã bagai lo nē madur fiya ifenēdiyof. Anĩ ere, Tamo Naal isiyof sain bun, tenebur ein ï momoiya fotou fouf de?”

*Farisia Tamo Taka, Takis Yaleyā Tamo Ado Nē Yaab Od*

<sup>9</sup> Tunĩ idi dogo nigin amã madur bagai de fen, tunĩ meleid irim lai difedidig anidi bun, Jesus yaab od eneig irokenēdin,

<sup>10</sup> “Tamo uru tempel bun kosē douf nigin disen, taka Farisia tamo, taka takis yaleyā tamo.

<sup>11</sup> Farisia tamo ifar fen, yogo nigin kosē yen, ‘Negur õ de ayok, aya tamo tunĩ gen sã, bē diledig, sane age difedig, seseirã dinodig, takis yaleyā tamo enei geneg sã.

<sup>12</sup> Aya uub tekelei bun naa uru kuri au fen, erēb erēb ganān aya alef anĩ, ten teke tekelei õ afonõdig.’

<sup>13</sup> “Anĩ ere, takis yaleyā tamo ï so rel ifaren. ï saa iluneg to itad fen, anĩ ere, ï akor yu ken, iron, ‘Negur, aya nigin waũ inõf, aya mosor temelou.’

14 “Aya ã arokeneik, Farisia tamo anĩ sã, takis yaleya tamo enei, Negur mala bun ã madur fen, fõ bun ilen. Ere nigin, taka ã yogo yana yalesef, Negur ã yana lai fouf, taka ã yogo yana lai fef, Negur ã yana yalesauf.”

*Kesu Nanaal Jesus Geid*

*(Matyu 19:13-15; Mak 10:13-16)*

15 Takag, tamo kayau, Jesus kesu momoug kobũ fediyouf nigin ã wagen guri difeid disin. Age dife di, in dõ fiya tar anĩ dile fen, idi ou difiyēdin.

16 Anĩ ere, Jesus kesu ã wagen iweigneid fen, iron, “Utornēdig len, kesu nanaal aya wageun disiyouf, idi to katũ wedig, ere nigin, Negur nē tano are eig fediya neid.

17 Aya ã momoi arokeneik, aib taka ã, Negur nē tano, kesu naal age fiya gen to yalouf are, ã Negur nē tanon to bagai ilauf.”

*Uyu Irouya Tamo Safina Musei Ado*

*(Matyu 19:16-30; Mak 10:17-31)*

18 Uyu irouya tamo taka Jesus to fiyen, “Tise biya, aya ere naig afe fen, mata faimud ibodkeleya alouf?”

19 Jesus ã irokenen, “Ere nigin õ aya anĩ biya wiyaf? Aibem taka biya sã, Negur yogo dogol.

20 Õ ãtãfiya keleĩ: ‘Õ seseirã to unouf, õ tamo taka to ukesiyouf, õ to bē walouf, õ taka nigin idegēya od to urõf, sinã tamã yeneid walesauf.’\*”

21 Age ye di, ã iron, “Enei ganan aya kesu naalun dõ afef asin.”

---

\* **18:20:** Eksodas 20:12-16; Diuteronomi 5:16-20

<sup>22</sup> Jesus enei karĩ ye fen, ã irokenen, “Õ fau tekelei anĩ inĩ sã. Ogon safina ganan na nigin sur wo fen, maleg tamo weneĩd, agouf anĩ õ saa ilun safina biya adouf. Ago wol fen, usi, aya dõ wiya.”

<sup>23</sup> Anĩ ere, ã od enei karĩ ye fen, wau fatuk gudũ fen, ere nigin, ã safina musei biya ado.

<sup>24</sup> Jesus ã lege fiye ken, iron, “Safina musei adodo tamo, Negur nẽ tano bun ileyã nigin, gai malai bagai!

<sup>25</sup> Momoi, kamel ã, gabar iwaya nẽ nil ku bun ileyã nigin, karika bagai, safina musei ado tamo, Negur nẽ tano bun ileyã nigin, malai bagai.”

<sup>26</sup> Idi od anĩ karĩ de fen, to difen, “Age fiyauf are, aim anĩ mata ibodkeleyã anĩ yaleyã nigin kisi feleyã?”

<sup>27</sup> Anĩ ere, Jesus solof iron, “Ereb tamom age fiya nigin kisi feleyã sã anĩ, Negur age fiya nigin kisi feleyã.”

<sup>28</sup> Pita Jesus irokenen, “Ulef, amã õ dõ mayõf nigin, ereb ereb ganan amã ado anĩ matoron!”

<sup>29</sup> Age ye di, Jesus idi irokenẽdin, “Aya ã momoi arokeneik, aib taka fõ, kayau, tura tar, sina tama tar be, gere tar, Negur nẽ tano nigin itoron,

<sup>30</sup> ã mala solo musei bagai sain enĩ bun yalouf, ã dumen isiyouf buneg mata faimud ibodkeleyã yalouf.”

*Jesus In Laa Nigin Irõ, Towo Fen  
(Matyu 20:17-19; Mak 10:32-34)*

<sup>31</sup> Age ye fen, Jesus, in dõ fiya tar tuwelf firen geif iroule irokenẽdin, “Ulegef, ada Jerusalem teselef, ereb ereb ganan Tamo Naal nigin profet ditoton anĩ, fau kisi falauf.

<sup>32</sup> Ì fau haiden Israel sã anidi imeid bun ilauf. Idi ì fau diselinēf, kono difiyēf, disisnēf, wagī difiye ken, dukesiyouf.

<sup>33</sup> Naa towo bun, ì fau baban mata kel fã youf.”

<sup>34</sup> Anī ere, dō fiya tar, enei ganan taka to kelein. Od anī nē gariya idi bun iminen, agef fen, idi ì erob nigin irok anī to kelein.

*Maleg Tamo Mala Ifofakeleya Anī Mala Fara Felen*

*(Matyu 20:29-34; Mak 10:46-52)*

<sup>35</sup> Sain Jesus Jeriko kelē fiyē mog, tamo taka mala ifofakeleya, naab yerin nonī yef ibodon.

<sup>36</sup> Ì tamo kayau musei disi dilef ya karī ye fen, erob wō yef anī nigin to fedin.

<sup>37</sup> Idi ì dirokenen, “Jesus Nasaret tamal isi ilef.”

<sup>38</sup> Age de di, ì iweig iron, “Jesus, Dawid Naal, aya nigin malalon yō!”

<sup>39</sup> Tamo uyu dilen anidim sakā difiye ken, foro yalauf nigin dirokenen, anī ere, ì wade bagai iweig iron, “Dawid Naal, aya nigin malalon yō!”

<sup>40</sup> Jesus dē yel fen, tamo ì wagen dirou disiyouf nigin irokenēdin. Ì isi melsã di, Jesus ì to fiyen,

<sup>41</sup> “Aya ò ere age afonōf ani, ò oroyok?”

Tamo anī solof iron, “Odug, aya malau kelē yalau fenē.”

<sup>42</sup> Age ye di, Jesus ì irokenen, “Malã fara wol, ogon momoia anim el yom.”

<sup>43</sup> Kaisã bagai, ì mala fara fel fen, Jesus dōf, Negur yana yalesen. Tamo kayau ganan anī dile fen, idig Negur yana dalesen.

# 19

## *Sakeus, Takis Yaleyā Tamo*

<sup>1</sup> Jesus Jeriko taun wō ye fen, atu iyok ilen.

<sup>2</sup> Tamo taka yana Sakeus an ibodon. Ī takis yaleyā tamo neid mudur, safina musei ado.

<sup>3</sup> Ī Jesus ĩ ai bagai anī ilouf nigin oron, anī ere, ĩ tobega tamo nigin ĩ kisi feleya sã, ere nigin, tamo kayau musei dinonolnen.

<sup>4</sup> Anī nigin, ĩ ket gudu ref ile, Jesus ilouf nigin aa fig ilun sō yen, ere nigin, Jesus naab anī dōf, are isi ilauf.

<sup>5</sup> Sain Jesus modoũ anī bun ulō yeis fen, mala ilun ira ken, ĩ irokenen, “Sakeus, kaisã bagai kutũ weis. Gama aya ogon fō bun abodōf bagai.”

<sup>6</sup> Age ye di, ĩ kaisã kutũ yeis fen, wau sere fiya ado Jesus aan fiyen.

<sup>7</sup> Tamo kayau ganan enei dile fen, kosesē kurã den, “Ī mosor ado tamo nē fō bun mogo ilef.”

<sup>8</sup> Anī ere, Sakeus ifar fen, Jesus irokenen, “Odug, ulef! Gama yeir aya neu safina atun fara afe fen, sitakã maleg tamo afenēdiyof, aya idegēya bunem tunī neid safina alen are, aya idi mugu mugu mala solo aiwa ifenēya teten ano fen, afenēdiyof.”

<sup>9</sup> Age ye di, Jesus ĩ irokenen, “Gama kel yaleyā anī fō enei bun isil, ere nigin, tamo enī, ĩg Abraham naal taka.

<sup>10</sup> Ere nigin, Tamo Naal fō delen anidi imirneīd fen, kel gei fof nigin isin.”

*Ferfer Ten Moni Imeid Bun Inon Nē Yaab Od  
(Matyu 25:14-30)*



11 Idi od enei karĩ de mog, Jesus tobol fe, yaab od taka irokenẽdin, ere nigin, ã mogo Jerusalem melsã ifaref, anĩ nigin, tamo kayau Negur nẽ tano kaisã bagai wõ youf de fen, kisi difen.

12 Anĩ nigin, ã iron, “Tamo taka yana odug ado, ã king dinenẽ di, kel isiyouf nigin fõ takã gerõ bagai ilen.

13 Anĩ nigin, ã yogon ferfer ten iweig laisi fen, moni wan tausen kina mugu mugu ifeneĩd fen, irokenẽdin, ‘Moni enei kabĩ wenẽg mog, aya kelauf.’

14 “Anĩ ere, yogon tamo tar kiwai difen ken, eig de dirõf nigin ã dumen arũ tamo sur difen, ‘Amã tamo enei nemã king wõ youf nigin to oromak.’

15 “Anĩ ere, ã king yana yale fen, fonõ kel isin. Agef fen, ã, ferfer moni ifenẽdin idi moni ado naig de kabĩ dalen anĩ ilouf nigin, iweignẽdi di, disin.

16 “Tamo uyu ã isi iron, ‘Odug, aya ogon wan tausen kina bun, ten tausen kina taka alen.’

17 “Age ye di, yogon odug solof irokenen, ‘Õ ferfer biya, õ de agon! Õ safina naal bagai bun kabĩ biya walen nigin, taun ten lo weid.’

18 “Ĩ dõ fiya taka isi iron, ‘Odug, aya ogon wan tausen kina bun, faif tausen kina taka alen.’

19 “Age ye di, yogon odug ãg irokenen, ‘Õ taun faif lo weid.’

20 “Age fe di, ferfer taka isi iron, ‘Odug, ogon moni yeir. Aya moni anĩ gabar masak nem sile afe fen, anokon.

21 Aya õ nigin kumĩ aun, ere nigin, õ tamo total ado. Õ ereb to unokon anĩ waledig, onom to utenen anĩ kusu wodig.’

<sup>22</sup> “Yogon odug ĩ irokenen, ‘Aya ogon od bunem es ayõf, õ ferfer sane! Õ kelein, aya tamo total ado, ayam to anokon anĩ aledig, ayam to atenen anĩ kusu afedig de?’

<sup>23</sup> Ere wo fen, neu moni benk bun to unon? Ago wom are, sain aya kelauf bun, moni kabĩ yalen anĩ nẽ mala ado, moni õ benk wenen anĩ bagu fiya kel isin ado alem.’

<sup>24</sup> “Age ye fen, odug idi difaren anidi iro-kenẽdin, ‘Yogon moni son ge fen, tamo ten tausen kina ado anĩ wenẽg.’

<sup>25</sup> “Age ye di, idi ĩ dirokenen, ‘Odug, ĩ mogo ten tausen kina ado!’

<sup>26</sup> “Odug solof iron, ‘Aya ã arokeneik, taka ĩ ado, aya teten anouf, anĩ ere, taka ĩ sã bagai, ereb taka ĩ ado areg, ĩ bun tamal son fouf.

<sup>27</sup> Anĩ ere, neu kiwai tar, aya nedi king ibodõya nigin to orodin anidi, ein wageun gurig urousig fen, malau bun udenkesig.’ ”

*Jesus Tamo Yana Ado Gen Jerusalem Ilen  
(Matyu 21:1-11; Mak 11:1-11; Jon 12:12-19)*

<sup>28</sup> Jesus od enei wogõ yel fen, Jerusalem iseleya nigin, ĩ ketem uyu iselen.

<sup>29</sup> Jesus Moul Arei\* bun Betfage ado Betani fonõ kelẽ fiye ken, in dõ fiya tar uru sur feid irokenẽdin,

<sup>30</sup> “Fonõ wageik anĩ bun uleg, an wõg fen, donki naal difon anĩ ulogouf, are aibem taka anĩ bun to iyon. Anĩ biru weleg fen, ein urou usig.

<sup>31</sup> Taka nem to yeĩf, ‘Ere nigin ã anĩ biru gef?’ urokenẽgouf, ‘Odug anĩ kabĩ ifenẽf nigin.’ ”

\* **19:29:** ‘Oliv Arei’ dedig.

<sup>32</sup> Anĩ nigin, uyu sur fedin idi dile, Jesus iro-kenēdin kilei bagai anĩ fotou difen.

<sup>33</sup> Idi donki naal biru de mog, anĩ nē marau tamo idi to difiyēdin, “Å ere nigin donki naal anĩ biru gef?”

<sup>34</sup> Idi ĩ solo de dirokenen, “Odug anĩ kabĩ ifenēf nigin.”

<sup>35</sup> Idi donki naal anĩ Jesus wagen dirousi fen, idi neid gabar teten dirara ken, ĩ anĩ teten dinenē ibodon.

<sup>36</sup> Jesus iyok ile mog, tamo kayau idi neid gabar naabur du difedin.

<sup>37</sup> Sain ĩ iyok isi, naab Moul Arei bunem isileya non, in dō fiya tar ganan, memelik ganan inodin dilen nigin, waud al fiya ado aiteid odug nem Negur yana dalesen:

<sup>38</sup> “King, Odug yana bunem isif, are ĩ el fiya ado!”\*

Saa ilun wau inosiya ado, ilun bagai fula fiya medeĭya ado!”

<sup>39</sup> Tamo kayau atun, Farisia tamo tunĩ Jesus dirokenen, “Tise, ogon dō fiya tar sakā wiyeĭd!”

<sup>40</sup> Anĩ ere, Jesus solof iron, “Aya ā arokeneik, idi foro dalauf are, meein eneidi diweig dirōf.”

<sup>41</sup> ĩ Jerusalem kelē fiye ken, taun anĩ ile, wau gudū fe di, inā yale,

<sup>42</sup> iron, “Õ Jerusalem naa enei bun, õ nigin erebem waũ inosiya irou isif anĩ õ keleim, are dem, anĩ ere, gama õ malā bun iminek.

<sup>43</sup> Sain taka õ bun isiyouf, ogon kiwai tar, õ bun teneub mudu dino, salili diyokel, afi diyokalauf.

---

\* **19:38:** Sam 118:26

<sup>44</sup> Idi ò tenebur dale dirâyõf, ò ado gerẽ tar ogon kau namen difaref geid. Idi meein taka taka teten ditorõ di, to ibodõf, ere nigin, Negur ò bun isin nẽ naa anĩ to ulegen nigin.”

### *Jesus Tempel Bun*

*(Matyu 21:12-17; Mak 11:15-19; Jon 2:13-22)*

<sup>45</sup> Jesus tempel modoũ bun ile, idi ereb ereb na nigin sur de mog, an irudidin.

<sup>46</sup> Agef fen, Jesus idi irokenẽdin, “Negur nẽ Itotoya bun ibodok, ‘Neu fõ are, kosẽya nẽ fõ ibodõf,’\* anĩ ere, āgem ‘bẽ tamo neid iminẽya fõ’\* unogen.”

<sup>47</sup> Naa ganan Jesus tempel bun ifelnẽdidin. Anĩ ere, pris odudug, lo ifelnẽdiya tamo, tamo kayau neid mudur adodo geid, Jesus dukesiyouf nigin naab dimiren.

<sup>48</sup> Anĩ ere, idi age difouf nigin naab taka to dilen, ere nigin, tamo kayau ganan in od anĩ diroun.

## 20

### *Jesus Aim Igirnen Anĩ To Difyen*

*(Matyu 21:23-27; Mak 11:27-33)*

<sup>1</sup> Naa taka bun, Jesus tempel bun tamo kayau ifelneĩd fen, biya od wogõ yen. Agef mog, pris odudug, lo ifelnẽdiya tamo, mudur adodo geid, ã gein disin.

<sup>2</sup> Idi diron, “Aim ò igrnõ di, ò ereb ereb enĩ ago wof anĩ urokanamã. Aim ò igrnnon?”

---

\* **19:46:** Asaia 56:7      \* **19:46:** Jeremaia 7:11

<sup>3</sup> Jesus aitedin yale iron, “Ayag to fiya taka afeneĩf. Solog urokanag,

<sup>4</sup> Jon naan igunēdin are saa ilun tamal de, tamo bunem?”

<sup>5</sup> Idi dogo dogol katō de fen, diron, “Ada, ‘Saa ilun tamal,’ tauf are, ĩ to fouf, ‘Ere nigin ā ĩ nigin to momoi wiyēgen?’

<sup>6</sup> Anĩ ere, ada, “Tamo bunem,’ tauf are, tamo kayau ganan meeinem dinadauf, ere nigin, idi Jon ĩ profet den.”

<sup>7</sup> Anĩ nigin, idi solo de diron, “Ī nain be tamal are amā keleĩ sã.”

<sup>8</sup> Age de di, Jesus iron, “Ayag ā to arokeneĩf, aim aya igrina di, aya ereb ereb enĩ age afedif.”

*Tamo Kabĩ Lo Difedig Nē Yaab Od*  
(*Matyu 21:33-46; Mak 12:1-12*)

<sup>9</sup> Jesus tobol fe, yaab od enei tamo kayau irokenēdin, “Tamo taka wain kabĩ yale, ĩ mala solo yalouf nigin wain kabĩ, kabĩ tamo tunĩ imeid bun ino fen, sain meluk uyu takã ilen.

<sup>10</sup> Fito fiya sain, ĩ ferfer taka wain kabĩ lo fiya tamo gedin, wain biya tunĩ difenēf nigin sur fen. Anĩ ere, idi ĩ du ken, sur difiyē di, ima sāsã ilen.

<sup>11</sup> Ī ferfer taka sur fen, anĩ ere, idi tamo anĩg du ken, mama difenē di, ima sāsã ilen.

<sup>12</sup> Ī baban takag sur fe di, idi ĩg darau difen ken, dumeitur diran.

<sup>13</sup> “Age dife di, wain kabĩ marau iron, ‘Aya ere naig afouf? Aya neu kesu, oboiyou, sur afouf. Idi ĩ anĩ karĩ difiyēf be.’

14 “Anĩ ere, kabĩ lo fiya tamo idi ĩ dile fen, abob dirokenen. Idi diron, ‘Eĩ ĩ akorouf. Ada ĩ taukeis fen, akor eĩ nedauf.’

15 Anĩ nigin, idi ĩ wain kabĩ dumeitur dira ken, dukesin.”

Age dife di, wain kabĩ marau naig fediyouf?

16 ĩ isi, kabĩ lo fiya tamo idenkeis fen, wain kabĩ anĩ tamo tunĩ ifenēdiyof.”

Sain tamo kayau od enei karĩ de fen, idi diron, “Enei to bagai agef wõ youf!”

17 Anĩ ere, Jesus idi lo feid le fen, to fedin, “Age fiyauf are, ere gariya nigin Negur nē Itotoya bun eig ye irok:

“Meein are fõ inoya tamom sane de fen, ditoron, meein anĩ gama monog tor wõ yen”<sup>\*</sup>?

18 Aib taka meein anĩ teten kubũ youf, mereb fe fisik fouf, takag, aib taka meein anĩ ĩ teten kubũ youf, ĩ danĩf aas lauf.”

19 Lo ifelnēdiya tamo, pris odudug geid, Jesus kaisã bagai irounēya nigin naab dimiren, ere nigin, idi kelein, ĩ idi nigin yaab od enei wogõ yen. Anĩ ere, idi tamo kayau nigin kumĩ den.

### *Sisa Takis Ifenēya*

*(Matyu 22:15-22; Mak 12:13-17)*

20 Anĩ nigin, idi Jesus ololo difiye ken, kofo tamo sur difedin, kofo tamo idi idegēya bun madur tamo gen dilen. Idi Jesus ereb od wogõya bun kũ fenē di, diroune ken, Rom gawaman mudur nē lo fiya ado megeir bun dinenēf nigin kisi difen.

21 Anĩ nigin, kofo tamo Jesus to difiyen, “Tise, amã keleĩ, ogon wogõya ifelnēya ado madur. Ő

---

\* **20:17:** Sam 118:22

takam in oroya dō wouf nigin wewu yō di, in oroya dō fen, taka wau morō to wenēdig, anī ere, ō momoi bun Negur nē naab ufelnamādig.

<sup>22</sup> Amā Sisa takis mafenēf anī lo dō fiya de, sã?”

<sup>23</sup> Anī ere, Jesus idi namedin idegēya anī ile fen, irokenēdin,

<sup>24</sup> “Koin moni taka ufelnag. Ai nē malakanon ado itotoya anī bun ibodok?”

<sup>25</sup> Idi aiten dale diron, “Sisa nē.” Age de di, Jesus idi irokenēdin, “Age fiyauf are, Sisa nē are Sisa wenēg, Negur nē are Negur wenēg.”

<sup>26</sup> An Jesus mal atun wogō yen bun, idi ī ironēya kisi feleya sã. Idi ī solof iron anī bunem terefeit de fen, foro delen.

*Mata Kel Fāya Bun Ai Nē Kayau Ibodōf?  
(Matyu 22:23-33; Mak 12:18-27)*

<sup>27</sup> Sadusia tamo idi dirōdig, laa bun tamal mata to ke de fã dedig, dedig anī tunim, to fiya eig fiya ado Jesus wagen disin.

<sup>28</sup> Idi diron, “Tise, Moses itotkanaman, are tamo taka, ne tura laaf fen, aiwa itornen, anī ere, kesu sãf are, tamo ī kayau waab anī yale fen, tura nē kesu diroukenēf.

<sup>29</sup> Gama tura tura sewen dibodon. Matu ketem kayau taka yalen, anī ere, kesu yaleya sã mog, tamo laa fen.

<sup>30</sup> Matu dō fiya bagam kayau anī yalen, ī laa fe di,

<sup>31</sup> ī dō fiya bagam kayau anī yalen, age de dile dile, tura tura sewen ganan kesu sã gare desin.

<sup>32</sup> Dum kayau areg laa fen.

<sup>33</sup> Anĩ nigin, dum laa bun tamal mata kel fãya sain bun, ã ai nẽ kayau ibodõf, ere nigin, tura tura sewen anidi adok ã dale dogolen?”

<sup>34</sup> Jesus aitedin yale iron, “Gama sain enei bun, tamo kayau yalef, kayau tamo yalef ya ibodok.

<sup>35</sup> Anĩ ere, sain anĩ bun, idi laa bun tamal mata kel fãya sain bun dibodõf nigin kisi feleya anidi, an tamo kayau yalef, kayau tamo yalef ya sãf,

<sup>36</sup> idi baban gare deyag kisi feleya sã, ere nigin, idi engel gen. Idi laa bun tamal mata ke de fã def nigin, idi Negur nẽ gere tar.

<sup>37</sup> Anĩ ere, arein aa yã wõ yen nigin Negur nẽ Itotoya bun, Moseseg tamo gare den anĩ mata ke de fã douf nigin ifelnen, ere nigin, ã Odug nigin iron, ‘Abraham nẽ Negur, Isak nẽ Negur, Jakop nẽ Negur.’\*

<sup>38</sup> ã laa neid Negur sã, ã mata ibodõya neid Negur, ere nigin, ã bun ganan mata dibodok.”

<sup>39</sup> Lo ifelnēdiya tamo tunĩ aiten dale diron, “Tise, õ de urok!”

<sup>40</sup> Anĩ bunem idi kumĩ de fen, taka nem ereb taka nigin baban Jesus to, to fiyen.

*Ai Nẽ Kesu Anĩ Kristus?  
(Matyu 22:41-23:7; Mak 12:35-40)*

<sup>41</sup> Age dife di, Jesus idi irokenēdin, “Naig fe di, idi Kristus ã Dawid nẽ Naal dedig?”

<sup>42</sup> Dawid ã yogo Buk Sam bun kurõ falaisin:  
“Negur neu Odug irokenen,

“Imau biya melem ubod mog,

<sup>43</sup> ogon kiwai tar

---

\* **20:37:** Eksodas 3:6



on yē inoya nē sawa anouf.”<sup>\*</sup>

<sup>44</sup> Dawid ï nigin ‘Odug’ yef, age fiyauf are, naig fe di, ï Dawid naaluouf?”

<sup>45</sup> Tamo kayau ganan karī difiyē mog, Jesus in dō fiya tar irokenēdin,

<sup>46</sup> “Lo ifelnēdiya tamo nigin lo welegei. Idi gabar meluluk difonunakel diyo ken, maket modoū bun aan difiyēdiyof anī orodidig. Age de fen, idi Juda neid uub fō bun sia biyai biyai bun dibod ken, tar inoya bun modoū malabag malabag bun dibodōdig.

<sup>47</sup> Idi kayau waab idegnēdiya bunem nedi fō sosoin difeid fen, meleid yaleya nigin meluk bagai kosē dedig. Tamo age fediya, mala solo darau sane bagai dalouf.”

## 21

### *Kayau Waab Nē Safina Negur Ifenēya*

*(Mak 12:41-44)*

<sup>1</sup> Jesus mala irā, tamo kayau safineid adodo, nedi kolekta moni tempel bogis bun dino mog, iledin.

<sup>2</sup> Takag, ï lof mog, kayau waab maleg taka isi, peni giriya moni nanaal uru inon.

<sup>3</sup> Agef fen, Jesus iron, “Aya ã momoi arokeneik, kayau waab maleg enī ï, ganan wal fediya, odug bagai bogis bun inol.

<sup>4</sup> Tamo kayau enei ganan, dogo neid safineid bun tamal, nedi kolekta moni dinon, anī ere, kayau anī, maleg bun ï mata ibodōf nē anī ganan inon.”

---

<sup>\*</sup> **20:43:** Sam 110:1

*Idikeleya Sain Nē Uris  
(Matyu 24:1-35; Mak 13:1-31)*

<sup>5</sup> In dō fiya tar tunī, tempel meein biya biya nem ado, safineid biyai Negur difenen anim, tempel naki difiyen anī nigin wogō den. Anī ere, Jesus iron,

<sup>6</sup> “Ā ulegef enei nigin, sain fau isiyouf, meein enī taka to abob tete tete yenēf, anī adok fau isog irailauf.”

<sup>7</sup> Idi to difen, “Tise, ere sain eneidi wō youf? Ere uris anī, eneidi kisi falauf nigin wō youf?”

<sup>8</sup> Age de di, Jesus iron, “Takam to idegneīf nigin lo weleg. Ere nigin, musei aya yanau nem disi dirōf, ‘Aya Kristus,’ takag, ‘Sain mogo melsak.’ Age de di, to dō wiyēdig.

<sup>9</sup> Ā kusī nigin ado, kantri bun kiwai fen, gawaman narī difef ya karī gouf, ā to tererē gei. Ereb ereb enidi ketem wō youf bagai, anī ere, idikeleya anī, sain anī bun bagai to wō youf.”

<sup>10</sup> Age ye fen, Jesus idi irokenēdin, “Teneub taka fā ye fen, ī teneub taka nigin kiwai ifenēf, tano taka ī tano taka nigin kiwai ifenēf.

<sup>11</sup> Mimī odug wowā youf, naū odug ado dagi totol, modoū taka taka bun wowā youf, ereb ereb kumīya nē ado uris odudug, saa bun wowā youf.

<sup>12</sup> “Anī ere, eneidi ganan fau to wō ye mog, idi kaka diyei ken, kafī fiya difeneīf. Idi Juda neid uub fō bun ado kalabus bun dineneīf. Age de fen, ā king ado gawaman mudur adodo meleid bun dirouleyeīf, anī ganan aya yanau nigin de fen, age diyeīf.

13 Naab enei bunem, ã idi meleid bun, aya nigin kurõ wesigouf.

14 Anĩ ere, ã idi meleid bun aug isenneĩya nigin dodok ge fen, to wogõ gouf nigin ã kisi ketem ufokeleg.

15 Ere nigin, aya, od ado kisi biya, ãgenei kiwai tar takam solof irõya be, kiwai ifenẽya kisi feleya sã anĩ afeneĩf.

16 Anĩ ere, ã fau sineĩ temeĩ tarem, tureĩ tarem, sirag ado neĩ mou taremeg kiwai difenei ken, ã tunĩ laa bun dineneĩf.

17 Tamo ganan, aya yanau nigin de fen, ã kiwai difeneĩf.

18 Anĩ ere, mudureĩ bun, fatiyeĩ tekelei bagai to iminkalauf.

19 Megeir ifareya bunem, mata walogouf.

20 “Sain ã Jerusalem kusĩ tamom salili dife mog, ulogouf, ã keleĩ youf, Jerusalem fonou inenẽya anĩ melsak.

21 Age fiya ulogouf, idi Judia distrik bun dibodok, arein diya diselauf, idi taun anĩ bun dibodok, anenem diyalalauf, idi taun yerin difaref, namen to dilauf bagai.

22 Ere nigin, sain enei are, Negur nẽ Itotoya bun ibodok ganan kisi falauf nigin darau ifenẽya nẽ sain.

23 Naa anĩ bun, kayau bouweid ado, kayau kesu su difenek ado, idi meleidlon ado. Teneub anĩ bun, morõ odug wõ ye fen, Negur nẽ didi, tamo kayau enei bun isiyouf.

24 Idi dimig nem didenkeis, kalabus tamo gei difeid fen, teneub ganan bun diroulediyouf. Jerusalem fau haiden Israel sã anidim lalai difeid

dile, haiden Israel sã anidi neid sain anĩ kisi falauf.

<sup>25</sup> “Uris gaa bun, ogõ bun ado, barisa bun wõ youf. Tenebur ein, teneub ganan bun moloun fire bagai fã ye fen, maaĩ gugu re di, idi kisi gurũ ye fen, nene douf.

<sup>26</sup> Tamo kayau, teneub bun ere wowã youf de fen, kumĩ de, meleid waĩ youf, ere nigin, saa nẽ megeir guyoyõ douf.

<sup>27</sup> Sain anĩ bun, tamo idi, Tamo Naal lalo bun megeir ado fula fiya medeĩya barikã isi mog, dilouf.

<sup>28</sup> Ereb ererb enei gariya ino, wõ ye di, ufareg fen, mudureĩ utadseg, ere nigin, kel yaleyeĩya are melsak.”

<sup>29</sup> Age ye fen, Jesus yaab od enei irokenẽdin, “Ã aa fig ado aa ganan ulogouf.

<sup>30</sup> Sain idi aarau ifraũd mog, anĩ ã aug uleg fen, ã keleĩdig, saneya melsak.

<sup>31</sup> Age fiya bagai, ererb ererb eneidi wõ ye mog, ulogouf are, ãg keleĩ youf, Negur nẽ tano are mogo melsak.

<sup>32</sup> “Aya ã momoi arokeneik, tamo kayau sain enei bun dibodok anidi to gare de mog, ererb ererb eneidi ganan wõ youf.

<sup>33</sup> Saa teneub ado sa kalauf, anĩ ere, neu od to bagai sa kalauf.

<sup>34</sup> “Lo walagauf, sãf are, saafei ge, aai naanuei ge fen, tenebur mata ibodõya nigin sii fiya anim, ãgenei wauĩ bun kafĩ yeĩ di, ã keleĩ sã mog, Negur nẽ naa kor gen ã bun isiyouf.

<sup>35</sup> Naa are, tenebur tamo kayau ganan bun wõ youf.

<sup>36</sup> Eneidi ganan wowã you fenẽ anĩ wal fiya kisi falauf nigin ado, Tamo Naal mala bun ufaragauf nigin, ã faimud ololo wog fen, kosẽ gouf.”

<sup>37</sup> Naa ganan, Jesus tempel bun ifelneĩd fen, aragau ganan, Moul Arein isel fen, bõ an ibodõdig.

<sup>38</sup> Age fe di, tamo kayau ganan, tempel bun karĩ difiyẽf nigin, bonimeĩ bagai disidig.

## 22

*Judas Jesus Mudur Adodo Imeid Bun Inouf Nigin Yo Yen*

*(Matyu 26:1-5; Mak 14:1, 2, 10, 11; Jon 11:45-53)*

<sup>1</sup> Gama Bret Yis Sã Sifa naa, Pasa naa dedig melsã di,

<sup>2</sup> pris odudug, lo ifelnẽdiya tamo geid, Jesus yukesiya nigin naab dimiren, ere nigin, idi tamo kayau nigin kumĩ den.

<sup>3</sup> Age fe di, Satan, Judas, Iskariot tamal dedig, tuwelf dõ fiya tar atun taka, ĩ namen ilen.

<sup>4</sup> Age fe di, Judas ile, pris odudug ado tempel lo fiya tamo neid uyu irouya bun wõ ye fen, idi geid ĩ naig fe Jesus kiwai imeid bun inouf nigin katõ difen.

<sup>5</sup> Idi od enĩ karĩ de, waud al fe fen, ĩ moni difenẽf nigin dirokenen.

<sup>6</sup> Judas ĩ yo ye fen, tamo kayau to guru de mog, Jesus idi imeid bun inouf nigin naab imirek ilen.

*Jesus In Aposel Geid Idikeleya Nẽ Bõ Saaf Don*  
*(Matyu 26:17-35; Mak 14:12-31; Jon 13:21-30, 36-38)*

<sup>7</sup> Anĩ dumen, Bret Yis Sã anĩ nẽ naa wõ yen, anĩ bun idi Pasa naa nigin sipsip naal diden ken, sesewi difedig.

<sup>8</sup> Jesus, Pita Jon ado sur feid fen, iron, “Uleg, ada Pasa naa nẽ saaf tãf nigin dodok wanadag.”

<sup>9</sup> Idi Jesus to difiyen, “Õ, amã nain anĩ, Pasa naa nẽ saaf tãf nigin, dodok mafouf anĩ oroyok?”

<sup>10</sup> Age de di, Jesus idi irokenẽdin, “Taun wõg fen, tamo taka darum naan ado isi fotou yeĩf, ã fõ bun ilauf anĩ dõg uleg.

<sup>11</sup> Agog fen, ã fõ marau eig wiyẽg urokenẽgouf, “Tise õ irokonok: Aab nanĩ bun an, aya neu dõ fiya tar geid, Pasa naa nẽ saaf mãf?”

<sup>12</sup> Ago ge di, ã aab odug ilun anĩ ifelneĩf, an ererb ererb dodok de bure difelen. An neda nigin dodok gouf.”

<sup>13</sup> Age ye di, idi dile, Jesus irokenẽdin kilei ererb ererb age fiya dilen. Anĩ nigin, idi Pasa naa dodok difen.

<sup>14</sup> Sain wõ ye di, Jesus in aposel geid tebol bun dibodon.

<sup>15</sup> Age de fen, Jesus idi irokenẽdin, “Aya darau yaleya sã mog, ã geid Pasa naa nẽ saaf tãf anĩ orouf bagai.

<sup>16</sup> Ere nigin, aya ã arokeneik, aya baban Pasa naa nẽ saaf to ãf ile, anĩ fau Negur nẽ tano bun kisi falauf.”

<sup>17</sup> Age ye fen, ã kap yale, Negur de fiye ken, iron, “Enei waleg fen, ã atun foig.

<sup>18</sup> Aya ã momoi arokeneik, aya baban wain to ãf ile, Negur nẽ tano isiyouf.”

<sup>19</sup> Age ye fen, Jesus bret yale, Negur de fiye ken, mumã fen. Agef fen, ã in dõ fiya tar ifeneĩd fen,

iron, “Eĩ neu bouwau, ã nigin afeneik. Enei agog fen, aya nigin kisi gouf.”

<sup>20</sup> Age fiya bagai, saaf bure difel fen, Jesus kap yale, iron, “Kap enei, neu naudou bun, ã Negur geid bar itenēya mata, naudou are ã nigin fi felef.

<sup>21</sup> Anĩ ere, taka aya kiwai imeid bun inoyauf, are ein tebol bun urom imamã manof.

<sup>22</sup> Momoi, Tamo Naal ã nigin iron kilei agef ilauf, anĩ ere, tamo ã kiwai ifenek, ã malalon ado.”

<sup>23</sup> Age ye di, idi dogo dogol toti difen, idi atun aim bagai tobonunã enei age fouf.

<sup>24</sup> Takag, idi atun aim anĩ odug bagai ibodõf nigin luwa diroun.

<sup>25</sup> Age dife di, Jesus idi irokenēdin, “Haiden neid king, dogo neid tamo kayau lo difedig, idi dogo neid megeir tamo kayau bun yaor difedig, are ada biya difadauf dedig.

<sup>26</sup> Anĩ ere, ã age fiya anĩ to ago gouf. Age fiya ban, ã atun odug ibodok are, kesu naal gen ibodõf, takag, uyu irouya tamo ã, aruna yaleya tamo gen ibodõf.

<sup>27</sup> Ai anĩ odug, taka tebol bun ibodok anĩ de, taka ã aruna yalef anĩ? Taka ã tebol bun ibodok anĩ sã de? Anĩ ere, aya ã atun aruna yaleya tamo gen abodok.

<sup>28</sup> ã anĩ, neu kisi fiya isi di, aya bun toku ufaregen.

<sup>29</sup> Neu Dei tano aya ifanan gen, ayag tano ã afeneik.

<sup>30</sup> Age afe di, ã neu tanon, tebol bun saaf ado naan wãgouf, king nẽ sia bun ubodõg fen, Israel ibor tuwelf es gouf.

31 “Simon, Simon, tamo wit biya ado wit ido foi fiya nigin age fedig gen, Satan ĩ ãgenei momoiya kisi yeĩ fenē nigin to fen.

32 Anĩ ere, aya, Simon õ nigin ogon momoiya to urofosiyouf nigin kosē aun. Anĩ nigin, sain õ kelouf, turã tar megeir wediyouf.”

33 Anĩ ere, Pita aiten yale iron, “Odug, aya õ ado kalabus bun ado, laa bun ileyā nigin dodok afel.”

34 Age ye di, Jesus iron, “Pita, aya õ arokonok, gama fau tataro kokorok yeya sã mog, õ wa fen, aya nigin keleĩ sã wo, towo wouf.”

35 Age ye fen, Jesus idi to fedin, “Sain aya ã moni nē kodol, faa be, su sã sur ayein, ã ere taka lau gen de?” Idi solo de diron, “Sã.”

36 Age de di, Jesus idi irokenēdin, “Anĩ ere, gama taka ĩ moni nē kodol adouf, yalouf, faag age fiya, taka ĩ dimig sã, yogon gabar na nigin sur fe fen, taka na yalouf.

37 Negur nē Itotoya bun eig ye ibodok, ‘Ĩ tamo sesen geid bagu difedin.’\* Aya ã arokeneik, enei aya bun kisi fel, agef wõ youf. Ariya, aya nigin itoton are mogo kisi felef.”

38 In dõ fiya tar diron, “Ulef, Odug, dimig uru yeir.” Age de di, ĩ iron, “Are de.”

### *Jesus Moul Arein Kosē Yen*

*(Matyu 26:36-46; Mak 14:32-42)*

39 Agef fen, Jesus aabē tamal ulõ yeis fen, gai age fedig gen, Moul Arein iselen, age fe di, in dõ fiya tareg ĩ dõ difiyen.

---

\* **22:37:** Asaia 53:12



<sup>40</sup> Modoũ anĩ bun wõ de fen, Jesus in dõ fiya tar irokenēdin, “Kisi fiya bun to kubũ gouf nigin kosē wog.”

<sup>41</sup> Jesus yogon dõ fiya tar itorneĩd, meein irā di, ile kubũ youn age fiyan ile, ibor bobou fe fen, kosē yen,

<sup>42</sup> “Dei, õ oroyõf are, kap enĩ aya bun walelauf. Anĩ ere, neu oroya to dõ wouf, on oroya dõ wo.”

<sup>43</sup> Engel taka saa ilun tamal, ĩ bun wõ ye fen, megeir ifenen.

<sup>44</sup> Age fe di, Jesus wau morõ fatuk fe di, ĩ total bagai kosē yen, age fe di, maab, naud isidig gen, tenebur kuku ren.

<sup>45</sup> ĩ kosē yel fen, fã ye, in dõ fiya tar gedin kel ile, waud gudũ falaisil, den mog, ìledin.

<sup>46</sup> Agef fen, Jesus idi to fedin, “Ere nigin mulaĩ wenēgef? Ā kisi fiya bun to kuku gouf nigin fafãg fen, kosēg.”

### *Jesus Dirounen*

*(Matyu 26:47-56; Mak 14:43-50; Jon 18:3-11)*

<sup>47</sup> Jesus fau wogõ ye mog, tamo musei disin, tuwelf in dõ fiya tar idi anĩ atun taka, Judas dedig inim uyu iroukenēdin. ĩ Jesus umã fiyēf nigin non ìlen.

<sup>48</sup> Anĩ ere, Jesus ĩ to fiyen, “Judas, õ umãya bunem Tamo Naal kiwai wenēf de?”

<sup>49</sup> Sain Jesus nē dõ fiya tar, ereb wõ you fenē age fe di, dile fen, idi diron, “Odug, amã nemã dimig nem madenauf de?”

<sup>50</sup> Age de fen, idi takam, pris mudur ado nē ferfer weder biyalē anĩ salõf iran.

51 Anĩ ere, Jesus iron, “Baban enei to ago gouf!” Age ye fen, ĩ tamo anĩ nẽ weder kobũf fen, el fiyen.

52 Agef fen, Jesus, pris odudug, tempel lo fiya tamo neid uyu irouya geid, mudur adodo, ĩ nigin disin anĩ irokenẽdin, “Á bẽ tamo ounẽgouf gen, ã dimig adodo seburer adodo usigef de?”

53 Naa ganan, aya ã geid tempel bun tabodon, anĩ ere, ã aya bun imeĩ taka to unogen. Anĩ ere, eĩ ãgenei sain, are gugum irouneik nigin.”

*Pita Jesus Nigin Wa Fen*

*(Matyu 26:57, 58, 69-75; Mak 14:53, 54, 66-72; Jon 18:12-18, 25-27)*

54 Idi Jesus dale, diroune ken, pris mudur ado nẽ fõ bun dirou dilen. Pita ĩ so rel fen, dumeid dõ fen.

55 Anĩ ere, sain idi fofomala atun yã kũ de dibodon, Pita ĩg an weim dibodon,

56 Kabĩ kayau momoul taka, Pita yã sirin ibod mog, ĩlen. Kayau momoul anĩ Pita lo fel fen, iron, “Tamo eneig ĩ geid.”

57 Anĩ ere, Pita waf fen, iron, “Kayau, aya ĩ keleĩ sã.”

58 Sain naal ile di, taka nem ĩ ile fen, iron, “Õg idi neid taka.”

Anĩ ere, Pita iron, “Mou, aya sã!”

59 Aua tekelei age fiya ile di, taka bagam ĩ nigin totol iron, “Mmoi bagai, tamo eneig ĩ geid diyon, ere nigin, ĩg Galili tamal.”

60 Anĩ ere, Pita aiten yale iron, “Tamo, õ urok anĩ aya keleĩ sã!” ĩ irõ mog bagai, tataro kokorok yen.

61 Odug falei yel, Pita lo felen. Age fe di, Pita Jesus wogõ fiyen anĩ nigin weder fokõ yen, “Gama fau tataro kokorok yeya sã mog, õ aya nigin wa wo, towo wouf.”

62 Age fe di, ã mayarẽ ile fen, inã fatuk yalen.

*Kusĩ Tamo Jesus Diselinen*  
(*Matyu 26:67, 68; Mak 14:65*)

63 Tamo Jesus dirounen idi, ã diseline ken, wagĩ difiyen.

64 Age dife fen, idi Jesus mala difofakel fen, to difiyen, “Kurõ weis urokanamã! Aim õ inok?”

65 Age de fen, idi kono fiya od musei dirokenen.

*Jesus Juda Kaunsel Neid Kot Mala Bun Ifaren*  
(*Matyu 26:59-66; Mak 14:55-64; Jon 18:19-24*)

66 We fele di, tamo kayau neid mudur adodo neid kaunsel, are pris odudug, lo ifelnẽdiya tamo geid, weim guru de mog, Jesus idi gedin dirou dilen.

67 Idi diron, “Õ Kristus ouf are, amã urokanamã.”

Anĩ ere, Jesus aitedin yale iron, “Aya ã aro-keneĩf are, ã to momoi gouf,

68 agef fen, aya ã to ayeĩfeg, ã to solog urõgouf.

69 Anĩ ere, gama sain enei bunem ilauf ganan, Tamo Naal ã, Negur megeir ado ima biyalem ibodõf.”

70 Age ye di, idi ganan to difiyen, “Age foug are, õ anĩ Negur Naal de?”

ã aitedin yale iron, “ã de urõgef, aya anĩ.”

71 Age ye di, idi diron, “Ere nigin ada, ã nigin od megeir fiya nigin tamo baban tamirẽf? Ada ã sigoron bagai karĩ taul.”

## 23

*Jesus Pailat Herod Ado Meleid Bun Ifaren*  
(*Matyu 27:1, 2, 11-26; Mak 15:1-15; Jon 18:28-19:16*)

<sup>1</sup> Age de fen, guru fiya ganan fã de, Jesus Pailat bun dirou dilen.

<sup>2</sup> Age de fen, idi mogo gariya dino, ã bouwa bun od du ken, diron, “Amã, tamo enei nemã tamo kayau ganan idegëya bunem sanen guri feid irou ile mog, mailen. Ì Sisa takis ifenëya nigin katũ fiyeïd fen, ã yogo nigin aya Kristus, aya king yen.”

<sup>3</sup> Anĩ nigin, Pailat Jesus to fiyen, “Õ Juda neid king de?” Jesus solof iron, “Are de yer, õ urok anĩ.”

<sup>4</sup> Age ye di, Pailat ã, pris odudug, tamo kayau geid irokenëdin, “Aya tamo enei bou bun mosor taka to ailel.”

<sup>5</sup> Anĩ ere, idi total dinon, “Ì Judia distrik ganan bun, in ifelnëya bunem tamo kayau waud yalen. Ì Galili an gariya ino fen, tokõ fel eineg isin.”

<sup>6</sup> Pailat anĩ karĩ ye fen, ã Galili tamal be anĩ to fen.

<sup>7</sup> Pailat ã, Jesus Herod në tano bun tamal yeya kelei ken, Herod gein sur fen, Herod ïg sain anĩ bun Jerusalem ibodon.

<sup>8</sup> Herod Jesus ile fen, wau fatuk kulĩ yen, ere nigin, sain meluk bagai ã ileyã nigin oron. Ì nigin karĩ yen nigin, Herod ã Jesus bun memelik tunĩ ilouf nigin age fen.

<sup>9</sup> Herod Jesus musei bagai to fiyen, anĩ ere, Jesus taka to solof iron.

<sup>10</sup> Pris odudug, lo ifelnēdiya tamo geid an difaren, ï bou bun od total bagai dinon.

<sup>11</sup> Age dife di, Herod yogon kusï tamo geid, Jesus kasã difiye ken, kono difiyen. Age dife fen, kolos biya difounne ken, Pailat wagen sur difiyẽ di, kel ilen.

<sup>12</sup> Naa anï bun, Herod Pailat ado nigal dun, uruwa bun idi uruwom kiwain.

<sup>13</sup> Pailat ï, pris odudug, mudur adodo, tamo kayau geid iweigneïd fen,

<sup>14</sup> irokenēdin, “Ä tamo enei, tamo kayau waud yale fen, sane nigin weleid inon ge fen, waleg, urou usigel. Aya ä meleï bun to afiyem, anï ere, ä ï bou bun od unogen anï, tamo enei bun gariya taka to ailel.

<sup>15</sup> Herod ïg age fiya, anï nigin, ï kel sur fe di, ada gein isil. Anï ulogouf, ï yukesiya nigin ereb sane taka to age fen.

<sup>16</sup> Anï nigin, aya darau dogol afen ken, atornēf.”\*

<sup>18</sup> Anï ere, idi sigoreid takai fen, diweig diron, “Tamo enei ukesiyouf! Barabas walis kanamã!”

<sup>19</sup> (Barabas ï anï taun oun kusï yales fen, tamo yukesin nigin, kalabus bun dinenen.)

<sup>20</sup> Pailat, Jesus yalishēya nigin baban total bagai irokenēdin.

<sup>21</sup> Anï ere, idi baba baban diweig diron, “Aa tetek bun üf! Aa tetek bun üf!”

<sup>22</sup> Age de di, Pailat ï irō, towo fen sain bun anï irokenēdin, “Ere nigin? Tamo enei, ere mosor

---

\* **23:16:** Itotoya tunï eig de ditoton: *atornēf.*”<sup>17</sup> *Gama ï, kalabus bun tamal tamo taka, Sifa bun yalis kenēdiyouf bagai.*

inon? Aya ĩ yukesiya nē gariya anī, ĩ bun taka to ailel. Anī nigin, aya ĩ darau afen ken, atornēf.”

<sup>23</sup> Anī ere, idi aiteid odudug fen, ĩ aa tetek bun yūf nigin, baba baban dirokenen. Age dife di, dogo neid aitedim, Pailat nē od lai difiyen.

<sup>24</sup> Anī nigin, Pailat, nedi oroya dō fiya nigin kisi yale fen, irokenēdin.

<sup>25</sup> Pailat ĩ, tamo kusī yales fen, tamo yukesi di, kalabus bun dinenen ĩ nigin tamo kayau to difiyen anī, yalisne ken, dogo neid oroya dō difouf nigin Jesus ifenēdin.

### *Jesus Aa Tetek Bun Dun*

*(Matyu 27:32-44; Mak 15:21-32; Jon 19:17-27)*

<sup>26</sup> Idi Jesus dirou dile fen, Simon Sairini tamal, ĩ yogon fonom isi mog, luwen ĩ dale, aa tetek orowa se dife di, faali fe, Jesus dō fen.

<sup>27</sup> Tamo kayau musei, kayau idi ĩ nigin waud gudūf fen, inā dalen geid, dō difiyen.

<sup>28</sup> Anī ere, Jesus idi bun falei yel, idi irokenēdin, “Jerusalem nē barai tar, aya nigin inā to waleg, ā aug nigin ado gereī tar nigin inā waleg.

<sup>29</sup> Ere nigin, sain fau isiyouf bun, idi dirōf, ‘Kayau dali, kayau fau kesu gō fiya sã, kayau kesu su ifenēya sã anidi el fedif!’

<sup>30</sup> Age de fen,  
 “idi arei dirokenēdiyof, “Teteman kukug!”  
 arei mudu dirokenēdiyof, “Kerub  
 wamāg!” \*

<sup>31</sup> Tamo, aa mata mog, enei age difedif are, meti youf sain bun, ere wō youf?”

---

\* **23:30:** Hosia 10:8

<sup>32</sup> Lo wal fiya tamo uru idig, ĩ geid laa bun dinenēdiyof nigin dirou dilen.

<sup>33</sup> Sain idi modoũ yana Mudur Tuwan dedig wõ de fen, an Jesus aa tetek bun dun, lo wal fiya tamo uru geid, taka biya melem, taka ki melem.

<sup>34</sup> Age dife di, Jesus iron, “Dei, idi neid mosor nigin weder tu kel, ere nigin, idi keleĩ sa ken, enei age difef.” Age fe di, idi aisaĩ kodẽ de fen, yogon kolos idi atun foifu difen.

<sup>35</sup> Tamo kayau difar fen, lo difeid mog, mudur adodomeg ĩ kasã difiyẽ diron, “Ĩ tunĩ isennẽdin, ĩ Kristus Negur igirnen ouf are, utornẽg len, yogo bouwa isennẽf.”

<sup>36</sup> Kusĩ tamog dise fen, diselinen. Idi wain makik ado difen ken,

<sup>37</sup> diron, “Õ Juda neid king ouf are, ogo boũ usennẽf.”

<sup>38</sup> Ĩ muduren itotoya eig ya yenen: EĨ JUDA NEID KING.

<sup>39</sup> Lo wal fiya tamo aa tetek bun difaren anĩ takam, Jesus kono fiyẽ iron, “Õ Kristus ouf are, õ ogo usenne ken, amã usennamãf!”

<sup>40</sup> Anĩ ere, lo wal fiya tamo taka im, ne tã ou fiye ken, iron, “Õ kafĩ fiya tekelei walef, anĩ ere, õ Negur to kumĩ wiyek de?

<sup>41</sup> Ada urom darau talef, are de, ere nigin, ada urom sane age tafen anĩ mala solo. Anĩ ere, tamo enei ereb sane to age fen.”

<sup>42</sup> Age ye fen, ĩ Jesus irokenen, “Jesus, sain õ ogon tano bun usel fen, aya karĩ wiyalauf.”

<sup>43</sup> Age ye di, Jesus tamo anĩ irokenen, “Aya õ momoi arokonok, gama õ aya ado paradis bun tabodõf.”

### *Jesus Laa Fen*

*(Matyu 27:45-56; Mak 15:33-41; Jon 19:28-30)*

<sup>44</sup> Gaa atun tuwelf kilok age fiya bun, teneub ganan bun gugum kelef ile, tri kilok aragaun,

<sup>45</sup> ere nigin, gaa mala ifokelen. Age fe di, tempel nē gabar anī atusil serek fe, uru wō yen.

<sup>46</sup> Jesus ait odug nem iweig iron, “Dei, neu uur ò imã bun anof.” Agef iro ken, ï oboi irour yalen.

<sup>47</sup> Kusī tamo neid orowa, Jesus age fiya ile fen, Negur yana yales iron, “Momoi, tamo eĩ madur tamo.”

<sup>48</sup> Tamo kayau ganan idi lo fiya nigin guru difen, ereb anī wō ye di, meledim dilen, are idi waud gudūf fen, akoreid du ken, firagagaũ difen.

<sup>49</sup> Anī ere, idi Jesus keleĩ anidi ganan, idi atun kayau Galilim ï dō de disin anidig, so del difar fen, eneidi wō ye di, lo difen.

### *Jesus Mũ Difen*

*(Matyu 27:57-61; Mak 15:42-47; Jon 19:38-42)*

<sup>50</sup> Tamo taka yana Josef, ï kaunsel taka, madur tamo biya bagai,

<sup>51</sup> anī nigin, ï idi neid tobonuneid ado od difon anī nigin to yo yen. ï Judia distrik bun Arimatea taun tamal, ï Negur nē tano isiyouf anī tari fen.

<sup>52</sup> Josef ï, Pailat gein ile, Jesus bou buru yalouf nigin to fien.

<sup>53</sup> Agef fen, ï Jesus bou buru yale, irou isil, gabar lalau nem silef fen, matmat sa bun ku dalen an inenen, ku anī bun an taka to dinenen.

<sup>54</sup> Naa anī dodok fiya naa, Sabat naa mogo gariya inou fenē melsã.



<sup>55</sup> Kayau Jesus geid Galilim disin, Josef dō de, matmat ado, Jesus bouwa buru naig de dinof anī, lo difen.

<sup>56</sup> Age difel fen, idi fonō dile, bou wā fiya nē marasin ado moul sumeī biya bagai dodok difen. Anī ere, idi Sabat naa nigin itāfiya dō de fen, si dinon.

## 24

### *Jesus Mata Kel Fā Yen*

*(Matyu 28:1-10; Mak 16:1-8; Jon 20:1-10)*

<sup>1</sup> Uub nē naa matu bun\* bonimei bagai murei ado, kayau idi, bou wā fiya nē marasin dodok difen anī dale fen, matmat bun dilen.

<sup>2</sup> Age dife fen, idi matmat bun meein wele feleya dilen.

<sup>3</sup> Anī ere, sain idi meku namen dilen, idi Odug Jesus nē bouwa buru an to dilen.

<sup>4</sup> Idi enei nigin kisi musei dale mog bagai, tamo uru kolos medeīya barikā siridin difaren.

<sup>5</sup> Age dife di, kayau kumī de fen, kususu de, teneub lo difen, anī ere, tamo idi kayau dirokenēdin, “Ā ere nigin laa atun mata tamo umirnēgef?”

<sup>6</sup> Ī ein sã, ĩ mogo fã yel! Ī Galili oun ã geid ubodōg fen, irokenein anī, wedereī fokō youf,

<sup>7</sup> ĩ iron, “Tamo Naal mosor adodo imeid bun dino di, ĩ aa tetek bun dukesiyouf, age dife di, naa towo bun, ĩ baban mata kel fã youf.”

<sup>8</sup> Age de di, kayau idi, in od anī wedereid fokō yen.

---

\* **24:1:** Are Sande.

<sup>9</sup> Sain idi matmat bunem ke de, disi fen, aposel ilewen tunĩ ganan geid, enei ganan wogõ difiyēdin.

<sup>10</sup> Kayau idi are Maria Magdala tamal, Joana, Maria Jems nē sina. Kayau anidi, kayau tunĩg geid, enei aposel wogõ difiyēdin.

<sup>11</sup> Anĩ ere, idi kayau nigin to momoi den, ere nigin, kayau neid od, idi bun auya gen.

<sup>12</sup> Anĩ ere, Pita fã yale, matmat bun gudu re ilen. Ĩ ku bun itin, gabar lalau dogol yen mog, ilen, agef fen, erab anĩ wõ yen anĩ nigin, ĩ kisi musei yalef ile, yogon fõ bun ilen.

*Emaus Naab Luwen*  
(Mak 16:12, 13)

<sup>13</sup> Naa de anĩ bun, idi neid tamo uru, fonõ taka yana Emaus dilen, Jerusalem anenem Emaus are ilewen kilomita age fiya.

<sup>14</sup> Idi urom, erab erab ganan wõ yen anĩ abob dirokenek dilen.

<sup>15</sup> Idi eneidi nigin diro ken, katõ de dile mog, Jesus yogo isi, weim diyok dilen.

<sup>16</sup> Anĩ ere, idi Jesus keleĩya nigin meleid ifofakelen.

<sup>17</sup> Age dife di, Jesus idi to fedin, “Ã ere nigin naab luwen katõ ge usigef?” Idi dē del fen, idi neweid wau gudũ fiya ado agogon delen.

<sup>18</sup> Idi taka yana Kleopas Jesus solof irokenen, “Õ ege Jerusalem nē ki tamo nigin, naa eneidi bun an erab erab wõ yen anĩ, õ keleĩ sã de?”

<sup>19</sup> Age ye di, Jesus idi irokenēdin, “Ere bagai?” Idi Jesus dirokenen, “Jesus Nasaret tamal nigin. Ĩ

profet taka, Negur ado tamo kayau ganan meleid bun, od ado tobonunã bun megeir barikã.

<sup>20</sup> Pris odudug, neda mudur ado idim, ã laa bun dinenẽf nigin imeid bun dino di, aa tetek bun dukesin.

<sup>21</sup> Anã ere, amã waumã iron, im anã Israel tamo kayau kel gei foug maun. Anã dogol sã, enei ganan wõ yen are, gama naa eneim mogo naa towo ilef.

<sup>22</sup> Takag, amã nemã kayau tunĩg, amã terẽ difamam. Gama bonimeid bagai, idi matmat bun dilel,

<sup>23</sup> anã ere, idi yogon bouwa buru to dilel. Idi dile, meleid seleulã kurãf fen, engel diledin, engel idi dirokenẽdil, Jesus ã mata ibodok, difiyedi di, disi, amã dirokanamam.

<sup>24</sup> Age de di, amã tunĩ matmat bun dile, kayau wogõ del gen bagai dilel, anã ere, idi Jesus to dilel.”

<sup>25</sup> Jesus idi irokenẽdin, “Ã neneya bagai, ã profet wogõ den anã ganan, wauĩ bun momoiya nigin folo reya bagai!

<sup>26</sup> Kristus ã darau enei yale fen, yogon fula fiya medeĩya namen to ilauf de?”

<sup>27</sup> Age ye fen, ã Moses ado profet ganan neid itotoya bunem gariya ino fen, yogo nigin Negur nẽ Itotoya ganan bun ibodok anã, idi faded fedin.

<sup>28</sup> Idi fonõ dilef nẽ anã kelẽ difiye ken, Jesus tokõ feleya nigin suma ino genen.

<sup>29</sup> Anã ere, idi total bagai dirokenen, “Amã geid tabodõf, ere nigin, gaa mogo kuru kelef, gugum irousif.” Anã nigin, Jesus idi geid dibodõf nigin namen ilen.

<sup>30</sup> Sain ã idi geid tebol bun dibod ken, ã bret yale, Negur de fiyê, mumãf fen, gariya ino ifenêdin.

<sup>31</sup> Age fe di, idi meleid fara fele di, idi Jesus nigin kelein. Age dife di, ã idi meleid bun iminkelen.

<sup>32</sup> Idi abob dirokenen, “Sain ã naab luwen wogõ fada fen, Negur nê Itotoya faraf ifelnadal mog, ada namedan wauda to tõf yalel de?”

<sup>33</sup> Age de fen, idi fã de dale, kaisã bagai Jerusalem keku de dilen, an idi aposel ilewen, tamo tunã idi geid, guru de difar mog, fotou difedi di,

<sup>34</sup> diron, “Are momoi! Odug fã ye fen, Simon bun wõ yen.”

<sup>35</sup> Age de di, tamo uru ereb naab luwen wõ yen ado, Jesus ã bret mumã fe di, idi Jesus nigin naig de kelein anã wogõ den.

### *Jesus In Dõ Fiya Tar Bun Wõ Yen*

*(Matyu 28:16-20; Mak 16:14-18; Jon 20:19-23; Aposel 1:6-8)*

<sup>36</sup> Idi fau enei nigin wogõ de mog, Jesus yogo idi atun ifar fen, irokenêdin, “Wau inosiya ã ado ibodõf.”

<sup>37</sup> Idi baraũ mailef de fen, terê de fen, kumĩ den.

<sup>38</sup> Age dife di, Jesus idi irokenêdin, “Ere nigin ã wauĩ morõ fef, ere nigin ã wauĩ bun kisi uru wõ yef?”

<sup>39</sup> Aya imau yeu ado feleg. Eĩ aya yug bagai! Kobũ wiyag fen, uleg. Baraũ ã aya bouwau ado, tuwau ado uleyagef gen sã, ã bou sã, tuwa sã.”

<sup>40</sup> Jesus enei iro ken, ã ima ye ado ifelnêdin.

<sup>41</sup> Age fe di, idi waud kulīya ado terēya bunem, fau waud to momoi de di, Jesus idi to fiyēdin, “Ã ereb yōya nē taka ein tau ado?”

<sup>42</sup> Idi gau yā tamal masak taka difenen,

<sup>43</sup> age dife di, Jesus gau yale, meledin yon.

<sup>44</sup> Jesus idi irokenēdin, “Enei are, aya fau ã geid tabodon sain bun arokenein. Ereb ereb ganan, aya nigin Moses nē Lo bun, profet neid itotoya bun ado, Buk Sam bun ditoton anī ganan kisi falauf bagai.”

<sup>45</sup> Agef fen, Jesus idi Negur nē Itotoya keleī youf nigin, waud kā fenēdin. 4624

<sup>46</sup> Ī idi irokenēdin, “Negur nē Itotoya bun eig ye irok: Kristus ĩ fau darau yale fen, laa bun tamal naa towo bun mata kel fã youf,

<sup>47</sup> age fe di, wau faleiya ado, mosor nigin weder tu keleya nē od anī, fau ĩ yana bunem teneub ganan bun, Jerusalem anenem gariya dino fen, wogō de dilauf.

<sup>48</sup> Ã enei ulegen nigin kurō walaisi gouf.

<sup>49</sup> Aya esel fen, neu Dei sur afouf yen anī, ã bun sur afouf, anī ere, taun anī bun ubodōgef uleg, ã megeir saa ilun tamal anim ifounneif.”

### *Jesus Saa Ilun Iselen*

*(Mak 16:19, 20; Aposel 1:9-11)*

<sup>50</sup> Sain Jesus idi gurif irou, Betani non dilen, an ĩ ima yales fen, el fiya ifenēdin.

<sup>51</sup> Ī idi el feid le fen, ĩ itornēdi di, saa ilun irou iselen.

<sup>52</sup> Age fe di, idi ĩ yana dales fen, waud kulīya odug ado, Jerusalem ke de dilen.

<sup>53</sup> Age de fen, idi tempel bun toku dibod ken,  
Negur yana dalesedig.

**Mata Ifeněya Ně Od**  
**The New Testament in the Marik Language of Papua**  
**New Guinea**  
**Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

**The New Testament**

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

cxx

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

---

PDF generated using Haiola and XeLaTeX on 18 Mar 2025 from source files dated 31 Aug 2023

d7099f9d-3bdf-5620-8eb3-7e6c51cab7ea